

Rômbân **Pawre kot Rômbâm Jejus kôt** **hkwỳjê hwỳr kagà nẽ mẽn**

Kagà ja na pre Pawre hipêx. Kêp Jejus nhỹ hã mẽ ahkre ho pa xwỳnh na pre. Na pre hte mry kà ho ixkre nhĩpêx nẽ mẽ kãm ho wẽnê ho mẽ hkôt pa pẽ mẽ piitã mẽ kãm Tĩrtũm kapêr jarênh o pa. Tã krĩ pẽ Rômb kãmã mẽ kot Jejus kôt amnhĩ xunhwỳr xwỳnhjê hwỳr kagàja nhĩpêx nẽ mẽ hwỳr kumẽ. Kormã ma mẽ hwỳr môr nẽ mẽ omunh kêt ri.

Nẽ Jejus kêp Tĩrtũm mã tanhmã mẽ pajarênh to xwỳnh ã nhũm pre mẽ kãm harẽ nẽ hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tĩrtũm mẽ pahte hkôt amnhĩ xunhwỳr ã mẽ pahpumu nẽ Jejus kukwak ri mẽ pahte amnhĩ to mex xwỳnh ã mẽ pajarẽ.

Nẽ Tĩrtũm Karõ nhỹ hã mẽ kot amnhĩ nhĩpêx nyw nẽ hamaxpêr nyw o pa hã nhũm Pawre mẽ kãm karõ nẽ hã kagà. ã na pre mẽ kãm mẽmoj jarẽ nẽ hã kagà anẽ. Nẽ hã kagà ho:

¹ Pa Rômb nhõ xwỳnhjaja? Xà mẽ amex? E ot pa mẽ awỳr kagà nhĩpêx nẽ kumẽ. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhĩpêx to hã harênh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awỳr kagà nhĩpêx nẽ mẽn anẽ. Ixte Jejus nhỹ hã mẽ ahkre ho ri ixpa xwỳnh na pa. Na pa hte kãm tanhmã amnhĩ nhĩpêx to ho ri ixpa. Tã ã mẽ awỳr kagà nhĩpêx nẽ mẽn anẽ.

² Amnepê m na pre Tĩrtũm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtjê mã Jejus kukamã tanhmã harênh to ho ri pa. Nê mẽ kãm kapêr jarênh o mẽ hkôt pa nê mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhĩpêx to mã xwỳnh mẽ nhũm mẽ hpiitã hprĩ hã harênh ma nê omu. Anê.

Nhũm prem ã Jejus kukamã mẽ kãm harênh anhỹr o ri mẽ hkôt pa. Tĩrtũm kapêr ã kagà htũm kamã harênh xà hkôt tanhmã mẽ kãm harênh to. ³Tĩrtũm Kra Jejus Krisja na pre mẽ kãm harênh o ri mẽ hkôt pa. Mẽ panhõ Pahihti na. Kêp Tĩrtũm Kra htã na pre mẽ pahpyrà nê ĩ ho amnhĩ nhĩpêx nê wrỳ nê katorxà nhõxà hkre rũm kato. Jakamã kêp Tĩrtũm Kra pix kêt mãănê n katorxà hkôt kêp higê t Tawi hkanrêhã htãmnhwỳ.

⁴ Kêp Tĩrtũm Kra htã nhũm prem axtem nê tanhmã hamaxpêr to nê kupĩ. Nom nhũm Tĩrtũm kêp amnhĩ Kra hã akupỹm ho htĩr. Jakamã na pu htem harênh ma nê kãm pajamaxpêr o:

—Jesukêp Tĩrtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tĩrtũm pyrà nê hihtỳx o hihtỳx. Anê.

⁵ Tã ã Tĩrtũm kot Kra nhĩpêx anhỹrja ri na mãănê n pa ixto mex nê mẽ akaxyw ixãm. Jakamã na pa hte ma krĩ piitã hkôt mẽ kãm tanhmã Jejus Kris jarênh to ho ri mẽ hkôt ixpa. Ijaew mã nê Ijaew kêt xwỳnhjê mã. Mẽ kot harênh mar nê amnhĩ kaxyw kãm hamaxpêr nê kapêr kôt pix mã amnhĩ nhĩpêx mex kaxyw. ⁶⁻⁷ Nê mẽ apê Rôm nhõ xwỳnhjaja. Na ka prem Jejus kôt amnhĩ xunhwỳ nhũm Tĩrtũm ja hã mẽ apumu nê mẽ ato hkra nê

mê apê Jejus mê wa hkwỳ hã mê ajarê. Mê ate hkôt amnhĩ nhĩpêx kaxyw nhũm pre ã mê ajarênh anê.

Tã ot pa kagà nhĩpêx nê mê awỳr mênh kaxyw. Tĩrtũm kot mê ato hkra xwỳnhjê hwỳr. Tĩrtũm kãm mê ajapêê.

Na pa hte mê ato mê panhĩpêêxà maati Tĩrtũm mê Pahihti Jejus Kris wa hwỳr rãhã ri ixpa. Nê mê ato wa hwỳr o:

—Kwa kêr ka wa Rôm kamã war akrajê pumunh mex nê mê kutã anojarêr rãhã nê. Kê mê hamakêtkati nê àmnhĩx ri tanhmã amnhĩ nhĩpêx to ho ri pa. Anê.

Pawre kot Rôm nhõ xwỳnhjê pumunh prãm ã amnhĩ jarênh

Atre 28.15-16; Rôman 15.22-29

⁸ Nê na ka prem amnhĩ kaxyw Jejus Kris mã ajamaxpêr nê hkôt amnhĩ xunhwỳ nhũm krĩ piitã hkôt mê pa xwỳnhjaja mê ajarênh ma. Nê mê ate amnhĩ nhĩpêx nyw ã mê ajarênh ma nê axpên mã tanhmã mê ajarênh to ho pa. Nê mê ajarênh o:

—Kwa na xep Rôm kãm mê hkwỳjaja amnhĩ kaxyw Jejus mã hamaxpêr tỳx nê. Nê hkôt amnhĩ nhĩpêx mex rãhã ho ri pa. Anê.

Pa ã mê kot mê ajarênh anhỹrja ma nê ixkĩnh tỳx nê. Nê Tĩrtũm mã mê anhỹ hã ixkĩnh ã amnhĩ jarênh o ri ixpa. ⁹ Na pa hte mê ato hwỳr rãhã ho ri ixpa. Nê nhỹri mê kãm Tĩrtũm Kra Jejus kapêr jarênh o ri ixpa nê mê amã ijamaxpêr nê mê ato kuwỳ. Nê tanhmã Tĩrtũm mã amnhĩ nhĩpêx to ho ixpa pê mê amã ijamaxpêr nê mê ato kuwỳ. Tĩrtũm kot ja hã ixpumunh mex. ¹⁰ Na pa hte tanhmã kãm

amnhĩ jarênh to kaxyw nê mẽ akaxyw amnhĩ to kuma nê kãm:

—Pa Tĩrtũm? Na pa ra inhmã ma Rôm wỳr inhmõr nê kamã akôt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Anê.

¹¹ Na pa ra inhmã mẽ awỳr inhmõr prãm tỳx nê. Na pre Tĩrtũm Karõ tanhmã ixkrã hto pa ỹ hã kapêr ã kagà mar tỳx nê. Nê hkôt mẽmoj mex pumunh rax nê. Tã ra inhmã ma mẽ awỳr inhmõr nê amnhĩ xô ri mẽ amã harênh prãm nê. Mẽ ate inhmar nê aprĩ hã Jejus Kris kôt amnhĩ xunhwỳr tỳx nê hkôt amnhĩ nhĩpêx mex rãhã ho ri apa kaxyw. ¹² Kot paj nhỹrmã ma mẽ awỳr mỗ. Nê mẽ awỳr pỏj pu mẽ axpên pumu nê pahkĩnh nê. Mẽ pahte amnhĩ kaxyw Jejus Kris mã pajamaxpêr mex o papa hã axpên pumu nê pahkĩnh nê. Nê mẽ pahpiitã hkôt amnhĩ nhĩpêx mex o ri papa.

¹³ E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixa. Nom kot paj nhỹrmã ma mẽ awỳr mỗ. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarênh anê. Na pa pre krĩ hkwy kamã mẽ apê Ijaew kêt xwỳnh kwỳjê hwỳr ixa. Nê mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkôt ixa. Nhũm mẽ hkwyjaja inhma nê hkôt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm nê. Mẽ akwỳjaja kot ixkapêr mar nê mẽ apyrã nê Jejus kôt amnhĩ xunhwỳr kaxyw. ¹⁴ Na pre ra Tĩrtũm ixte kapêr o mẽ ajahkre ho ixa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Nê mẽ kot kagà pumunh

xwýnhjê mẽ mẽ kot kagà pumunh kêt xwýnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa kaxyw. ¹⁵ Jakamã na pa ra inhmã mẽ apê Rôm nhõ xwýnhjê hwýr inhmõr prãm nẽ. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nẽ mẽ pahpyrà nẽ Jejus kôt amnhĩ xunhwýr kaxyw.

Jejus kot mẽ panê htyk ã harênh

Sikũn Ximotre 1.6-12

¹⁶ Nẽ Jejus kot mẽ panê htyk ã harênhja ãm hãmri na. Harênhja mex o mex. Na htem kuma nẽ kãm hamaxpêr nẽ amnhĩ kaxyw hkôt hamaxpêr nẽ hkôt amnhĩ xunhwý. Hãmri nhũm Tĩrtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhõ xwýnhjê pix kêt. Mãănẽn mẽ apê Ijaew kêt xwýnhjaja nhũm kãm mẽ pajapê ho axpên pyræk. Jakamã na pu htem Jejus kôt amnhĩ xunhwý nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx. ¹⁷ ãm mẽ kot amnhĩ kaxyw Jejus mã hamaxpêr xwýnh pixjaja na hte mẽ ho hkra. Kapêr ã kagà htũm kot tanhmã ja jarênh to nẽ harênh kot:

Na hte Tĩrtũm mẽ kot amnhĩ kaxyw Kra mã hamaxpêr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anẽ.

Mẽ pahpiitã mẽ pahte amnhĩ tomnuj xwýnh ã mẽ pajarênh

Atre 14.15, 17.22-29; Apokarip 9.20-21

18 Nê mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harênh to. Na htem Tĩrtũm kapêr ma nom amnhĩ tomnuj gryk ã ãm kuma. Nê mẽ hkwỳjaja kot kapêr mar pymaj kapêr ô ho mẽ kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nê. 19-20 Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrĩt mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nê. Nê kêp mẽmoj piitã ho kator xwỳnh ã omunh mex nê. Nê mex o mex ã omu nê hihtỳx o hihtỳx hã omu. Tĩrtũm kot amnhĩ nhĩpêx kot amnhĩrĩt mex nhũm mẽ kot omunh mex tã hkôt amnhĩ xunhwỳr kêt nê. Nê axtem nê hamaxpêr o:

—Tk. Tĩrtũm kot inhmã amnhĩ to amnhĩrĩtre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhũm Tĩrtũm tee ri ja hã mẽ omu nhũm ja kêp omnuj tỳx nê. 21 Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

—Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamàt kô kamã ri mẽ pa xwỳnhjê kot amnhĩ nhĩpêx pyrã nê mẽmoj mex pumunh kêt nê.

²² Mẽ kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nẽ mẽ hamaxpêr kêt pyrãk o amnhĩ nhĩpêx. ²³ Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nẽ ho õ sãnti nẽ te ri ho Tĩrtũm nhĩpêx pyrãk o hipêx. Jao hpar pê hkõn krã ho rôrôk nẽ amnhĩ to kuwỳ nẽ kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mẽ axtem nẽ sãnti gryk ã hkaga nẽ ã amnhĩ nhĩpêx o pa anẽ. ²⁴ Jakamã nhũm tee ri ã mẽ kot amnhĩ nhĩpêx anhỹr ã mẽ omu nẽ amnhĩ pyrã nẽ mẽ hkaga nẽ ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nẽ axpên kãm ri tanhmã hpijaàm kêt to. Á na htem htỳx ri amnhĩ tomnuj anhỹr o pa.

²⁵ Tĩrtũm kapêrja ãm hãmri htã nhũm mẽ axtem nẽ te amnhĩ pum rênh pyrãk o hipêx nẽ kãm hamaxpêr kêt nẽ. Nẽ hpãnhã ri mẽ hêx xwỳnhjê kapêr pix ma nhũm ja te mẽ kãm mex pyrãk. Na htem ã amnhĩ nhĩpêx anẽ hãmri nẽ axtem nẽ Tĩrtũm kot mẽmoj nhĩpêx pix parpê rôrôk nẽ amnhĩm mex o mex ã harê. Nom kot hipêx xwỳnh Tĩrtũm parpê mãn ã amnhĩ nhĩpêx anhỹr kêt nẽ. Nom kot mẽmoj nhĩpêx xwỳnhhta mex o mex jakamã koja mẽ kot hkôt amnhĩ nhĩpêx xwỳnhjaja jajê rom kãm mex o mex ã harênh tũm rãhã ho ri pa. ²⁶ No mẽ kot amnhĩ tomnuj xwỳnhjaja na hte Tĩrtũm amnhĩ pyrã nẽ mẽ hkaga nhũm mẽ htỳx amnhĩ krã hkôt ri tanhmã amnhĩ tomnuj to ho ri pa. Jao mẽni hkwyjaja axtem nẽ axpên gryk ã

mjên kaga nê axpên nhĩõ ho mjên. ²⁷ Nhũm mẽmy hkwyjaja mãănên axtem nê amnhĩ kwỳjê my gryk ã hprõ kaga nê axpên nhĩõ ho hprõ. Na htem ã axpên kamã hpijaàm kêt o pa anê. Mýrapê koja mẽ à pix kãm amnhĩ xà htỳx kamã hamak o pa. ²⁸ Na htem amnhĩ tomnuj gryk ã Tĩrtũm mã hamaxpêr kêt nhũm tee ri amnhĩ tã mẽ omu nê hamaxpêr o:

—Mẽ kãm amnhĩ tomnuj pix prãm jakamã kwâr mẽ mãmrĩ ã amnhĩ nhĩpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

³⁰ Nê kãm mẽmoj tã axpên to hêx pix prãm.

Nê kãm Tĩrtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr. Nhũm mẽ katorxà nê mẽ hipêxà tee ri ja nê tanhmã mẽ kãm kapêr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tĩrtũm kãm mẽmoj mex nhũm

mê kêp omnuj nê nhũm Tĩrtũm kêp mẽmoj omnuj nhũm mẽ kãm mex nê. Nê axpẽn mã mẽmoj tanhmã ho hã amnhĩ jarẽnh tã ho anhỹr kêt nê. Nê axpẽn kãm ukaprĩ ho ri pa hkêt nê. ³² Tĩrtũm kapêr ã kagà htũm kot tanhmã mẽ hkukamã mẽ harẽnh to nê mẽ harẽnh kot:

Ã mẽ kot amnhĩ nhĩpêx anhỹr o ri mẽ pa xwỳnhjaja
koja mẽ nhỹrmã ty hãmri nê amnhĩ xà htỳx
kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwyjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

2

Mê kot amnhĩ tomnuj xwỳnhjê hkukamã mẽ harẽnh

Matêwre 7.1-5; Sikũn Tesarôn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atô ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harẽnh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anhÿr o amnhĩ jarẽ. Kwa nà mẽ ã ajamaxpêr anhÿr kêt nẽ. Mẽ pajaxwýja na pu htem tōhã mẽ uràk nẽ tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harẽnh anẽ nẽ te ka ate amnhĩ jarẽnh pyràk. ² Tĩrtũm kapêr ã kagà htũm kot mẽ kot amnhĩ tomnuj o ri mẽ pa xwýnhjê jarẽnh kot:

Mẽ kot amnhĩ tomnuj mýrapê koja mẽ nhÿrmã amnhĩ xà htýx kamã hamak rãhã ho ri pa. Anẽ.

Ãm hãmri ã mẽ harẽnh kot anhÿr. ³ Mãn ka mẽ atō tanhmã amnhĩ kukamã ajamaxpêr to nẽ ajamaxpêr o:

—Nà koja Tĩrtũm nhÿrmã amnhĩ nê kuwy hwýr mẽ kot amnhĩ tomnuj xwýnhjê rẽ. No pa koja hwýr inhmẽnh kêt nẽ. Anẽ.

Kwa mẽ ã ajamaxpêr anhÿr kêt nẽ. Kot ka mẽ ã amnhĩ kukamã ajamaxpêr anhÿr tã tōhã mẽ uràk nẽ tanhmã amnhĩ tomnuj to. Jakamã koja Tĩrtũm mẽ uràk nẽ hã tanhmã mẽ ato. ⁴ Kot kaj mẽ atō tanhmã amnhĩ tomnuj to hãmri nẽ ãm ja hã amnhĩ pumu nẽ ajamaxpêr o:

—Ixte amnhĩ tomnuj xwýnh tã na hte Tĩrtũm ja hã ixpumu nẽ ãm ixpumu nẽ hã tanhmã ixto hkêt nẽ. Kêp mẽ ixkamã ukaprĩ xwýnh jakamã na hte gryk tokyx anhÿr kêt nẽ. Jakamã kot paj arĩ tanhmã amnhĩ tomnuj to ho ri ixpa nẽ aa jam inhũrer kêt nẽ. Tĩrtũm kot ja hã tanhmã ixtore kaxyw hã.

Anhÿr o ajamaxpêr. No ãm ja kot anhÿr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nẽ hpãnhã hkôt amnhĩ xunhwýr kaxyw na hte kormã amnhĩ tã mẽ pajamã.

Jakamã na kormã tanhmã ate amnhĩ tomnuj tota ã tanhmã ato hkêt nê.

⁵ Mẽ akrã hihtýx jakamã mẽ amã hkôt amnhĩ xunhwýr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nê gaa nê ra anhýr kumrêx. Nhũm Tĩrtũm tee ri ja hã mẽ apumu nhũm ja kêp omnuij týx o mỗ. Jakamã koja nhỹrmã tanhmã mẽ ajarênh to nê gryk týx kãm tanhmã mẽ atomnuj týx to. Âm hãmri na hte mẽ pahte amnhĩ nhĩpêx ã mẽ pahpumunh xà hkôt ahpýnhã tanhmã mẽ panhĩpêx to.

⁶ Koja nhỹrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwýnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwýnhjaja nhũm mẽ homnuj nê. Koja nhỹrmã mẽ pahpiitã mẽ pahto hpimràatã ã mẽ panhĩpêx anê. ⁷ Mẽ kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harênh prãm xwýnhjaja koja nhỹrmã amnhĩm mẽ mex ã mẽ harê. Hãmri nhũm mẽ kuri htĩr tũm nê hkĩnh nê mex kumrêx nê pa ho pa. ⁸ Nom mẽ kot amnhĩ mã pix mã ri hamaxpêr o ri mẽ pa xwýnhjaja. Nê mẽ kot tanhmã amnhĩ tomnuj to gryk ã Tĩrtũm kapêr kaga xwýnhjaja koja kãm mẽ hkĩnh kêt nê tanhmã mẽ homnuj týx to. ⁹ Mẽ kot amnhĩ tomnuj xwýnh piitã koja mẽ nhỹrmã amnhĩ xà htýx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwýnhjaja nhũm mẽ amnhĩ xà htýx kamã hamak rãhã nê pa ho pa. Mẽ kot amnhĩ tomnuj týx o paja mýrapê.

¹⁰ No kêt tãm mẽ kot amnhĩ nhĩpêx xwýnhjaja

koja Tĩrtũm mẽ ho mex rax rãhã ho pa ho pa. Nẽ amnhĩm mẽ kot amnhĩ to mex xwỳnhjê hã mẽ harẽ. Nẽ tanhmã mẽ ho mex to nhũm mẽ kamã amnhĩ krit nẽ pa ho pa. Hamakêtkati nẽ hkĩnh nẽ àmnhĩx ri pa ho pa. Ijaew kwỳ kumrẽxjaja nẽ mãănẽn Ijaew kêt xwỳnh kwỳjaja nhũm mẽ mex nẽ hamakêtkati nẽ hkĩnh nẽ àmnhĩx ri pa ho pa. ¹¹ Koja Tĩrtũm nhỹrmã ahpỹnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarẽn to pê tanhmã mẽ panhĩpêx to. Mẽ ixpê Ijaewjaja nẽ mẽ apê Ijaew kêt xwỳnhjaja nhũm ã mẽ pahpiitã mẽ panhĩpêx anẽ.

¹² Amnepêm na pre finat Mojes mã tanhmã kapêr to nhũm kuma nẽ ô ri hã kagà hpa. Mẽ ixpê Ijaew ri na kapêr ã kagàja. Ra mẽ ixte mar tỳx jakamã koja mẽ ixtô ra kapêr mar tỳx tã hkôt amnhĩ nhĩpêx kêt hãmri nhũm Tĩrtũm tee ri amnhĩ tã omu nẽ ã amnhĩ nhĩpêx anhỹrja mỳrapê nhỹrmã ma mẽ kot amnhĩ xà htỳx kamã hamak tũm xàta wỳr kumẽ. Kot kapêr mar tỳx tã hkôt amnhĩ nhĩpêx kêt mỳrapê nhũm ã hipêx anẽ. No kêt mẽ apê Ijaew kêt xwỳnhjaja mẽ ixkĩnhã mẽ ari Tĩrtũm kapêr ã kagà hkêt jakamã koja mẽ ate kapêr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nẽ. Koja hpãnhã mẽ ate tanhmã amnhĩ tomnuj to ho apa mỳrapê mẽ kot amnhĩ xà htỳx kamã hamak o pa tũm xàta wỳr mẽ arẽ.

¹³ Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwỳnh ã mẽ harẽn kêt nẽ. ãm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to mex xwỳnh ã mẽ harẽ. ¹⁴ No mẽ hkwỳjaja kormã kot kapêr mar kêt tã te ra mẽ kot mar mex

pyràk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrà nê Tĩrtũm kapêr mar tỳx nê hkôt amnhĩ nhĩpêx o ri pata pyràk. ¹⁵ Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapêr kot mẽ hkrãm gjêx pyràk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nê hkaprĩ nê. Nê tãm amnhĩ nhĩpêx ã amnhĩ pumu nê hkĩnh nê.

¹⁶ Tã koja nhỹrmã Tĩrtũm Jejus Kris mã anê nhũm kuma hãmri nê mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harênh to. Nê mẽ hamaxpêr kôt mẽ omunh mex xà hkôt tanhmã mẽ harênh to. Mẽ papajaja mẽ pahte axpên jamaxpêr kôt axpên pumunh kêt tã Jejus kot mẽ pajamaxpêr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harênh o ixpa pê ã mẽ kãm ixujarênh anhỹr o ri ixpa.

Pawre kot hkwyjê mã kapêr

Rômãn 3.19-20

¹⁷ Nê ixpyrà nê mẽ apê Ijaew kwỳjaja na ka mẽ axtem nê Ijaew kêt xwýnhjê mã tanhmã amnhĩ to jarkrar o ri apa nê mẽ kãm:

—Nà mẽ ixpê Ijaew ri Tĩrtũm kapêr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarê. Nê ãm mẽ papxipixjaja na hte mẽ ixto hkra. ¹⁸ Nê mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nê mẽ kot amnhĩ to mex xà pumunh par nê mẽ kot amnhĩ tomnuj xà pumunh par. Mẽ apê Ijaew

kêt xwýnhjê rom mẽ ixte mẽmoj piitã omunh par kumrêx. Anê.

¹⁹⁻²⁰ Nê amnhĩ jarênh o:

—Nà te mẽ ixpê mẽ nohkre xwýnhjê pa hã mẽ hamýnh nê ri mẽ ho ixpa xwýnh pyræk. Jakamã Ijaew kêt xwýnh pê htýx ri mẽ pa xwýnhjaja na pa htem mẽ kãm Tĩrtũm kapêr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kênã.

²¹ Anhỹr ã amnhĩ jarênh nê mẽ ate kapêr o mẽ ahkre ho apa htã hkôt amnhĩ nhĩpêx kêt nê.

Nê mẽ ate mẽ kot axpên pê àhkĩnh nê mẽ hkurê htã no ãm mẽ kamjaja axpên pê axàhkĩnh o ri apa.

²² Nê mẽ amã sãnti hkĩnh kêt ã amnhĩ jarênh tã axtem nê hwýr agjê nê hpar pê kàxpore nhĩkwý xwýnh o axàhkĩnh o ri apa.

Nê mẽ kot axpên prô ho amnhĩkati nê mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

²³ Nê mẽ ate Tĩrtũm kapêr ã kagà mex o mex ã harênh tã hkôt amnhĩ nhĩpêx hkêt nê. Jakamã nhũm mẽ akwýjaja ja hã mẽ apumu nê mẽ apyrà nê Tĩrtũm ã hpijaàm kêt o pa.

²⁴ Tĩrtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot: Mẽ kêp Ijaew kêt xwýnhjaja na htem Ijaew kot htýx ri amnhĩ nhĩpêx o ri mẽ pa hã mẽ omu nê mẽ ý hã tanhmã Tĩrtũm o kapêr punuj to ho ri pa. Anê.

²⁵ Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp

měmy kwrýt kà jakà. Finat Mojes kot Tìrtùm nhỹ hã mẽ panhĩgêjtê mã hã karõ xà hkôt na pu htem ã mẽ hipêx anê. Mẽ pahte Tìrtùm mã mẽ pahkrajê nhõr ã amnhĩ to amnhĩrĩt kaxyw. Jakamã na pu htem arĩ Mojes kapêr kôt ã mẽ hipêx anê nhũm Tìrtùm kãm ja mex nê. Nom kot pu mẽ kapêr kwỳm ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwrýt kà jakàr kaprỳ. Na hte Tìrtùm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwrýt kà jakàrja nhũm kãm mex nê. ²⁶ Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwyjaja Tìrtùm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwrýt kà jakàr pyràk o amnhĩ nhĩpêx. Jakamã nhũm Tìrtùm ja hã mẽ omu nê mẽ kãm:

—Nà ãm hãmri. Mẽ ate amnhĩ my kwrýt kà jakàr kêt tã mẽ apê ixkra na ka mẽ. Anê.

²⁷ Mẽ kot amnhĩ jakàr kêt tã Tìrtùm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tãã.

No mẽ kajaja mẽ ate Tìrtùm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

²⁸ Nê kot ka mẽ atõ tanhmã amnhĩ to jarkrar to nê amnhĩ jarênh o:

—Nà ixpê Ijaew jakamã na hte Tirtûm mẽ kot inhmy kwryt kà krâhyr kôt ixto kraa. Anê.

Nom xà na hte Tirtûm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Nà htem ãm htỳx ã amnhĩ to jarkrar anhỹr kaprỳ ho pa.

²⁹ Nê Tirtûm Karõ kot mẽ hkarõ mã gjêx xwỳnhjaja kêp Tirtûm kra jakamã na htem Tirtûm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rỳ htỳx hamaxpêr o:

—Nà kot paj Mojes kapêr ã kagà hkôt amnhĩ nhĩpêx nhũm Tirtûm ja hã ixpumu nê amnhĩm inhmex ã ijarê nê ixto hkra.

Anhỹr o hamaxpêr kêt nê. Na htem hamaxpêr o:

—Nà ra Tirtûm Karõ kot ixkarôm àr jakamã ixpê hkra nhũm amnhĩm inhmex ã ijarê. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmri ixkwỳjaja amnhĩm inhmex kêt ã ijarê. Anê.

Kêr ka mẽ ã ajamaxpêr anhỹr o ri pa. ã mẽ hamaxpêr anhỹr na mex o mex.

3

¹ Nê măn ka mẽ ra tee ri tanhmã amnhĩ kukamã ajamaxpêr to nê ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêr hkêt nê? Mẽ kêp Ijaew kêt xwỳnhjaja kot amnhĩ jakàr kêt tã nhũm Tirtûm mẽ pahpyrà nê mẽ ho hkra. Anê.

Kwa mẽ ã ri ajamaxpêr anhỹr kêt nê. ² Mẽ pahpê Ijaew na pre Tirtûm Ijaew kêt xwỳnhjê rom mẽ pahto mex rax nê. Na pre amnepê mã mẽ

panhîgêt mã tanhmã kapêr to. Mẽ pahpiitã mẽ pahte mar nẽ hkôt amnhĩ nhîpêx kaxyw. Nom Ijaew kêt xwýnhjê nhîgêt mã ã kapêr anhÿr kêt nẽ. ãm mẽ pahpê Ijaew nhîgêt pix mã kapêr. Jakamã mẽ pahpê Ijaew mã ja mex kumrêx. ³ Nom kot kaj mẽ atõ ja ma nẽ ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhîgêt kwýjaja hkôt amnhĩ nhîpêx kêt nẽ. Na xep prem kapêr kwým ri amnhĩ tomnuj o pa. Jakamã ko. Koja Tĩrtũm mẽ ixpê mẽ hkanrêhã mẽ htãmnhwýjaja tanhmã mẽ ixto mex to japêr ko. Anẽ.

⁴ Kwa mẽ ri ã ajamaxpêr anhÿr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahtã amnhĩ jarênh to xà hkôt koja ã mẽ pahto mex anẽ. Kapêr ã kagà htũm kot mênhõ tanhmã Tĩrtũm mã kapêr to nẽ harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhîpêx o ri apa. Jakamã na htem ãm axpên mã axêx ã akapêr ã ajarênh kaprý. Anhÿr o harê.

⁵ No kot ka mẽ atõ atýx ajamaxpêr nẽ ajamaxpêr o:

—Xà koja Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà koja gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwýnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã măn kot tãm amnhĩ nhîpêx xwýnh ã harê. Hãmri nhũm Tĩrtũm amnhĩ tã ixpumu nẽ tanhmã ixto hkêt nẽ. Koja tanhmã

ixto japêr hāmri nê ixpyrà nê amnhĩ tomnuj nê. Anê.

Kot kaj mẽ ã ajamaxpêr anê nê ãm amnhĩ krã hkôt ã ajamaxpêr anhỹr kaprỹ. Nom ã ajamaxpêr anhỹrja Tĩrtũm jamaxpêr kôt kêt. ⁶ Kwa mẽ ri ã ajamaxpêr punuj anhỹr kêt nê. Tĩrtũm kot mẽ pahpyrà nê aa kot amnhĩ tomnujre hã. Kop ãm mẽ pahpyrà nê tanhmã kot amnhĩ tomnuj to ronhỹx tanhmã kot we amnhĩ to nê mẽ pahte amnhĩ tomnuj xwỹnh ã mẽ pajarê? Nhỹx mẽ pahpyrà nê ã amnhĩ jarênh anê. Nà ã mẽ ajamaxpêr anhỹrja mex kêt.

⁷⁻⁸ E pa ixprĩ hã mẽ amã ja jarê ka mẽ inhma. Kot kaj mẽ atõ amnhĩ kukamã ajamaxpêr o:

—E kot paj mãmri ri mẽmoj tã ixêx o ri ixpa kê mẽ ixêx nhi hã ixpumu nê ixrom Tĩrtũm pix mã măn kot amnhĩ to mex ã harê. Nê ãm pix mã măn hêx kêt xwỹnh ã harê. Hāmri nhũm Tĩrtũm amnhĩ tã ixpumu nê mẽ ã mẽ kot harênh anhỹrja ma nhũm ja kãm mex nê nhũm hkĩnh nê. Jakamã ixêx o ri ixpaja ã tanhmã ixto hkêt nê. Ra mẽ kot ixrom tãm kot amnhĩ nhĩpêx o pa xwỹnh ã harênh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nê. Kêr kê mẽ ja hã ixpumu nê ixrom Tĩrtũm tapxipix kot amnhĩ to mex xwỹnh ã harê.

Anhỹr o ajamaxpêr nom mẽ ajamaxpêrja kot anhỹr kêt. Na hte akwỹjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt nê. ã mẽ ajamaxpêr anhỹr o ri apa xwỹnhjaja koja Tĩrtũm mẽ atomnuj tỳx nê kãm ga.

*Mê mẽ pahte amnhĩ tomnuj xwỳnh ã mẽ pajarēnh
Wam Korīt 6.9; Karatas 3.22; Xitre 3.3*

⁹ Tã tanhmã kot puj mẽ pahpê Ijaew amnhĩ jarēnh to? Xà kot pu mẽ pahte amnhĩ to mex o Ijaew kêt xwỳnhjê jakrenh ã amnhĩ jarē? Nà mẽ pahte ã amnhĩ nhĩpêx anhyỹre hã. Mẽ pahpê Ijaew nẽ Ijaew kêt xwỳnhjaja. Mẽ pahpiitã mẽ pahte amnhĩ tomnuj o axpēn pyrāk. Na pa pre ra mẽ amã ja jarē. ¹⁰ Tĩrtũm kapēr ã kagà htũm kot ja jarēnh kot:

Mẽhõ na we aa kot amnhĩ tomnuj kêt kumrêx nẽ pa?

¹¹ Nẽ mẽhõ na we kot mẽmoj mex piitã omunh par? Nẽ mẽhõ na kãm Tĩrtũm prãm?

¹² Nà amrakati kumrêx. Na mẽ ra piitã hkaga hpa. Nẽ kapēr kwỳm ri tanhmã amnhĩ tomnuj to ho pa. ãm mẽhõ pyxire nẽ amnhĩ to mex o ri pa hkêt kumrêx.

¹³ Na htem kapēr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyrāk.

Na htem ãm ri hêx pix kukamã ri hamaxpēr o pa. Tanhmã mẽ hêx to xàja te kêp kagã xoprê nhõ wenēn xihtỳx pyrāk.

¹⁴ Nẽ na htem mẽ piitã mẽmoj nhĩxi ho ri axpēn mã mẽ hixi jarēnh o pa. Nẽ ri tanhmã axpēn japry hto ho pa.

¹⁵ Nẽ tanhmã kapēr mã gêt kãm mẽ kãm kapēr to.

¹⁶ Nẽ tanhmã mẽ hkwyjê homnuj to. Jakamã nhũm mẽ piitã ri hkaprĩ nẽ mex kêt nẽ pa.

¹⁷ Nhũm htem ãm axpēn mã mẽ gryk xà pix o kapēr o pa.

18 Nê Tĩrtũm ã hpijaàm kêt o pa. Na htem kapêr ma nê ãm kuma nê kãm hkĩnh kêt o pa.

Ã na htem amnhĩ nhĩpêx anhỹr rãhã ho pa. Anê.

Ã Tĩrtũm kapêr ã kagà htũm kot mẽ pajarênh anhỹr.

19 Mẽ pahpê Ijaew ra mẽ pahte ja jarênh mar tỳx. Tĩrtũm kapêr ã kagà htũm kwỳ na. Na hte ã mẽ kot amnhĩ tomnuj xwỳnhjê jarênh anê. Nê mãănên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papapxipix hkêt. Krĩ piitã hkôt ri mẽ pa xwỳnhjaja nhũm ã mẽ harênh kot anhỹr. Ijaew kêt xwỳnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwỳnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhỹr kaprỳ. Jakamã koja Tĩrtũm mẽ pahpiitã mẽ pahte amnhĩ tomnuj mỳrapê tanhmã mẽ panhĩpêx to. 20 Mẽ pahtô koja mẽ pahte kapêr kôt pix mã amnhĩ nhĩpêx o papa hã mẽ pajarê? Nê mẽ pahtô mã koja mẽ pamã kapêr nê mẽ pamã:

—Nà na ka hte akatàt kôt ixkapêr kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhỹr o apa.

Anhỹr o mẽ pahtô mã kot we ã kapêr anê? Nà aa kot mẽ pahtô mã kapêr anhỹr kêt. Na pu htem ãm kapêr ma nê tee ri amnhĩ kukamã pajamxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapêr ã kagà htũmja gô. Mẽ pahtô mẽ pahte kapêr ã kagà hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwỳnh ã mẽ pajarê.

*Tanhmã Tĩrtũm kot mẽ pahto hkra to hã harênh
Atre 17.30-31; Karatas 2.16-21; Piripos 3.7-9;*

Xitre 3.5; Xiakre 2.10

²¹ Nê na hte Tîrtûm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhỹr xwýnhhta na pre ra mẽ pamã ho amnhĩrît. Amnepêm Tîrtûm kapêr ã kagà htûm kamã na pre mẽhõ hkukamã tanhmã harênh to. Nê Tîrtûm nhỹ hã mẽ kapêr jarênh o pa xwýnhjaja haxwýja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhĩ xunhwý nê amnhĩ kaxyw kãm pajamaxpêr rãhã ho papa nhũm Tîrtûm ja pix ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarê. Mẽ kot Jejus kôt amnhĩ xunhwýr xwýnh pi-itãã. Mẽ ixpê Ijaew nê mẽ apê Ijaew kêt xwýnhjaja. Mẽ pahpiitã mẽ pahte axpên pyræk jakamã kot puj mẽ pahtõ Jejus kôt amnhĩ xãm nhũm Tîrtûm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrà nê amnhĩ to mex o pa. Anê.

²³ No mẽ pahtõ na mẽ pahte Tîrtûm mẽ Jejus wa uræk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã. ²⁴ Tã Tîrtûm kot mẽmoj tã mẽ pakutã nojarêt rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarênh o pa. Mẽ pahte Jejus kôt

amnhî xunhwÿr xwÿnh piitãã nhũm ã mẽ pajarênh anê. Ra Jejus kot htyk o mẽ pahte amnhî tomnuj piitã hpãnhã amnhîrer par jakamã na hte Tĩrtũm Jejus kukwak ri amarĩ mẽ pahte amnhî to mex xwÿnhjê hã mẽ pajarê. Te mẽ pahte amnhî tomnuj kêt kumrêx pyræk mẽ pajarê. ²⁵⁻²⁶ Na pre mẽ pahwÿr Jejus mẽ nhũm mẽ pahwÿr wrÿ nê mẽ panê ty nê htyk o mẽ pahte amnhî tomnuj piitã hpãnhã amnhîrer pa. Jakamã kot pu mẽ pahtô amnhî kaxyw hkôt pajamexpêr nhũm Tĩrtũm ja hã mẽ pahpumu nê Kra kukwak ri amnhî katut kôt mẽ pahte amnhî tomnuj piitã rênh pa. Jao te aa mẽ pahte amnhî tomnuj kêt kumrêx pyræk ã mẽ pahpumu.

No kêt amnepêm kormã Jejus wrÿk nê mẽ panê htyk kêt ri mẽ pa xwÿnhjaja. Tanhmã na pre Tĩrtũm mẽ kot hkôt amnhî xunhwÿr xwÿnhjê nhĩpêx to? Kormã Jejus mẽ panê htyk kêt ri mẽ pa xwÿnhjaja tanhmã na pre mẽ hipêx to? Nà na pre mẽ hkwyjaja amnhî kaxyw Tĩrtũm kôt hamexpêr nê hkôt amnhî xunhwÿ nhũm amnhî tã mẽ omu nê amnhĩm mẽ harênh o:

—Nà ãm hãmri. Kojã nhÿrmã Ixkra ma mẽ hwÿr wrÿ nê mẽ nê ty nê htyk o mẽ kot amnhî tomnuj pãnhã amnhîrer pa. Jakamã kojã mẽ tãmjaja amnhî tomnuj pãnhã amnhîrer kêt nê. Anê.

Tã nhũm Jejus tãm mẽ pahwÿr wrÿ nê mẽ pah-piitã mẽ panê ty. Jakamã nhũm Tĩrtũm ra mẽ pahte hkôt amnhî xunhwÿr xwÿnhjaja Kra kukwak ri amnhî katut kôt mẽ pahte amnhî tomnuj piitã rênh pa. No na hte amarĩ ã mẽ panhĩpêx anhÿr kêt nê. ãm Jejus tyk pix kukwak ri na hte ã mẽ

panhîpêx anê. Âm hāmri na hte ã mẽ panhîpêx mex anê. Na hte tām mẽ panhîpêx rāhã ho pa. ²⁷ Jakamã kot puj mẽ ã pajamaxpêr anê nê pajamaxpêr o:

—Nà na pa hte amnhĩ to mex rāhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nê. Koja mēhō ã hamaxpêr anê nê ãm amnhĩ jarēnh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarēnh kêt nê. Mẽ pahte amnhĩ to mex rāhāre hã. Nom na pu htem amnhĩ kaxyw Jesus mã pajamaxpêr nê hkôt amnhĩ xunhwý nhũm ja hã mẽ pahpumu nê rĩ kormã amnhĩm mẽ pamex ã mẽ pajarê.

²⁸ E pa axte tanhmã mẽ amã ja jarēnh to ka mẽ aprĩ hã inhma. Měmoj pumunh kôt na hte Tĩrtũm mẽ pahte amnhĩ to mex xwýnh ã mẽ pajarēnh wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarēnh anhỹr kêt nê. Mẽ pahte hkôt amnhĩ nhĩpêx rāhã ho papare hã. Âm mẽ pahte amnhĩ kaxyw Kra Jesus kôt pajamaxpêr nê hkôt amnhĩ xunhwýr ã mẽ pahpumunh kôt pix mã na hte mẽ pahte amnhĩ to mex xwýnh ã mẽ pajarê. Ja pix ã mẽ pahpumunh kôt na hte ã mẽ pajarēnh anê.

²⁹ Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nê mãănên kêp mẽ apê Ijaew kêt xwýnhjê nhõ Tĩrtũm.

³⁰ Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhîpêx o axpên pyrāk. Jakamã

na hte mẽ kot amnhĩ kaxyw Jejus kôt hamaxpêr o mẽ pa xwỳnhjê pumu nẽ mẽ kot amnhĩ to mex xwỳnh ã mẽ harê. Mẽ ixpê Ijaew nẽ mãân nẽ mẽ apê Ijaew kêt xwỳnhjaja.

³¹ Tã koja mễhỗ htỳx hamaxpêr o:

—Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nẽ. Kot paj âm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhỹr o ajamaxpêr japêr. Kwa mẽ ã ri ajamaxpêr anhỹr kêt nẽ. Na htem amnhĩ kaxyw Jejus kôt hamaxpêr hãmri nẽ kãm hkôt amnhĩ nhĩpêx prãm rãhã nẽ pa ho pa.

4

*Apraãw kot amnhĩ kaxyw Tĩrtũm kôt hamaxpêr
Karatas 3.6-18; Xiakre 2.23*

¹ Nẽ mẽ panhigêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nẽ kot amnhĩ to mex xwỳnh ã harê? ² Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhỹr ronhỹx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ. ³ Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapêr ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpěr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ. Anẽ.

⁴ Mẽ õ patrãwjaja na htem kãm mẽ àpênh xwýnhjaja àpênh mex ã mẽ omunh xà hkôt mẽ kãm amnhĩre.

⁵ No Tĩrtũm na hte ã mẽ panhĩpêx anhỹr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nẽ. ãm mẽ pahte amnhĩ kaxyw Kra Jejus kôt pajamaxpěr nẽ hkôt amnhĩ xunhwýr ã mẽ pahpumunh kôt pix mã na hte amnhĩm ã mẽ pajarênh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamaxpěr xwýnh pixjaja na hte ã mẽ pajarênh anẽ.

⁶ Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kôt mẽ apumunh kôt na pa ã mẽ ajarênh anhỹr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpěr nẽ wa ixkôt amnhĩ xunhwýr ã mẽ apumunh kôt na pa hte ã mẽ ajarênh anẽ. Anẽ.

Pu mẽ ã kot pamã kapěr anhỹr ã amnhĩ tã kuma nẽ pahkĩnh nẽ. Pahi finat Tawi na pre haxwýja ja jarênh o:

⁷ Na hte Tĩrtũm amnhĩ katut kôt mẽ pahte amnhĩ tomnuj piitã rênh pa nẽ axte kãm hamaxpěr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸ Nẽ amnhĩ kukamã pajamaxpěr o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hămri nê amnhĩ to Tĩrtũm wỳ nhũm inhma nê
ixte amnhĩ tomnuj o hapêx pa nê axte kãm
hamaxpêr kêt nê.

Nà âm hămri. Ja mex kumrêx.” Anê.

⁹ Tã mẽ kot ja hã amnhĩ pumunh nê hkĩnh
xwỳnhjaja mẽmojaja na mẽ? Xà mẽ kot amnhĩ my
kwỳt kà jakàr xwỳnh pix kwỳjaja na pre pahi Taw-
ija ã mẽ harênh anê nà? Nà mẽ tapxipixjaja kêt.
Măănên mẽ kot amnhĩ jakàr kêt xwỳnh kwỳjaja.
Tanhmă na pre ra Tĩrtũm kapêr ã kagà htũm kot
finat Apraăw jarênh to? Na pre harênh o:

Na pre Apraăw amnhĩ kaxyw Tĩrtũm kôt
hamaxpêr nê hkôt amnhĩ xãm nhũm amnhĩ
tã omu nê amnhĩm mex ã harê. Anê.

¹⁰ Xà Apraăw ra kot amnhĩ my kwỳt kà krăhyr
nhĩrô pê na pre Tĩrtũm amnhĩm mex ã harê? Nà
kormă kot amnhĩ krăhyr kêt ri na pre ã harênh
anê. ¹¹ Kormă kot amnhĩ krăhyr kêt ri kãm kapêr
nê kãm:

—E ate amnhĩ kaxyw inhmă ajamaxpêr nê ixkôt
amnhĩ xãm ã ixte apumunh kôt na pa amnhĩm
amex ã ajarê.

Anhỹr o kãm kapêr hămri nê rĩ kormă kãm
tanhmă amnhĩ krăhyr to hã kãm karô nhũm kuma
nê mar xà hkôt amnhĩ my kwỳt kà hkwỳ krăhta.
Kot Tĩrtũm mă amnhĩ nhôr ã amnhĩ to amnhĩrĩt
kaxyw ã amnhĩ nhĩpêx anê.

Nom kormă amnhĩ krăhyr kêt ri na pre Tĩrtũm
amnhĩm mex ã harê. Tã Ijaew kêt xwỳnhjaja kot
amnhĩ jakàr kêt tã mẽ hkwỳjaja Apraăw pyrà nê
amnhĩ kaxyw Tĩrtũm mă hamaxpêr nê kãm amnhĩ
nhôr jakamă Apraăw te kêp mẽ hpàr krax maati
pyràk. ¹² Nê măănên mẽ pahpê Ijaew. Kot puj mẽ

pahtõ amnhĩ kaxyw Tĩrtũm kôt pajamaxpěr nhũm amnhĩ tã mẽ pahpumu nẽ mẽ pamex ã mẽ pajarẽ. No ãm mẽ pahte amnhĩ jakàr ã mẽ pahpumunh kôt ã mẽ pajarẽnh anhỹr kêt nẽ. ãm Apraãw pyrà nẽ amnhĩ kaxyw Tĩrtũm kôt pajamaxpěr pix ã mẽ pahpumunh kôt na hte mẽ pamex ã mẽ pajarẽ. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpěr jakamã kęp mẽ pahpê Ijaew mẽ pahte uràk nẽ amnhĩ kaxyw Tĩrtũm mã pajamaxpěr xwýnhjê hpàr krax maati. Ijaew kêt xwýnhjê pyrà nẽ kęp mẽ pahpàr krax maati.

Tĩrtũm kot Apraãw mã mẽmoj mex jarẽnh

Karatas 3.22

¹³ Amnepêm na pre Tĩrtũm Apraãw mã tanhmã kapěr to nẽ kãm:

—E koja nhỹrmã akanrẽhã akra nẽ atàmnhwýjaja amýrpê apyrà nẽ krĩ piitã hkôt mẽ kęp mẽ õ pahi. Anẽ.

Tã tanhmã Apraãw kot amnhĩ nhĩpêx to hã omunh xà hkôt na pre ã kãm kapěr anẽ? Xà kot kãm tanhmã amnhĩ nhĩpêx to hã karõ nhũm kot hkôt amnhĩ nhĩpêx mex ã omunh xà hkôt na pre hkĩnh nẽ ã kãm kapěr anẽ? Nà kot anhỹr kêt. Mẽ pahtõ kot pu we Tĩrtũm kapěr xà hkôt pix mã amnhĩ nhĩpêx mex rãhã ho ri papa? Mẽ pahpê hihtýx kênã. ãm kot amnhĩ kaxyw Tĩrtũm kôt hamaxpěr nhũm kot amnhĩ tã omunh nẽ amnhĩm mex ã harẽnh kôt pix mã na pre ã kãm kapěr anẽ.

¹⁴ Kop apu kot kãm tanhmã kapěr to nẽ kãm:

—E Apraãw. Kot kaj ixkapěr piitã ama nẽ hkôt amnhĩ nhĩpêx mex rãhã ho ri apa. Hã koja nhỹrmã

akanrêhã akra nê atâmnhwýjaja kêp krĩ piitã hkôt mẽo pahiti.

Anhỹr o kãm kapêr ronhỹx ãm kãm ã kapêr anhỹr kaprý. Apraãw aa kot kapêr piitã hkôt amnhĩ nhĩpêx mex o pare hã. Kop apu ã kãm kapêr anhỹr ronhỹx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kôt amnhĩ xãm tã tanhmã kot pa amnhĩ to nê kapêr piitã hkôt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhỹr o ixpa hprãm kaprý. Jakamã koja nhỹrmã ixkanrêhã ixkra nê ixtâmnhwýjaja kêp mẽ õ pahi hkêt nê pa. Hêxta waa nê. ¹⁵ Koja Tĩrtũm ixte kapêr kwým ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkôt amnhĩ nhĩpêx mex rãhã ho pa? Nã amrakati kumrêx.

Anhỹr o nhỹx pre hamaxpêr. ¹⁶ No na pre Tĩrtũm ã kãm kapêr anhỹr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkôt ajamaxpêr nê ixkôt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarênh o amnhĩ to hêx kêt nê. Na hte mẽmoj tã amnhĩ jarênh xà hkôt tanhmã mẽmoj nhĩpêx to ho ri pa. Jakamã koja mẽ pahte Apraãw pyrã nê amnhĩ kaxyw hkôt pajamaxpêr xwýnh piitã mẽ pahto mex nê.

Nê xà na pre ã mẽ pamã kapêr anê nê mẽ pamã:

—E kot kaj mẽ ixkapêr kôt pix mã ri amnhĩ nhĩpêx o ri apa hã kot paj mẽ ato mex rax nê.

Anhỹr o mẽ pamã kapêr? Nã na pre ã mẽ pamã kapêr anhỹr kêt nê. Na pre mẽ pamã:

—Kot kaj mẽ finat Apraãw pyrà nẽ amnhĩ kaxyw ixkôt ajamaxpěr nẽ ixkôt amnhĩ xunhwỳ hã kot paj mẽ ato mex nẽ.

Anhỹr o mẽ pamã kapěr. Tã Apraãw kumrẽx kot mẽ pakukamã amnhĩ kaxyw hkôt hamaxpěr jakamã te kệp mẽ pahpiitã mẽ pahte uràk nẽ ã amnhĩ nhĩpêx anhỹr xwỳnhjê pàr krax maati pyràk.

¹⁷ Amnepêm na pre Tĩrtũm tanhmã Apraãw mã kapěr to. Kot tanhmã kãm kapěr toja Tĩrtũm kapěr ã kagà htũm kamã na. Na pre kãm:

Kot kaj apê ahpỹnhã ri mẽ urojê hpàr krax. Anẽ. Kormã Apraãw kra hkêt tã nhũm hkra hkukamã ã kãm kapěr anẽ. Hãmri nhũm kuma nẽ hkôt hamaxpěr kurê kumrẽx nẽ hamaxpěr o:

—Hêxta waa nẽ. Ra ixprô mẽ wa ijamẽ wa ixpigêt tỳx nẽ wa ixkra hkêt kumrẽx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtàmnhwỳjê hkukamã ã inhmã mẽ harênh anhỹr kênã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkrajã tanhmã amnhĩ to nẽ ixpê htyk japêr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrêhã ixtàmnhwỳ xohtô jarênh kênã. Anẽ.

¹⁸⁻¹⁹ Na pre ra hpigêt tỳx nẽ. Ra hã amgrà pê 100 nẽ hkurê kêt nẽ pa. Nhũm hprô mãânên hpigêx tỳx nẽ. Nẽ ôhy kamã hkra hkêt kumrẽx. Kormã wa hkra hkêt tã nhũm Tĩrtũm Apraãw mã hkra nẽ htàmnhwỳ xohtô hã harê. Nẽ kệp mẽ urojê xohtôjê pàr krax ã kãm harê. Hãmri nhũm kuma nẽ amnhĩ kaxyw hkôt hamaxpěr tỳx kurê kumrẽx. ²⁰ Nẽ ã amnhĩ nhĩpêx anhỹr rãhã ho pa. Na pre war amnhĩ

kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tĩrtũm tãm kot wa kãm wa hkra jarênh pix mã hamaxpêr pê amnhĩ kaxyw kãm hamaxpêr tỳx o ri wa pa. Nê hamaxpêr o:

—Nà ra wa ixpigêt tỳx kumrêx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hêxta waa nê. ãm hãmri Tĩrtũmja mex o mex.
²¹ Nà kot wa inhmã wa ixkra jarênh xà hkôt koja wa inhmã kugõ. Ja kaxyw àhpumunh o àhpumunh. Tĩrtũmja hêx kêt. Anê.

²² Hãmri nhũm Tĩrtũm ã hamaxpêr anhỹr ã omu nê amnhĩm mex ã harê. Nê kot kãm amnhĩ jarênh xà hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mẽ pahtõ uràk nê amnhĩ kaxyw hkôt pajamaxpêr nhũm amnhĩ tã mẽ pahpumu nê ra kot Apraãw jarênhhta pyrà nê amnhĩm mẽ pamex ã mẽ pajarê. Na pre mẽ panhõ Pahihti Jejus ty nhũm Tĩrtũm akupỹm ho htĩr. Tã mẽ papajaja na pu prem amnhĩ kaxyw Jejus kôt pajamaxpêr nhũm Tĩrtũm ja hã mẽ pahpumunh kôt mẽ pahte amnhĩ to mex xwỳnh ã mẽ pajarê.
²⁵ Na pre mẽ pahwỳr Kra Jejus mẽ nhũm mẽ pahwỳr wrỳ. Tã nhũm mẽ axtem nê kupĩ nom nhũm amarĩ htyk kêt nê. Na pre htyk o mẽ pahte amnhĩ tomnuj pãnhã amnhĩrer pa. Ja kaxyw na pre Tĩrtũm mẽ pahwỳr kumê. Jakamã nhũm prem kupĩ nhũm akupỹm ho htĩr. Tã mẽmo kaxyw na pre Tĩrtũm ã mẽ pahwỳr Kraja mênh nhũm mẽ panê htyk anê nhũm akupỹm ho htĩr? ãm kot kukwak ri amnhĩm mẽ pahte amnhĩ kaxyw hkôt pajamaxpêr

xwÿnhjaja mẽ pahte amnhĩ to mex xwÿnh ã mẽ pajarênh pix kaxyw.

5

Tĩrtũm kot mẽ pahto hkwỳ hã harênh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

¹ Nẽ na pu prem amnhĩ tomnuj o ri papa nhũm Tĩrtũm ja hã mẽ pahpumu nhũm ja kêp omnuj nẽ. Jakamã nhũm Jejus amnhĩ grônh kôt wrỳ nẽ mẽ panê ty. Nhũm Tĩrtũm htykja kukwak ri mẽ pahto hkwỳ. Mẽ pahte amnhĩ kaxyw hkôt pajamaxpêr nẽ hkôt amnhĩ xunhwỳr ã mẽ pahpumu hãmri nẽ ã mẽ panhĩpêx anê pu mẽ ra pahpê hkwỳ hã papa.

² Na pre Jejus Tĩrtũm mã mẽ pajarênh o:

—Ê jajê pumu. Na mẽ ra amnhĩ kaxyw pamã hamaxpêr nẽ pahkôt amnhĩ xunhwỳ. Anê.

Hãmri nhũm kuma nẽ mẽ pahto mex nẽ mẽ pakutã nojarêr rãhã ho pa. Tã kot puj mẽ pahpê hkrajaja nhỹrmã pano ho Tĩrtũm mex o mex xwÿnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nẽ papa nẽ pajamaxpêr o:

—Hêxta waa nẽ. Kot paj nhỹrmã inhno ho Tĩrtũm mex o mex ã omu nẽ kuri ixa ho ixa. Nà ãm hãmri. Inhmã omunh prãm tỳx kumrêx. Anê.

³⁻⁴ Nẽ na htem Jejus ã mẽ pahtomnuj nẽ pu mẽ pahpunuj nẽ ri papa. Pamex kêt nẽ tã tee ri amnhĩ kukamã pajamaxpêr o ri pahkaprĩ nẽ papa hkêt nẽ. Kwār mẽ mãmri ã mẽ panhĩpêx anê. Pu mẽ pahpunuj kurê Jejus kôt amnhĩ xunhwỳr tỳx o kormã mō. Nẽ mẽ umaj hkaga hkêt nẽ. Arĩ amnhĩ wỳr kamã pajamak o papa. Jao amnhĩ kaxyw

kumã pix mã kãm pajamaxpêr tỳx rãhã pahkĩnh nê ri papa.

Kot puj mẽ ã amnhĩ nhĩpêx anhỹr o ri papa nhũm Tĩrtũm ja hã mẽ pahpumu nhũm ja kãm mex nê. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkôt pajamaxpêr tỳx rãhã nê.

⁵ Nê ra mẽ kot Jejus ã tanhmã mẽ panhĩpêx to htã pu mẽ amnhĩ kaxyw tee ri kãm pajamaxpêr kaprỳ hkêt nê. Ra kot mẽ pamã amnhĩ Karô nhõr nhũm kot mẽ pahkarô mã gjêx kênã kot pu kêt mẽ ri tee ri amnhĩ kaxyw kãm pajamaxpêr kaprỳ. Na hte Karôja mẽ pahkarô kamã mẽ pamã Tĩrtũm kapêr jarênh o amnhĩrĩt nê kãm mẽ pajapê htỳx ã harênh o amnhĩrĩt rãhã nê.

⁶ Amnepê mã na pre mẽ piitã amnhĩ tomnuj o ri pa nê tee ri kãm amnhĩ to mex rãhã hprãm kaprỳ. Mẽhõ kot we ja kaxyw tanhmã mẽ hkrã hto? Jakamã nhũm Tĩrtũm ja hã mẽ omu hãmri nê mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwỳr wrỳ. Ixte mẽ nê atyk kaxyw agrôn timer kôt mẽ hwỳr amênh jakamã kot kaj wrỳ nê mẽ kãm ixkapêr jarênh o ri mẽ hkôt apa. Rãhã nhũm mẽ hkwỳjaja apĩ ka mẽ piitã mẽ nê ty. Anê.

Hãmri nhũm kuma nê kãm:

—Tôe. Nà kot paj amã hprãm xà hkôt ã amnhĩ nhĩpêx anê. Anê.

Hãmri nê man amnhĩ grôn timer kôt mẽ pahwỳr wrỳ.

⁷⁻⁸ Xà koja mẽhõ kãm axpên japê xà axpên nê ty nà? Xà kot mẽhõ tãm kot amnhĩ nhĩpêx xwỳnh tã nhũm mẽ kot hpĩr kaxyw nhũm hkràmnhwỳja kãm

hapê nê. Nê nê amnhĩ grônh kôt mẽ kãm xa nhũm mẽ kupĩ nhũm nê ty? Nà kot apu nê htyk japêr ko. No mẽ papajaja. Na pu htem mēhō hkràmnhwỳta kĩnhã arĩ amnhĩ tomnuj rāhã ho ri papa htā nhũm Tĩrtũmja arĩ kãm mẽ pajapê nê. Nê kãm mẽ pajapê xàj mẽ pahwỳr Kris mẽ nhũm mẽ panê ty. Arĩ mẽ pahte amnhĩ tomnuj rāhã ho papa tãã. Na pre ã Tĩrtũmja kãm mẽ pajapê hã ã mẽ pahwỳr mēnh anê. ⁹ Na pre ty nhũm hkamrô hkwỳ axkapĩ nhũm Tĩrtũm ja hã omunh xà hkôt tām amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htyx kamã hamak tũm xàta wỳr mẽ parēnh kêt nê. Mẽ pahpê hkwỳ kēnã kot kêt hwỳr mẽ parē.

¹⁰ Nom kormã mẽ pahpê hkwỳ hkêt ri na pu prem te ra kutã amnhĩ xunhwỳr pyrāk o amnhĩ nhĩpêx. Tã nhũm Kra mẽ panê ty pu mẽ hkôt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nê ra akupỹm Kra ho htĩr jakamã kot puj mẽ pahte hkôt amnhĩ xunhwỳr xwỳnhjaja nhỹrmã wa urāk nê wa kuri pahtĩr tũm nê pamek kumrêx nê papa ho papa.

¹¹ Nê mẽ pahpê kuwy rax wỳr mẽ papa mã xwỳnh kêt jakamã na pu htem pahkĩnh nê pajamakêtkati nê ri papa. Nom ja pix ã na pu htem ã amnhĩ nhĩpêx anhỹr kêt nê. Mẽ pahpê Tĩrtũm kràmnhwỳ jakamã na pu htem mãānēn pahkĩnh nê ri papa. Pahihti Jejus Kris kot mẽ panê htyk ã omunh xà hkôt na pre Tĩrtũm mẽ pahte hkôt amnhĩ xunhwỳr xwỳnhjê ho hkwỳ jakamã na pu htem pahkĩnh nê pajamakêtkati nê ri papa.

*Atãw mẽ Kris wa harēnh
Wam Korīt 15.20-22, 45-49*

12-13 Nē amnepēm na pre Tĩrtũm finat Mojes mã tanhmã kapēr to. Hãmri nhũm kuma nē Ijaew kot tanhmã amnhĩ nhĩpêx to ho pa kaxyw mẽ kãm mēmojta ã karõ nē mẽ kãm hã hkagà. Mē kot kamã harēnh nē mar nē Tĩrtũm kôt amnhĩ nhĩpêx kaxyw. Hãmri nhũm mẽ tee ri ã kot mẽ kãm mēmoj tã karõja ma nē tanhmã axpẽn mã kapēr to nē axpẽn mã:

—Kwa na pu htem ã amnhĩ nhĩpêx anhỹr kêt nē. Na pu htem ãm amnhĩ tomnuj tỳx kumrêx o ri papa nē amnhĩ to mex kêt kumrêx. Anē.

Ãm hãmri na prem ã amnhĩ jarēnh anē. Mē pahpiitã mẽ pahte amnhĩ tomnuj xwỳnh kênã. My kot wa pê finat Atãwja kumrêx na pre tanhmã mẽ pahte amnhĩ tomnuj to ho hkrax. Mýrapê na pre htĩr tũm nē ri pa ho pa hkêt nē. Na pre ri pa nē gaa nē rĩ hpigêt tỳx nē ty. Tã mýr pê ri mẽ papa xwỳnhjaja na pu htem uràk nē tanhmã amnhĩ tomnuj to ho ri papa. Mýrapê na pu htem ri papa nē gaa nē Atãw pyrà nē pahtyk pa. Tĩrtũm kot mẽ pahtã Atãw mã kapēr xà hkôt. ¹⁴⁻¹⁹ Jakamã na prem kormã Mojes kator xwỳj ri pika piitã hkôt ri pa nē gaa nē haxwỳja htyk pa. Mē kot amnhĩ tomnuj mýrapê ty. Atãw pyrà nē Tĩrtũm kot mēmo xô nē hkurê xwỳnhhta krêr kêt tã uràk nē tanhmã amnhĩ tomnuj to ho ri pa. Hãmri nē mýrapê ty.

Na pre ã Atãwja mẽ pahpiitã mẽ pamã Tĩrtũm kapēr nhĩrôp ãm nē amnhĩ tomnuj o hkrax anē nē mēmo xôta krê. Jao te mẽ pahpiitã mẽ pahte uràk nē kumẽ hkur pyràk o mẽ panhĩpêx. Mýrapê nhũm htem arĩ pika piitã hkôt hapôj nē kormã hprĩre htã ra Atãw pyrà nē tanhmã amnhĩ tomnuj

to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkôt mẽ pakukamã hamaxpěr o:

—Nà koja mẽ Atãw pyrà nẽ amnhĩ tomnuj o ri pa. Mýrapê kot paj ma mẽ kot amnhĩ xà htýx kamã hamak tũm xàta wýr mẽ rẽn pa. Anẽ.

Tã Jejus Kris mẽ Atãw wa harẽnha kot axpẽn pyràk jakamã na hte Atãw kanrẽhã hkra nẽ htãmnhwýjaja Atãw kot amnhĩ nhĩpêx kôt amnhĩ nhĩpêx o ri pa rãhã nẽ. Uràk nẽ amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwýr xwýnhaja Jejus kôt amnhĩ nhĩpêx rãhã ho ri pa. Te mẽ kęp hkanrẽhã hkra nẽ htãmnhwýjê pyrà nẽ uràk nẽ tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ pahte amnhĩ tomnuj pãnhã amnhĩrer par kaxyw mẽ panê ty. Jakamã mẽ pahte hkôt amnhĩ xunhwýr xwýnhaja na hte Tĩrtũm ja hã mẽ pah-pumunh kôt mẽ pahto hkra. Kot puj mẽ nhýrmã pahtyk tã nhũm akupým mẽ pahto mẽ pahtír pu mẽ wa kuri pahtír tũm nẽ papa ho papa.

Atãw kot Tĩrtũm kapěr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Nom nhũm Jejus Atãw rom kot Tĩrtũm kapěr mar nẽ hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwýr xwýnhaja amnhĩm mẽ pahte amnhĩ to mex xwýnh ã mẽ pajarê.

Nhũm Atãw kot Jejus kĩnhã Tĩrtũm kapěr nhĩrôp ãm mýrapê na hte mýr pẽ mẽ pa xwýnhaja ohtô nẽ pa nẽ gaa nẽ Atãw pyrà nẽ htyk pa. Hãmri nẽ kormã htír ri amnhĩ to mex o pa hkêt mýrapê ma mẽ kot amnhĩ xà htýx kamã hamak tũm xàta wýr ma

hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukapĩrĩ nẽ. Jakamã na pre mẽ pahwỳr Jejus mẽ nhũm mẽ pahwỳr wrỳ hãmri nẽ htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr kukwak ri mẽ pahte hkôt amnhĩ xunhwỳr xwỳnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwỳnh ã mẽ pajarẽ. Tã nhũm Jejus mẽ pakamã ukapĩrĩ nẽ mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpêr xwỳnhjaja te mẽ pahte aa tanhmã amnhĩ tomnuj to hkêt pyràk o mẽ panhĩpêx. Na hte amarĩ ã mẽ panhĩpêx anẽ.

Nẽ Atãw kot amnhĩ tomnuj mỳrapê na htem piitã ri pa nẽ tanhmã amnhĩ to nẽ ty rỳ ri pa nẽ gaa nẽ wejre nẽ ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwỳr xwỳnhjê kutã nojarêt rãhã nẽ mẽ pakukamã hamaxpêr o:

—Nà mẽ kot Ixkra hkôt amnhĩ xunhwỳr xwỳnhjaja na pa mẽ omunh pa. Tã kot paj Ixkrata kukwak ri tãm mẽ unhwỳ nhũm mẽ nhỹrmã wa ixri mex nẽ htĩr tũm nẽ pa ho pa. Anẽ.

²⁰⁻²¹ Nẽ na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nẽ mẽ kot kapêr mar nẽ hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nẽ amnhĩ xô ri mẽ kãm hã kagà nẽ mẽ kãm harênh o ri mẽ hkôt pa. No nhũm prem kapêr ma nẽ ãm kuma

ně hkwým pix mã ri tanhmã amnhĩ tomnuj to ho pa. Ně pika piitã hkôt ja arĩ rãhãã. Ja mýrapê koja mẽ nhỹrmã ty ně ma mẽ kot amnhĩ xà htýx kamã hamak tũm xàta wýr ma pa. Nom Tĩrtũm arĩ kãm pika piitã hkôt mẽ papa xwýnhjê japê ně. Mẽ pahte amnhĩ tomnuj o papa tã nhũm kãm mẽ pahto mex prãm ně. Jakamã na pre mẽ pahwýr Kra Jejus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpěr xwýnhjaja nhỹrmã Tĩrtũm mẽ wa kuri pahtĩr tũm ně pa mex ně papa ho papa.

6

Mẽ kot mẽ pahkrã kumrãr ã mẽ harěnh

Sikũn Korĩt 5.17; Karatas 2.19-20, 5.24, 6.14; Epes 4.17-24; Korosẽ 3.1-11; Wam Pẻtre 4.1-6

¹ Nẽ mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê ně. Nẽ arĩ mẽ pakutã nojarêt rãhã ně. Jakamã xà kot kaj mẽ atũ ã harěnh anhỹrja ma ně atýx ri ã ajamaxpěr anẽ ně ajamaxpěr o:

—Nà Tĩrtũm kãm ijapê ně kot ixkutã nojarêt rãhã ho ri pa jakamã mo kaxyw kot pa Jejus kôt amnhĩ nhĩpêx o ri ixpa? Nà kot paj ho anhỹr kêt ně. Anẽ.

Ka ã mẽ atũ atýx ri ajamaxpěr anhỹr japêr. Kwa xà ajamaxpěrja mex? Nà mex kêt. ² ã ajamaxpěr anhỹrja mẽ hamaxpěr mex xà hkôt kêt. Ra mẽ pahte Jejus kôt amnhĩ xunhwýr ně mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyræk. Jakamã kot puj mẽ arĩ tanhmã amnhĩ tomnuj to

ho ri papa hkêť nê. ³ Mẽmo kaxyw na htem Tĩrtũm mã mẽ pahkrã kumrã? Nà mẽ pahte ra Jejus kôt amnhĩ xunhwỳr ã amnhĩ to amnhĩrĩť kaxyw. Te Jejus htyk nhũm mẽ pahte amnhĩ tomnujja haxwỳja hkôt htyk nê hapêx par pyràk o amnhĩrĩť kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêť nê. Anê.

⁴ Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jejus kôt haxwỳja haxàr pyràk. Hãmri nhũm mẽ akupỹm mẽ pahto api. Te Tĩrtũm hihtỳx o hihtỳx o kot akupỹm Kra Jejus ho htĩr pyràk. Te mẽ pahtyk tã nhũm akupỹm kot mẽ pahto mẽ pahtĩr pyràk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. ⁵ Nhũm mẽ pahte amnhĩ nhĩpêx tũmja te Jejus kôt htyk nê hapêx par pyràk. Nê mẽ pahte amnhĩ nhĩpêx nywja te Jejus akupỹm htĩr pyràk o amnhĩ nhĩpêx.

⁶ Amnepêť na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyràk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jejus kôt harir nê htyk nê hapêx par pyràk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw. ⁷ Na hte mẽ htyk xwỳnhjaja axte tanhmã amnhĩ tomnuj to hkêť nê. Tã kêť pu mẽ uràk nê axte ã amnhĩ nhĩpêx anhỳr kêť nê. ⁸ Na pu prem Jejus kot

mê panê htyk ã harênh ma nê pajamaxpêr o:

—Nà ra Jejus kot mê panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

⁹ Nê Jejus htyk nhũm Tĩrtũm akupỹm ho htĩr jakamã koja axte htyk kêt nê. Ra mê pahte ja mar mex. ¹⁰ Na pre ãm htyk tipxi htã htykja o mê pahpiitã mê pahte amnhĩ tomnuj pãnhã amnhĩre. Tã ra akupỹm htĩr o htĩr nê kaxkwa kamã Tĩrtũm mã tanhmã amnhĩ nhĩpêx to ho ri pa. ¹¹ Tã mê papajaja kot puj mê ã kot amnhĩ nhĩpêx anhỹrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jejus pyrã nê ra ixtyk pyræk jakamã kot paj axte amnhĩ tomnuj o ri ixpa hkêt nê. Te ixte Jejus pyrã nê akupỹm ixtĩr nê ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mê atõ nhỹrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhỹr prãm nê. Omnuj tã kot paj ho anê. Nà ixte ho anhỹr mã kênã.

Anhỹr o ajamaxpêr japêr tã kwa mê ã ajamaxpêr anhỹr kêt nê.

¹³ Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mê kot amnhĩ to mex xwỳnhjê kôt pix mã mãn ri apa. Na ka pre htem akapêr punuj nê. Nê ajamaxpêr punuj nê.

Ně mẽ kot amnhĩ tomnuj o mẽ pa xwỳnhjê hkôt ri apa.

Ně kagôxỳhti japrô nẽ ho akôm o ri mẽ hkôt apa. Tã ra hpãnhã Tĩrtũm mã amnhĩ gô nẽ axte ã amnhĩ nhĩpêx anhỹr kêt nẽ.

¹⁴ Amnepê m na pu prem tanhmã mẽ pahte amnhĩ nhĩpêx to ho papa hkukamã pajamaxpêr nẽ pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nẽ amnhĩ to mex o ri ixpa nhũm Tĩrtũm ja hã ixpumu nẽ amnhĩm inhmex ã ijarẽ. Nà kot paj anẽ.

Anhỹr tã no ãm tee ri mẽ pamã hkôt amnhĩ nhĩpêx o ri papa hprãm kaprỳ nẽ arĩ ri kapêr kwỳm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêr rãhã ho pa xwỳnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anẽ.

Anhỹr jakamã ra amnhĩ kaxyw kãm pajamaxpêr tỳx o mẽmoj punuj kutã amnhĩ to htỳx nẽ.

*Mẽ pahte Tĩrtũm mã tanhmã amnhĩ nhĩpêx to hã mẽ pajarênh
Juãw 8.34*

¹⁵ Tã ã kot anhỹr jakamã tanhmã kot puj wem pajamaxpêr to? Xà kot pu mẽ ã pajamaxpêr anẽ nẽ pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nẽ. ãm kêp ixkutã nojarêr rãhã nẽ amarĩ amnhĩm inhmex ã ijarênh xwỳnh jakamã

kot paj arĩ amnhĩ tomnuj rãhã nẽ aa ja kaga hkêt nẽ.

Anhỹr o kot puj mẽ pajamexpêr? Nà kot puj mẽ ã pajamexpêr anhỹr kêt nẽ. ã mẽ pajamexpêr anhỹrja mex kêt. ¹⁶ Koja mēhō nhỹri kot amnhĩ tomnuj tỳx xwỳnhjê hō pumu nẽ kãm amnhĩ jarēnh japêr nẽ kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixa. Jakamã e inhma mēmoj tã karō pa ama nẽ amã tanhmã ho ho ri ixa.

Anhỹr o kãm kapêr japêr. Hãmri nẽ ã amnhĩ nhĩpêx anhỹr tã amnhĩ tomnuj pix o ri pa. Tã ã mẽ kot amnhĩ nhĩpêx anhỹr o mẽ pa xwỳnhjaja koja nhỹrmã ty hãmri mẽ kot amnhĩ xà htỳx kamã hamak tũm xàta wỳr ma hapêx.

No koja mēhō Tĩrtũm mã amnhĩ jarēnh nẽ kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixa.

Anhỹr o kãm amnhĩ jarē nẽ hkôt amnhĩ nhĩpêx mex o pa. Nẽ tãm amnhĩ nhĩpêx o ri pa. Hãmri nẽ nhỹrmã ty nẽ ma ò krĩ hwỳr api nẽ Jejus mẽ Tĩrtũm wa kuri htĩr tũm nẽ mex rãhã nẽ pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tã nhũm te tãm kot amnhĩ tã mẽ ato htỳx pyrāk o mẽ anhĩpêx ka mẽ tee ri kãm anhũrer prãm kaprỳ. Tã nhũm Tĩrtũm tanhmã mẽ akrã hto ka mẽ kapêr ma nẽ amnhĩ kaxyw hkôt ajamexpêr tỳx nẽ ãm hkôt pix mã amnhĩ nhĩpêx. Pa ja hã mẽ ajarēnh ma nẽ mẽ anhỹ hã ixkĩnh nẽ. Nẽ Tĩrtũm mã ixte mẽ ajarēnh mar nẽ mẽ anhỹ hã ixkĩnh ã amnhĩ jarē. ¹⁸ Na pre Tĩrtũm tanhmã mẽ akrã hto ka mẽ amnhĩ tomnuj

mã anhũrer pa nê hpãnhã hkôt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyræk o kot paj mẽ amã awjarê. Nà amnepêm na ka prem ajamaxpêr punuj kôt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê. ²⁰ Na ka prem tee ri amã amnhĩ tomnuj mã anhũrer prãm kaprỳ. Te tãm kot amnhĩ tã mẽ ato htỳx nê amnhĩ kôt mẽ ato pa pyræk o mẽ anhĩpêx. ²¹ Xàn ka prem ã amnhĩ tomnuj anhỹr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jesus kôt amnhĩ xunhwỳ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhỹr o pa xwỳnhjaja na htem ja mỳrapê ty nê ma mẽ kot amnhĩ xà htỳx kamã hamak tũm xàta wỳr pa. ²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỳx nê amnhĩ kôt mẽ ato pa pyræk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nê atĩr tũm nê ri apa ho apa.

²³ Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nê àpênh pa nê hpãnhã amnhĩrer xà jamỳ. Ja pyrà nê koja mẽ kot amnhĩ tomnuj

xwỳnhjaja nhỹrmã ty hãmri nẽ ma mẽ kot amnhĩ xà htỳx kamã hamak tũm xàta wỳr ma pa.

No mẽ pahte amnhĩ kaxyw Jejus Kris kôt pajamxpěr xwỳnhjaja na hte Tĩrtũm ja hã mẽ pahpumu nẽ mẽ pajarẽnh o:

—Nà ãm hãmri. Jajaja koja nhỹrmã Ixkra mẽ wa Ixkuri mex kumrẽx nẽ htĩr tũm nẽ pa ho pa. Hêxta waa nẽ. Nà ãm hãmri koja mẽ anẽ. Anẽ.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarẽnh anẽ? Nà ãm mẽ pahte Kra Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pajarẽnh anẽ.

7

Mẽ pahte amnhĩ tomnuj kot axte amnhĩ tã mẽ pahto htỳx kêt ã harẽnh

Rômãn 8.2, 10.4; Karatas 4.1; Epes 2.2; Korosẽ 3.7

¹ E Jejus kôt ixkwỳjaja. Nà Tĩrtũm kot mẽ pakaxyw tanhmã Mojes mã kapěr tota na ka mẽ ra mar tỳx nẽ. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nẽ axte hkôt amnhĩ nhĩpêx kêt nẽ. Ra mẽ ate ja mar tỳx. E pa mẽ amã ja hã ejêp jarẽ ka mẽ inhma. ² Nà finat Mojes kot Tĩrtũm nhỹ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nẽ ãm kôt pix mã ri pa ho pa nẽ aa hkaga hkêt nẽ. No koja nhỹrmã mjên kêp ty nhũm ahte ri pa. Hãmri nẽ kãm axte mẽhõ ho mjên prãm nẽ mãmri axte mẽhõ ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprõ tanhmã hamaxpěr to nẽ hkaga nẽ hpãnã nhãm mẽhõ ho mjên. Hã koja Tĩrtũm pê ja homnuj

nê. Nom koja mjên ra kêp ty nhũm mÿrpê axte kãm mēhō ho mjên prām nê māmri ho mjên. Ja na Tirtũm pê homnuj kêt. Ra wam mjênja htyk kênã. ã Tirtũm kot Mojes mã mẽ pakaxyw mẽmoj tâ karō kot anhÿr.

⁴ Tã ja pyrã nê na pu prem amnepêm pajamaxpêr o:

—Ixte Tirtũm kapêr kôt pix mã amnhĩ nhĩpêx o ri ixpa jakamã nhũm Tirtũm ja hã ixpumu nê amnhĩm inhmex ã ijarê. Anê.

Tã pu mẽ ra tanhmã pajamaxpêr to nê hpãnhã pajamaxpêr ò ho pajamaxpêr o:

—Nà na xep hte Tirtũm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarênh kêt nê. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijaxmaxpêr nê hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarê. ãm ja pix ã mẽ ixpumunh kôt na hte mẽ ixto hkra nê mẽ ixkutã nojarê o pa. Kra Jejus pix kukwak ri na hte ã mẽ inhiĩpêx anhÿr o pa. Anê.

ã mẽ pajamaxpêr nyw kot anhÿr. Jakamã te mẽ pahte mēhō kot mjên nyw xwÿnh gryk ã axte mjên htyk xwÿnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tirtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ

pahte Tĩrtũm kapẽr mar tỳx tã kuma nẽ ăm kuma nẽ ri papa nẽ ri h̃kôt amnhĩ nhĩpêx kêt nẽ. Mỳrapê nhũm Tĩrtũm tee ri ja hã mẽ pahpumu nẽ mẽ pahtyk nẽ ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarẽ.

⁶ Nẽ amnepêm na pu pre htem ã pajamaxpẽr anhỹr o:

—Nà kot paj Tĩrtũm kapẽr kôt pix mã amnhĩ nhĩpêx o ri ixpa nhũm amnhĩ tã ixpumu nẽ ixte amnhĩ tomnuj kêt xwỳnh ã ijarẽ.

Anhỹr o pajamaxpẽr no ăm tee ri ã pajamaxpẽr anhỹr kaprỳ. Nẽ arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyràk o amnhĩ nhĩpêx nẽ hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tĩrtũm kapẽr kôt amnhĩ nhĩpêx prãm kaprỳ h̃kêt nẽ. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapẽr ã kagà htũm kot tanhmã mẽ pajarẽnh to

Rômãn 3.20, 5.20; Karatas 3.23-24

⁷ Tã Tĩrtũm mẽ pahte kapẽr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarẽnh kêt jakamã mẽmo kaxyw na kapẽr ã kagà htũmja? Nà mẽ pahte mar nẽ pahprĩ hã Tĩrtũm noo mã mẽ kot amnhĩ tomnuj xà jarẽnh mar nẽ omunh mex kaxyw na. Na hte mẽ pahkwỳjê kukrêx kĩnh o pamã ho panhõ hprãm nê mẽ pamã karõ. ã kot mẽmoj punuj piitã nê mẽ pamã karõ kot anhỹr. Tã mẽ pahte ja mar kêt ronhỹx pu mẽ Tĩrtũm kêp ja homnuj ã harẽnh mar kêt nẽ.

⁸ Tã ra mẽ pahte harẽnh mar nẽ kêp ja homnuj

ã harênh ma. Mẽ pamã axpên kukrêx kînh o ho pamã panhõ hprãmja mãânên kêp ja homnuj ã harênh mar tâ nom aa hkaga hkêt nê arĩ pamã axpên kukrêx kînh o pamã ho panhõ hprãm tỳx rãhã ho ri papa. Kop ãm Tĩrtũm kapêr kêt ronhỹx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyræk. ⁹ Amnepê mã ixte Tĩrtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

—E kot paj nhỹrmã Tĩrtũm ri ixtĩr tũm nê inhmex nê ixpa ho ixpa.

Anhỹr tã hpãnhã pamã axpên kukrêx kînh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhỹr o ixpa jakamã kot paj nhỹrmã ty nhũm Tĩrtũm akupỹm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwỳnh na pa. Kot paj nhỹrmã ty nhũm Tĩrtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmẽ. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰ Tã hpãnhã axtem ijamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã

kapêr nhîrôp ixkuhê nê tee ri ja hã amnhî pumu nê ijamaxpêr o:

—Kwa tanhmã kot pa amnhî nhîpêx to nê ãm Tîrtûm kôt pix mã ri amnhî nhîpêx? Na pa hte tee ri inhmã ã amnhî nhîpêx anhÿr prãm tÿx kaprÿ. ãm ixte amnhî tomnuj pix o ri ixpa xwÿnh jakamã ãm hãmri koja amnhî nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mêhõ koja Tîrtûm kapêr kôt amnhî nhîpêx mex o ri pa? Na pu htem pahpiitã tee ri pamã ho anhÿr prãm kaprÿ. Mê pahpê hihtÿx kumrêx jakamã na pa pre ixtÿx ixte Tîrtûm kuri ixtîr tûm nê ri ixpa hã amnhî kukamã amnhî jarênh kaprÿ. ãm xatã kapêr nhîrôp ixkuhê nê amnhî tomnuj pix o ri ixpaja mÿrapê koja mê kot amnhî xã htÿx kamã hamak tûm xãta wÿr amnhî nê inhmê. ¹² Kot anhÿr tã tanhmã kot puj mê Tîrtûm kapêr ã kagã htûmta jarênh to? Nà kot mê pamã mê pahte amnhî nhîpêx ã karõta mex kumrêx. Mex o mex. ¹³ Mex kumrêx tã na htem kuma nê tee ri kãm hkôt amnhî nhîpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tã hkôt amnhî nhîpêx mex kêt nê. Jao ra ixte amnhî tomnuj xwÿnh ã amnhî pumu. Na pa pre tee ri inhmã hkôt amnhî nhîpêx o ri ixpa hprãm tã no ãm xatã kapêr nhîrôp ixkuhê nê hkwyãm ri amnhî nhîpêx rãhã ho ri ixpa. Tã ra tee ri ja hã amnhî pumu nê amnhî kukamã ijamaxpêr o:

—Nà na pa hte ãm tee ri inhmã Tîrtûm kôt amnhî nhîpêx prãm kaprÿ no ãm ho anhÿr kêt nê. ãm ixte amnhî tomnuj pix o ixpa xwÿnh na pa. Ja mÿrapê

koja Tĩrtũm amnhĩ nê ma kuwy hwỳr inhmẽ. Nà
koja ixto anẽ. Anẽ.

*Mẽ pahte mẽ pamã amnhĩ tomnuj kaga hprãm
kaprỳ hã mẽ pajarẽnh*

Karatas 5.17

¹⁴ Nê Tĩrtũm kapẽr ã kagà htũmta Tĩrtũm kapẽr
na. Nê Tĩrtũm kĩnhã ãm inhĩ pix na pa ri ixpa
jakamã tanhmã kot pa amnhĩ to nê kapẽr kôt ri
amnhĩ nhĩpêx mex o ri ixpa? ¹⁵ Inhmã tãm ixte
amnhĩ nhĩpêx prãm tã no ãm amnhĩ tomnuj pix o ri
ixpa. Mẽmoj ixpê omnuj tã pa hte ra hkôt tanhmã
amnhĩ tomnuj to ho ri ixpa. Hãmri nê ja hã amnhĩ
pumu nê tee ri amnhĩ kukamã ijamaxpẽr o:

—Hêxta waa nê. Mon pa hte axtem nê ã amnhĩ
nhĩpêx anhỹr o ri ixpa? Mẽmoj ixpê omnuj nhũm
inhmã ho anhỹr prãm kêt tã ra ho anẽ. Nhũm
mẽmoj mex nhũm inhmã ho anhỹr prãm tã ho
anhỹr kêt nê. Mon pa hte axtem nê ã amnhĩ nhĩpêx
anhỹr o ri ixpa? Anẽ.

¹⁶ ã ixte amnhĩ nhĩpêx anhỹr o ri ixpa htã ra
Tĩrtũm kapẽr mexta ma hãmri nê ra ijamaxpẽr o:

—Nà Tĩrtũm kapẽrja mex kumrẽx tã pa tee ri
inhmã hkôt amnhĩ nhĩpêx mex hprãm kaprỳ ho ri
ixpa. Hêxta waa nê. Anẽ.

¹⁷ Inhmã amnhĩ tomnuj prãm kêt tã arĩ
ixkaxwỳnh kãm ijamaxpẽr punuj nhỹ hã ã amnhĩ
nhĩpêx anhỹr o ri ixpa. ¹⁸ Nê inhmã tãm amnhĩ
nhĩpêx prãm tã no ãm tee ri ã inhmã amnhĩ nhĩpêx
anhỹr prãm kaprỳ. Tanhmã kot pa amnhĩ to nê tãm
amnhĩ nhĩpêx o ri ixpa? Na pa tee ri inhmã ja ho
anhỹr prãm kaprỳ. Ixte amnhĩ tomnuj xwỳnh na
pa. Nê aa ixte amnhĩ to mex kêt kumrẽx xwỳnh.

¹⁹ Inhmã mẽmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhỹr kêt nê. Nê ãm hkwỳm ri tanhmã amnhĩ tomnuj to ho ri ixpa. Mẽmoj ixpê omnuj tã pa hkôt amnhĩ nhĩpêx o ri ixpa. ²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhỹr o ri ixpa. Mẽmoj ixpê omnuj pa inhmã ho anhỹr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhỹr o ri ixpa. ²¹ Nê mẽmoj mex nhũm inhmã hkôt amnhĩ nhĩpêx prãm tã ra hkwỳm ri amnhĩ nhĩpêx. ã ixte amnhĩ nhĩpêx anhỹr xwỳnh na pa. ²² Nê inhmã Tĩrtũm kapêr mar nê hkôt ri amnhĩ nhĩpêx prãm tã ²³ nom ixte amnhĩ tomnuj xwỳnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhỹr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwỳnh jakamã na pa hte ã amnhĩ nhĩpêx anhỹr rãhã ho ri ixpa nê tee ri inhmã amnhĩ tomnuj kaga hprãm kaprỹ. ²⁴ Hêxta waa nê. Na pa ixkaprĩ htỳx nê ri ixpa. ã ixte amnhĩ nhĩpêx anhỹr o ri ixpaja mỳrapê kot paj nhỹrmã ty nê ma mẽ kot amnhĩ xà htỳx kamã hamak tũm xàta wỳr ma mỗ. Mẽhỗ kot tanhmã ixkrã hto pa ã amnhĩ nhĩpêx anhỹrja kaga? ²⁵ Nà mẽ panhỗ Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtỳx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihțȳx to pa rĩ kormã Tĩrtũm kapěr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhȳr xwȳnh na pa.

8

Tĩrtũm Karõ kot mẽ pahto tãm mẽ pahte amnhĩ nhĩpêx xwȳnh ã harênh

Karatas 5.16-26

¹ Nê Jejus Kris kêp mẽmoj punuj kutã mẽ pahto mẽ paxihțȳx xwȳnh jakamã mẽ pahte hkôt amnhĩ xunhwȳr xwȳnhjaja na pu htem ỹ hã amnhĩ tomnuj o ri papa hkêt nê. Jao mẽ pahte kuwy hwȳr papa mã xwȳnh kêt. ² Te ra mẽ pahtyk nhũm Tĩrtũm kot akupȳm mẽ pahto mẽ pahțĩr pyrãk jakamã nhũm Karõja mẽ pahkarõ mã agjê pu mẽ ỹ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihțȳx. Kêp mẽ pajamaxpêr punuj kutã mẽ pahto mẽ paxihțȳx xwȳnh jakamã kot puj mẽ nhȳrmã mẽ kot amnhĩ xã htȳx kamã hamak tũm xãta wȳr papa hkêt nê.

³ Nom kormã mẽ pahte Jejus kôt amnhĩ xunhwȳr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprȳ nhũm mẽ pahpê hihtȳx kumrêx. Jakamã tanhmã koja Tĩrtũm amnhĩ to nê amnhĩ mã mẽ pamex xwȳnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwȳr Kraja mẽ nhũm man mẽ pahwȳr wrȳ nê mẽ pahpyrà nê ã ho mẽ pakamã kato. Nom mẽ parom aa tanhmã amnhĩ tomnuj

to hkêt kumrêx nê ri pa. Tã mẽ kot hpîr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtỳx xwỳnh. Na pu htem hkôt amnhĩ xunhwỳ hãmri nê kukwak ri amnhĩ tomnuj o ri papa hkêt nê. ⁴Pãnhã Tĩrtũm kot amnhĩ nhĩpêx kôt amnhĩ nhĩpêx o ri papa nê axte mẽ pahte amnhĩ nhĩpêx tũm kôt amnhĩ nhĩpêx kêt nê. Hãmri hpãnhã Tĩrtũm Karô kot amnhĩ nhĩpêx kôt pix mã amnhĩ nhĩpêx. Nê hamaxpêr kôt pix mã pajamaxpêr. Ja kaxyw na pre Tĩrtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

⁵ Nê mẽ kot amnhĩ krã hkôt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkôt amnhĩ nhĩpêx o ri pa. No kêt Tĩrtũm Karô kot mẽ pahkarô mã gjêx xwỳnhjaja na pu htem mẽ kurom te Jesus jamaxpêr pyràk o pajamaxpêr o papa.

⁶ Nê mẽ kot amnhĩ krã hkôt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tĩrtũm Karô hkôt amnhĩ nhĩpêx xwỳnhjaja kot puj mẽ pajamaxpêr nyw o pajamaxpêr nê amnhĩ nhĩpêx nyw o amnhĩ nhĩpêx. Jao paxàmnhĩx ri pajamakêtkati nê ri papa. Nê nhỹrmã ty hãmri nê Tĩrtũm mẽ Jesus wa kuri akupỳm pahtĩr tũm nê pamex kumrêx nê papa ho papã.

⁷ Nê mẽ kot amnhĩ krã hkôt ri amnhĩ nhĩpêx xwỳnhjaja kãm Tĩrtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkôt amnhĩ nhĩpêx? ⁸ Koja mēhō amnhĩ krã hkôt kãm hprãm xà hkôt pix mã amnhĩ nhĩpêx hãmri nhũm

Tĩrtũm tee ri ja hã omu nẽ hkĩnh kêt nẽ. ⁹ No mẽ papajaja na pu htem mẽ uràk nẽ ã amnhĩ nhĩpêx anhỹr kêt nẽ. Ra Tĩrtũm Karõ kot mẽ pahkarõ mã gjêx jakamã na pu htem hkôt pix mã amnhĩ nhĩpêx hprãm. No koja Tĩrtũm Karõ mēhõ kaxwỳnh mã àr kêt nẽ nhũm kệp hkra hkêt nẽ.

¹⁰⁻¹¹ Tã mẽ papajaja. Mẽ pahte amnhĩ tom-nuj mỳrapê koja mẽ pakrãhkàja nhỹrmã ty. No nhũm Tĩrtũm ra kot amnhĩm mẽ pahte amnhĩ to mex xwỳnh ã mẽ pajarēnh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwỳr àpir kurê kumrêx. Tã nhũm nhỹrmã Tĩrtũm akupỹm mẽ pakrãhkà ho htĩr nẽ akupỹm mẽ pahkarõja mẽ pakrãhkàm hagiê pu mẽ wa kuri pahtĩr tũm nẽ papa ho papa. ¹² Jakamã e kwa ixkwỳjaja. Kêr pu mẽ axte ri mẽ pajamaxpêr tũm kôt amnhĩ nhĩpêx o ri papa hkêt nẽ. ¹³ Kot puj mẽ arĩ ã amnhĩ nhĩpêx anhỹr o ri papa hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr papa. Jakamã kêr pu mẽ mēmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o:

—Nà inhmã ã amnhĩ nhĩpêx anhỹr prãm tã kot paj Tĩrtũm Karõ nhỹ hã ja kutã amnhĩ to htỳx nẽ ho anhỹr kêt nẽ. Anẽ.

Kot puj mẽ ã pajamaxpêr anẽ hãmri nẽ nhỹrmã kuwy wỳr papa hkêt nẽ. Pãnhã Tĩrtũm mẽ Je-jus wa kuri pamex nẽ pahtĩr tũm nẽ ri papa ho papa. ¹⁴ Mẽ kot Tĩrtũm Karõ hkôt amnhĩ nhĩpêx xwỳnhja kệp Tĩrtũm kraa.

¹⁵ Nom amnepêm kormã mẽ pahte hkôt amnhĩ

xunhwÿr kêt ri. Nê kormã mẽ pamã kapêr mar prãm kêt ri nhũm kot amnhĩ tã mẽ pahpumunh nê tanhmã mẽ pahto pumaj na pu prem pamã uma ho ri papa. Tã hkôt amnhĩ xunhwÿ nhũm Karôja mẽ pahkarô mã gjêx jakamã na pu htem ra pamã uma hkêt nê ri papa. Karô kot mẽ pahpê Tĩrtũm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nê ri papa. Nê paxàmnhĩx pajamakêtkati nê kãm amnhĩ jarê nê kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ija-maxpêr. Anê.

Jao ra mẽ pamã uma hkêt nê ri papa. ¹⁶ Karô kot mẽ pahkarô mã gjêx nhũm mẽ pahte amnhĩ tã omunh jakamã na pu htem pajamaxpêr o:

—Nà Tĩrtũm Karô kot ixkarô mã àr jakamã ixpê hkra na pa. Anê.

*Nhÿrmã mẽmoj piitã akupÿm mex par ã harênh
Sikũn Korĩt 4.16-18; Korosê 3.4; Wam Pêtre 4.13*

¹⁷ Nê mẽ kãm Tĩrtũm prãm kêt xwÿnhjaja na htem te mẽ kot Tĩrtũm Kra Jejus nhĩpêx pyràk o mẽ panhĩpêx pu mẽ pahpunuj nê ri papa. Nom kot puj mẽ nhÿrmã Tĩrtũm mex o mex xwÿnhja kuri pamex kumrêx nê papa. Mẽ pahpê hkra jakamã kot puj mẽ Kra Jejus pyrà nê ò krĩ kamã kuri pamex kumrêx nê ri papa ho papa. ¹⁸ Jar Jejus ã mẽ pahpunuj nê ri papa htã kot puj mẽ nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamaxpêr kêt kumrêx.

19 Nê pika hkôt Tĩrtũm kot mẽmoj ho kator xwỳnhjaja na htem Tĩrtũm kot mẽ pahto mex par jatur xàm mẽnh ã arĩgro jamār rāhā ho pa. àk nê mry nê pĩ nê gô nê mẽmoj piitā mẽ pajamār o pa. Te kot mẽ pakukamā hamaxpēr o:

—Kwa mẽmo arĩgro hā koja Tĩrtũm hkrajê piitā ho amnhĩrĩt nê mẽ ho mex par jatur xàm kumẽ pu mẽ ja hā mẽ omu? Hêxta waa nê. Inhmā tokyx ja hā mẽ omunh prām tỳx. Koja tokyx ã mẽ hipêx anê pa ixkĩnh tỳx kumrêx.

Anhỹr o hamaxpēr pyrāk. 20 Mẽmo kaxyw na hte mryja ã mẽ pakukamā hamaxpēr anê? Nà amnepê mã Tĩrtũm kot mẽmoj piitā ho katorta ã nhũm pre piitā mex o mex. Pĩ nê mry nê gô. Mẽmoj piitā mex kumrêx rāhā nê. Aa grà nê htyk kêt kumrêx. Tã Atāw kot amnhĩ tomnuj mỳrapê nhũm ra ỹ hā mẽmoj piitā homnu par jakamā na hte mẽmoj htĩr nê pa nê gaa nê ty nê hapêx. Nê mẽ pahpur kām ahkagrôt punuj hapôj. Atāw kot amnhĩ tomnuj mỳrapê nhũm Tĩrtũm kapêr xà hkôt ã mẽmoj omnu hpar anê. 21 Nom koja arĩ rāhā ho rāhā hkêt nê. Koja nhỹrmā Tĩrtũm akupỹm mẽmoj piitā ho mex pa nhũm mex o mex nê axte grà rỳ axte htyk nê hapêx kêt nê. Nê axte omnu nê hikwỹ hkêt nê. Koja mẽ pahpyrà nê mex o mex. Jakamā na htem Tĩrtũm kot mẽ pahto mex par jatur xàm mẽnh xà hā arĩgro jamār rāhā ho pa. 22 Te mẽhō ni hpijagri kaxyw õhy xà htỳx nê tokyx kām hpijagri hprām xà àmra ho nōr pyrāk o amnhĩ nhĩpêx pẽ mẽ pahto mex jatur xàm mẽnh ã arĩgrota jamār o pa.

23 Nê mẽ papajaja na pu htem tanhmā pahpunuj to nê jajê pyrà nê te amnhĩ kamnhêr o rĩ papa

pyràk. Rỳ tanhmã paxà kute nẽ ri papa. Rỳ pamã prãm nẽ paxàà nẽ ri papa. Nẽ tanhmã mẽ pahpunuj to nẽ ri papa. Jao te pĩ nẽ gô nẽ mryja pyrà nẽ amnhĩ tâ Tĩrtũm kot mẽ pahto mex par jatur xàm mẽnh ã arĩgro jamãr rãhã ho ri papa.

Na pre Tĩrtũm mẽ pahwỳr Karõ rẽ nhũm mẽ pahkarõ mã agjê nẽ mẽ pakukamã Tĩrtũm tanhmã kot mẽ pahto mex to hã mẽ pamã ho amnhĩrĩt nẽ mẽ pamã ho amnhĩrĩt o:

—Koja nhỹrmã Tĩrtũm mẽ ato mex par jatur xàm kumẽ nẽ mẽ piitã mẽ kãm mẽ apê hkra hã mẽ ato amnhĩrĩt. Hãmri nẽ mẽ amã mẽ anhĩ nyw gô ka mẽ axte axà nẽ ri apa nẽ atyk kêt nẽ. Hãmri nẽ Tĩrtũm ri amex kumrêx nẽ ri apa ho apa. Nà kot kaj mẽ nhỹrmã ã amnhĩ nhĩpêx anẽ. Anẽ.

Ã Tĩrtũm Karõ kot mẽ pakukamã mẽ pajarênh anhỹr jakamã na pu htem amnhĩ tâ kot mẽ pahto mex jatur xàm mẽnh pix jamãr o ri papa. ²⁴ Nom na kormã ã mẽ pahto mex anhỹr kêt nẽ. Kormã mẽ pamã mẽ panhĩ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhĩ pumu nẽ pajamexpêr o:

—Nà ra Tĩrtũm kot ixto hkra jakamã koja nhỹrmã mãănên inhmã inhĩ nyw gô. Nà koja inhmã kugõ.

²⁵ Anhỹr o pajamexpêr tâ kormã. Na pu htem kormã amnhĩ tâ hamãr rãhã ho ri papa nẽ aa hkaga hkêt nẽ papa.

Mẽ pahte Tĩrtũm Karõ nhỹ hã Tĩrtũm mã amnhĩ jarênh

²⁶ Nẽ na pu htem Tĩrtũm mã amnhĩ jarênh kaxyw nhũm hte Karõja mẽ pahto ajuta pu mẽ ỹ hã

pakatàt kôt kãm tanhmã amnhĩ jarẽnh to. No kot puj mẽ amnhĩ krã hkôt kãm amnhĩ jarẽnh mex kêt nẽ. Na pu htem ja kaxyw tee ri amnhĩ kukamã pajamaxpêr o:

—Kwa tanhmã kot pa Tĩrtũm mã amnhĩ jarẽnh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkôt ja ho anhyr mex kêt nẽ. Hêxta waa nẽ. Anẽ.

No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ỹ hã kãm amnhĩ jarẽnh mex nẽ pakatàt kôt mẽmoj tã kuwỳ. Te Karõja tanhmã mẽ pakute hã mẽ pahpumunh nẽ mẽ pakamã ukapri xàj tãm mẽ pahto hwỳr pyràk.

²⁷ Jakamã pu mẽ ỹ hã tanhmã Tĩrtũm mã amnhĩ jarẽnh to nhũm mẽ pamar kurê kumrêx. Ra kot mẽ pajamaxpêr kôt mẽ pahpumunh par kênã. Nhũm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhĩ jarẽ nẽ tanhmã amnhĩ to paxàhwỳr to.

*Tĩrtũm kot mẽ pamã mẽmoj piitã ho mex ã harẽnh
Rômân 8.37; Piripos 1.12; Wam Pêtre 5.10*

²⁸ Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêr pu mẽ ãm ja hã amnhĩ pumu nẽ tee ri amnhĩ kukamã pajamaxpêr kêt nẽ. Koja te mẽ pahpê omnuj pyràk tã koja nhỹrmã hpãnhã mẽ pamã mex nẽ. Koja Tĩrtũm nhỹrmã tanhmã mẽ pamã mẽmojta o mex to. ²⁹ Amnepê mã mẽmoj piitã hkêt ri na pre Tĩrtũm mẽ pakukamã tanhmã mẽ pajarẽnh to nẽ mẽ pajarẽnh o:

—E kot paj nhỹrmã mẽ kot Ixkra Jejus kôt amnhĩ xunhwỳr xwỳnhjê ho ixkra jakamã nhũm mẽ Jejus pyrà nê kêp ixkraa. Nê uràk nê ixkapêr kôt amnhĩ nhĩpêx o pa. Jao pa ra ixkra xohtô nê. Nà ja na inhmã hprãm. Anê.

³⁰ Tã pu htem pajapôj nê ri papa. Hãmri nê kapêr ma nê amnhĩ kaxyw Kra Jejus kôt pajamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ pahpumu nê pahto hkra nê amnhĩm mẽ pamex xwỳnh ã mẽ pajarê nê mẽ pahto mex nê. Nê te ho Kra Jejus nhĩpêx pyràk o mẽ panhĩpêx. Jao nhỹrmã wa kuri mẽ pahtĩr tũm nê papa ho papa mã xwỳnh ã mẽ pajarê.

Mêhõ kot Tĩrtũm pê aa mẽ papytâr kêt ã harênh
Rômân 5.1

³¹ Tã ã Tĩrtũm kãm mẽ pajapê nê mẽ pahto mex kot anhỹr. ã kot mẽ panhĩpêx mex anhỹr jakamã ra mẽ pahkôt pa ho pa rãhãã. Jakamã mêhõ koja ãhkra pê mẽ pahpytâ? Nê mêhõ koja tanhmã ri kêp mẽ pahto? Nà koja kêp mẽ papytâr rỹ tanhmã kêp mẽ pahto hkêr nê. ³² Tĩrtũm kãm Kra Jejus japê htỹx tã na pre mẽ pahpê nê hkêr nê mẽ pahwỳr kumê. Te kot mẽ pamã ôr pyràk o hipêx nhũm mẽ pahwỳr wrỹ nê mẽ panê ty. Tã ra Tĩrtũm kot mẽ pamã ôr jakamã koja mãânên kãm mẽ pahte Kra hkôt amnhĩ xunhwỳr xwỳnhjê japê nê mẽ pahto mex rãhã ho ri pa. Nà koja ã mẽ pahto mex anê.

³³ Jakamã mêhõ koja kãm mẽ pahte amnhĩ tom-nuj xwỳnh ã mẽ pajarê? Ra tãm kot mẽ pahto hkra nê mẽ pahte amnhĩ to mex xwỳnh ã mẽ pajarênh kênã kot kêt mêhõ kãm tanhmã mẽ pahto kapêr punuj to nhũm mẽ kuma. Koja mẽ tee ri kãm

tanhmã mẽ pahto kapêr to kaprỳ. ³⁴ Na pre ra Jejus Kris mẽ pahte amnhĩ tomnuj pãnhã amnhĩrer kaxyw mẽ panê ty nhũm Tĩrtũm akupỹm ho htĩr. Hãmri nhũm ma akupỹm kaxkwa hwỳr api nẽ Pahi Maati krĩ xà kamã Tĩrtũm nhĩhkô hã hkrĩ ho hkrĩ. Nẽ Tĩrtũm mã mẽ pakutã nojarêt rãhã ho kuri hkrĩ ho hkrĩ. Jakamã mēhõ koja kēp mẽ kot amnhĩ xà htỳx kamã hamak tũm xàta wỳr mẽ pajano? Nà amrakati kumrẽx.

³⁵ Nẽ Krisja kaxkwa kamã Tĩrtũm nhĩhkô hã hkrĩ ho hkrĩ htã mãânên jar mẽ pahkôt pa ho pa. Kãm mẽ pajapê htỳx jakamã kot puj mẽ tanhmã pahpunuj to htã nhũm arĩ kãm mẽ pajapê nẽ mẽ pahkôt pa ho pa.

Rỳ nhũm mẽ kot hkôt amnhĩ xunhwỳr kêt xwỳnhjaja tanhmã hã mẽ pahto htã nhũm arĩ kãm mẽ pajapê kamã mẽ pahkôt pa ho pa.

Rỳ mẽ pamã prãm nẽ ri papa. Rỳ mẽ paxê hkêt nẽ pamã kry nẽ ri papa htã nhũm arĩ kãm mẽ pajapê kamã mẽ pahkôt pa ho pa.

Rỳ ra mẽ kot hã mẽ panhĩmex kaxyw rỳ hã mẽ pahpar kumrẽx. Tã nhũm arĩ kãm mẽ pajapê kamã mẽ pahkôt pa ho pa rãhã nẽ.

Kãm mẽ pajapê kamã mẽ pahkôt pa ho pa rãhã jakamã pu mẽ tee ri amnhĩ kukamã pajamaxpêr kêt nẽ. Âm hkôt paxàmnhĩx ri pajamakêtkati nẽ ri papa ho papa. ³⁶ Tĩrtũm kapêr ã kagà htũm te mẽ papajaja mẽ pahte kãm tanhmã amnhĩ jarēnh to pyrà nẽ mẽ pajarēnh kot:

Pa Tĩrtũm. Na htem atã mẽ ixtomnuj tỳx o pa.

Nẽ ra mẽ kot mẽ inhĩmex kaxyw.

Ně mẽ inhĩpêx o te mẽ kot ôwêhti ho mõi mẽ hpar
kaxyw tanhmã hipêx to pyræk.

Jakamã na pa mẽ ra ixtyk kaxyw.

Anhỹr o kot mẽ pajarênh. ³⁷ Tã kwār mẽ ã mẽ
panhĩpêx anẽ. Arĩ Kris kãm mẽ pajapê kamã mẽ
pahkôt pa ho pa rãhã jakamã mẽ kot tanhmã
mẽ pahto htã pu mẽ arĩ amnhĩ kaxyw kãm paja-
maxpêr tỳx rãhã ho ri papa. Nhũm arĩ mẽ kutã mẽ
pahto paxihtỳx pu mẽ arĩ mẽ kãm pakuhê.

³⁸ Mẽmoj koja tanhmã mẽ pahto nhũm Tĩrtũm
tee ri ja hã mẽ pahpumu mẽ kãm mẽ pajapê hkêt
nẽ? Nà amrakati kumrêx. Koja mēhõ rỳ mẽmoj
mẽ pahpê àmnàr kêt mẽ. Na hte jar pika ja kamã
Kris kãm mẽ pajapê kamã mẽ pahkôt pa ho pa.
Ně kot puj mẽ nhỹrmã ty nhũm arĩ kãm mẽ pajapê
kamã mẽ pahkôt pa ho pa rãhã mẽ. Jakamã koja
mẽkarõ rỳ mẽkarõmnuti rỳ jar pika ja kamã mẽ kãm
Tĩrtũm prãm kêt xwỳnhjaja mẽ pahpê àmnàr kêt mẽ.
Rỳ mẽmoj tanhmã kute. Rỳ kormã hapu hã mẽmoj
tanhmã kute. Koja mẽmoj piitã tee ri tanhmã kêp
mẽ pahto htã nhũm Kris arĩ kãm mẽ pajapê kamã
mẽ pahkôt pa ho pa rãhã mẽ nhũm mẽmoj tee ri mẽ
pahpê àmnàr kaprỳ. ³⁹ Nẽ koja kỳj rũm mẽmoj wrỳ
nẽ tanhmã kêp mẽ pahto japêr. Rỳ pyka rũm mẽmoj
kato mẽ tanhmã kêp mẽ pahto japêr. Rỳ kuwy rỳ
kôk xápêr tỳx tanhmã kêp mẽ pahto. Tã nhũm mẽ
panhõ Pahĩti Jejus Kris arĩ kãm mẽ pajapê kamã
mẽ pahkôt pa ho pa rãhã mẽ. Te Tĩrtũm kãm mẽ
pajapê pyræk o kãm mẽ pajapê htỳx kãm mẽ pahkôt
pa ho pa rãhã jakamã nhũm mẽmoj tee ri mẽ pahpê
àmnàr kaprỳ.

9

Ijaew jarênh

Atre 3.25; Rôman 3.1-2

¹⁻² Nê na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu nê ixkaprĩ nê. Ixpyrà nê mẽ kêp Ijaew tâ ixkĩnhã amnhĩ kaxyw Kris kôt hamaxpêr kêt jakamã nhũm Kris tee ri kãm mẽ hamakêtkati nê àmnhĩx ri mẽ pa hprãm kaprỳ. Pa tee ri mẽ hkukamã ijamaxpêr nê ixkaprĩ nê ri ixpa. Nê aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tâ ijarênh tâ inhmã mẽ hkĩnh kênã. Âm hãmri na pa ã amnhĩ jarênh anê. Tĩrtũm Karõ kot ja hã ixpumunh mex nê inhmã:

—Nà âm hãmri na ka amã mẽ hkĩnh ã amnhĩ jarê. Anê.

³ Mẽ kêp ixkwỳ na mẽ. Mẽ ixpàr kraxja âm pixi mex. Tã nhũm mẽ ixkĩnhã amnhĩ kaxyw Kris kôt hamaxpêr kêt jakamã kop âm Tĩrtũm kot mẽ nê kuwy hwỳr pa inhmênh ronhỹx ja inhmã mex. Nhỹx pa kãm:

—Kwa Tĩrtũm. Amnhĩ nê kuwy hwỳr ixkwỳjê rênh kêt nê. Inhmã mẽ hapê htỳx kumrêx. Mẽ hpãnhã pa măn mẽ nê hwỳr inhmẽ nà.

Anhỹr o nhỹx pa kãm ixkapêr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukaprĩ htã no nhũm mẽ amnhĩ kaxyw Kris mã hamaxpêr kêt jakamã tanhmã koja amnhĩ to nê mẽ hpãnhã pa mẽ nê kuwy wỳr inhmẽ nhũm mẽ ixrom kuri htĩr tũm nê pa ho pa? Mẽ kot hkôt amnhĩ xunhwỳỹre hã. ⁴ Mẽ ixpê Ijaew nhĩgêjtaja na pre Tĩrtũm amnepê mã mẽ ho mex rax nê. Nê kãm mẽ ho hkra hprãm nê. Nhũm prem tanhmã

kot amnhĩ nhĩpêx mex to hã no ho omunh o pa. Nê hirã htỳx kãm ri pa hã omu nhũm mẽ kãm:

—E kot kaj mẽ ixkapêr ma nê ixkôt amnhĩ nhĩpêx o ri apa. Hã kot paj mẽ akôt ixpa ho ixpa nê mẽ ato mex nê ka mẽ axpên kanrêhã axàmnàr rax nê. Hãmri pa mẽ amã pika mex gô ka mẽ kamã ajamakêtkati nê axàmnhĩx ri apa ho apa.

Anhỹr o mẽ kãm kapêr. Hãmri nê mẽ kaxyw Mojes mã tanhmã kapêr to nê mẽ kaxyw kãm mẽmoj piitã hã karô. Mẽ kot tanhmã amnhĩ tomnuj to hãmri nê tee ri ja hã amnhĩ pumunh nê tanhmã amnhĩ to Tĩrtũm wỳr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xô ri mẽ kãm ujarênh nhũm mẽ kot mar nê hkôt amnhĩ nhĩpêx mex o ri pa kaxyw. ⁵ Mẽ ixkukamã mẽ ixpãmjaja. Apraãw nê Ijak nê Jako kanrêhã mẽ hkra nê mẽ htàmnhwỳjaja na pre mẽ. Mẽ hwỳr na pre Tĩrtũmja Kra Jejus Kris mẽ nhũm mẽ hwỳr wrỳ nê mẽ kamã i ho i ho kator jakamã haxwỳja kêp Ijaew na pre. Kêp Mẽpahpãm nê mex o mex nê hihtỳx o hihtỳx tã Ijaew wỳr wrỳ nê mẽ kamã kato. Hãmri nhũm Ijaew kêt xwỳnhjaja harênh ma nê tee ri hamaxpêr nê hamaxpêr o:

—Hêxta waa nê. Kêp ãm Jejus mẽ papa kamã mãn kator ronhỹx mẽ pamã mex kumrêx. Anê.

⁶ No nhũm kormã Ijaew hwỳr wrỳk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarê nhũm mẽ hkwyjaja kãm ja prãm kêt nê hkaga. Tã xà na pre Tĩrtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwyjaja hkwyjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ

ho hkra hkêť nê. Mê hkwỳjaja kot hkaga jakamã nhũm ăm mẽ hkwỳjê pix o hkra.

⁷ Nê finat Apraãwja na pre hkanrêhã hkra nê htàmnhwỳ xohtô nê. Tã xà na pre Tĩrtũm htàmnhwỳ piitã mẽ ho hkra hã amnhĩ jarê? Nà mẽ piitã ă mẽ harênh anhỹr kêt nê. Ăm mẽ hkwỳjê pix na pre mẽ ho hkra hã mẽ harê. Apraãw kra Ijak kôt hkanrêhã htàmnhwỳ pixjaja nhũm kot mẽ ho hkra hã mẽ harê.

⁸⁻⁹ Nê Apraãw kormã hprô kamã hkra hkêť ri na pre kãm àpênh xwỳnh kamã hkra nhũm kato nê myre nê hixi pê Ismael. Nom kêp Apraãw prô kumrêx kamã hkra hkêť. Prô kuprỳ kamã hkra na pre. Tã nhũm Tĩrtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arĩgro hã akupỹn awỹr tẽ nhũm ra aprô hpijagri nhũm war akra myre. Anê.

Tã nhũm hprô Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prô kamã hkra jakamã Tĩrtũm nom kêp Apraãw kra kumrêx. Jakamã hkra Ijak kanrêhã htàmnhwỳjaja na pre Tĩrtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰ Tã nhũm Ijakja hprêk nê Repek o hprô. Nê gaa nê ra haxwỳja wa hkra nhũm hkraja wa ahpo nê kato nê wa hamê my. Kot wa pê Ejau nhũm kot hapu pê Jako. ¹¹⁻¹² Nom nhũm kormã wa kator kêt ri nhũm Tĩrtũm wa hkukamã tanhmã wa harênh to. àhpumunh xà hkôt wa katorxà mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê

hprêk hãmri nhũm kot haputa amnhĩ to rax o kot wa jakre. Anẽ.

Kot wata koja kot hapu kĩnhã amnhĩ to grire nẽ ri pa nhũm ã wa hkukamã wa harẽnh anẽ. Kãm wa kot tanhmã amnhĩ nhĩpêx to hprãm xà hkôt ã wa harẽnh anẽ. Kormã wa kot tanhmã amnhĩ tomnuj to rỳ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harẽnh anẽ. ¹³ Tĩrtũm kapêr ã kagà htũm kot wa harẽnh nẽ wa hã kagà kot:

Ejau rom Jako kanrêhã hkra nẽ htàmnhwỳ pixjaja na pre Tĩrtũm amnhĩm mẽ ho hkra. Anẽ.

¹⁴ Mãn ka mẽ Tĩrtũm kot ã wa harẽnh anhỹrja ma nẽ ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nẽ wa htàmnhwỳ piitã ho hkra hkêt nẽ? Anẽ.

Kwa mẽ ã ajamaxpêr anhỹr kêt nẽ. Tĩrtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nẽ ãm omu nẽ amnhĩ tã tanhmã kãm nẽ hkêt nẽ. ¹⁵ Na pre finat Mojes mã amnhĩ jarẽnh o:

Inhmã hprãm xà hkôt na pa hte mẽ omu nẽ tanhmã mẽ kamã ixukaprĩ hto ho ri ixpa.

Nẽ inhmã hprãm xà hkôt na pa hte ahpỹnhã tanhmã mẽ hipêx to ho ri ixpa.

Anhỹr o kãm amnhĩ jarẽ. ¹⁶ Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprĩ hkêt nẽ. ãm tãm kãm hprãm xà hkôt na hte tanhmã mẽ pakamã ukaprĩ hto ho pa. ¹⁷ Amnepê mã Ejit kãm mẽ õ pahihtĩ Paraohiti hwỳr na pre Mojes mẽ nhũm ma hwỳr mỗ nẽ kãm tanhmã Tĩrtũm kapêr jarẽnh to nẽ kãm:

—E Tîrtûm na awÿr inhmê pa mō. Tām na pre apê Ejit nhō xwÿnhjê nhō pahi kaxyw axām. Akrā hihtÿx tã nhûm mẽ kaxyw axām. Tã ra xatã àhpumunh tÿx o tanhmã anhîpêx to. Krî piitã hkôt ri mẽ pa xwÿnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awÿr inhmê pa man awÿr mō. Anê.

¹⁸ ã na hte Tîrtûm kãm hprãm xà hkôt tanhmã mẽ panhîpêx anhÿr to ho pa. Jao mẽ hkwÿjê kamã ukaprî ho pa. No mẽ hkwÿjaja nhûm tee ri mẽ hkrã hihtÿx ã mẽ omu nê ãm mẽ omu nhûm mẽ amnhî krã hkôt ri tanhmã amnhî tomnuj to ho ri pa.

Tîrtûm kêp mẽ pakamã ukaprî xwÿnh ã harênh

¹⁹ Nê kot kaj mẽ atō Tîrtûm kot ã mẽ hipêx anhÿrja ã harênh ma nê tanhmã hã ixkukjêr to nê inhmã:

—Kwa na xep hte Tîrtûm ahpÿnhã tanhmã mẽ hipêx to. Nê mẽ hkwÿjê kamã ukaprî ho pa nê mẽ hkwÿjaja mẽ hkrã hihtÿx ã mẽ omu nê ãm mẽ omu nê mẽ kamã ukaprî hkêr nê. Jakamã kwa mo na hte mẽ kot amnhî tomnuj xwÿnh ã mẽ harê? Tām kot ã mẽ hipêx anhÿr kênã kot kêt mẽ kot amnhî tomnuj xwÿnh ã mẽ harê.

Anhÿr o ajamaxpêr japêr. ²⁰ Kwa mẽ ri ã atÿx Tîrtûm jarênh anhÿr kêt nê. E pa mẽ amã ejêp jarê ka mẽ inhma. Xà kot mēhō gyw kwÿ ho amnhîm poti nhîpêx nhûm tee ri amnhî tã omu nê amnhî tã tanhmã kãm kapêr to nê kãm: “Tk. Kwa mon ka ri ã inhîpêx anê?” Anhÿr o amnhî tã kãm kapêr? Nà koja kãm tanhmã nê hkêr nê. ²¹ Hipêx xwÿnh kãm hprãm xà hkôt kot ã hipêx anhÿr kênã kot kêt amnhî tã kãm akir. Koja amnhîm gyw kwÿ kakwÿ

nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no âm wamta kĩnhã ho hanhàjti nhũm omnajti nê xa. No âm tãm kot hamê wa hipêx prãm xà hkôt wa hipêx kênã.

²² Tã na hte ã Tĩrtũm mẽ panhĩpêx anê. Te poti pynajre pyrà nê mẽ pahkwỳjê nhĩpêx nhũm mẽ kãm kapêr mar prãm kêt nê htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nê te amnhĩ nê mẽ rênh kaxyw pyræk o mẽ hipêx no âm kormã hamaxpêr o:

—Nà kot paj nhỹrmã mẽ kot amnhĩ tomnuj mỳrapê mẽ ho ijabêx pa nhũm mẽ piitã ja hã ixpumu nê inhmã ixàhpumunh o ixàhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

²³ Nom na hte jajê rom mẽ pahkwỳjê nhĩpêx o te poti mexta nhĩpêx pyrà nê amnhĩ kaxyw mẽ pax-unhwỳ nê mẽ pahto hkra kaxyw. Nê mẽ pajarênh o:

—Nà koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwỳ pa ja hã mẽ omu nê mẽ kamã ixukapĩrĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhỹrmã Ixkra mẽ wa ixri htĩr tũm nê mex nê pa ho pa. Kot paj ã mẽ ho mex anê nhũm mẽ amnhĩ tã ixpumu nê inhmã inhmex o inhmex ã ijarênh o pa. Anê.

Ã na hte Tĩrtũm ahpỹnhã mẽ pahpiitã mẽ panhĩpêx anê.

²⁴ Nê na hte mẽ ixpê Ijaew pix o hkra hkêt nê. Na hte mãânên mẽ apê Ijaew kêt xwỳnhjê ho hkra.

²⁵ Amnepê mã mẽ kãm kapêr jarênh o ri mẽ pa

xwỳnhjê hõ pê finat Ojejja na pre te Tĩrtũm tãm kot Ijaew kêt xwỳnhjê jarẽnh pyrà nẽ mẽ harẽnh o: Amnepêm na pa pre mẽ ho ixkra hkêt tã kot paj mẽ hkwỳjê ho ixkra.

Na pa pre mẽ kamã ixukapĩ hkêt tã pa ra inhmã mẽ hapê nẽ.

²⁶ Nẽ ixte mẽ kêp ixkra hkêt ã mẽ harẽnh tã kot paj ra mẽ kêp ixkra hã mẽ harê.

Ixpê mẽõ Tĩrtũm kot paj ã mẽ harẽnh anẽ. Anẽ.

²⁷ Hãmri nhũm finat Ijais Ojej pãnhã tanhmã Ijaew jarẽnh to. Ijaisja Tĩrtũm nhỹ hã kapêr jarẽnh o ri pa xwỳnhjê hõ na pre. Jakamã nhũm Tĩrtũm kãm tanhmã mẽ ijarẽnh to nhũm kuma nẽ ô ri mẽ ixkukamã mẽ inhĩgêxjê mã ujarẽnh o pa nẽ hã kagà. Nẽ hã kagà ho:

Ijaew na mẽ ohtô rax kumrêx.

Te gô xujanâr mỳri pykahti grà hkryre xohtô pyræk.

Tã koja mẽ piitã ixkôt amnhĩ xunhwỳr kêt nẽ.

Koja mẽ ãm grêre nẽ amnhĩ kaxyw inhmã hamaxpêr nẽ ixkôt amnhĩ xunhwỳ.

Jakamã mẽ tapxipixjaja koja hkwỳjê rom nhỹrmã inhõ krĩ hwỳr api.

²⁸ No mẽ kot amnhĩ kaxyw inhmã mẽ hamaxpêr kêt xwỳnhjaja kot paj tokyx tanhmã mẽ harẽnh to.

Mẽ kot amnhĩ tomnuj mỳrapê tanhmã mẽ harẽnh to nhũm mẽ ma mẽ kot amnhĩ xà htỳx kamã hamak tũm xàta wỳr ma pa.

Nà kot paj tokyx ã mẽ hipêx anẽ.

Anhỹr o mẽ harê. ²⁹ Nom nhũm kormã ã mẽ harẽnh anhỹr kêt ri nhũm ra wam tanhmã mẽ harẽnh to nẽ mẽ harẽnh o:

Amnepê m Sotô m Komo kamã m pa xwýnhjaja
na prem amnhĩ tomnuj tỳx rãhã ho ri pa.

Mýrapê nhũm Tĩrtũm xàhpumunh o àhpumunh
xwýnhja tee ri ja hã m omu hãmri nẽ
kaxkwa rũm m õ krĩ wa hipy mẽmoj pôôta
rẽ.

Nhũm m hã rôrôk nẽ m ho hkaxàr pa nhũm m
hapêx.

Tã na pu htem mẽ uràk nẽ amnhĩ tomnuj o ri papa.
Jakamã kop ãm Tĩrtũm kot mẽ pahkwýjê kamã
ukaprĩ kêt ronhỹx pu mẽ ra mẽ uràk nẽ
pahpiitã pajapêx pa. Anẽ.

*Ijaew kwý kot Jejus kôt amnhĩ xunhwýr kêt ã mẽ
harẽnh*

Rôman 10.1-4

³⁰ Nẽ Ijaew kêt xwýnhjaja na prem Ijaew pyrà nẽ
kãm Tĩrtũm prãm kêt tã Jejus jarẽnh ma nẽ Ijaew
rom amnhĩ kaxyw hkôt hamaxpêr nẽ hkôt amnhĩ
xunhwý. Hãmri nhũm Tĩrtũm ja hã m omu nẽ mẽ
ho hkra nẽ mẽ kot amnhĩ to mex xwýnhjê hã mẽ
harẽ. ³¹⁻³² Hãmri nhũm Ijaew tee ri mẽ kot Jejus kôt
amnhĩ xunhwýr ã mẽ omu nhũm ja mẽ kãm mex
kêt nẽ. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt
amnhĩ nhĩpêx mex o ri mẽ ixpa xwýnh jakamã koja
Tĩrtũm ja hã mẽ ixpumu nẽ mẽ ixte amnhĩ to mex
xwýnhjê hã mẽ ijarẽ nẽ mẽ inhnê mẽ ixte amnhĩ
tomnuj rên pa. No kot paj mẽ Ijaew kêt xwýnhjê
pyrà nẽ Jejus kôt amnhĩ xunhwýr kêt nẽ. ãm kwarĩ
ho kwarĩ.

Anhỹr ã amnhĩ jarẽ. No ãm ã mẽ hamaxpêr
anhỹrja mex kêt. Na prem htỳx Tĩrtũm noo mã
kot amnhĩ to mex ã amnhĩ jarẽnh kaprý nẽ arĩ

ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mênh kaxyw hkamnâr nê ho amnhĩ par krã hi kukênh pyrâk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprâm xàj te Je-jus kapêrja nhãm amnhĩ nê rênh pyrâk o hipêx. Jakamã koja mẽ Tĩrtũm nhõ krĩ hwýr àpir kêt nê.

³³ Tĩrtũm kapêr ã kagà htũm kot ja jarênh kot:

E mẽ inhma. Kot paj nhỹrmã Ijaewjê hwýr mēhō mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nôr nhũm mẽ kot nhãm pry nê mênh kaxyw hkamnâr nê ho amnhĩ par krã hi kukênh pyrâk o koja mẽ amnhĩ nhĩpêx.

No te mẽ kot nhãm pry nê mênh kaxyw hkamnâr kêt pyrâk xwýnhjaja koja mẽ kurom nhỹrmã ma Tĩrtũm nhõ krĩ hwýr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyrâk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o rĩ pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnâr pyrâk kêt nê. Jakamã ã mẽ harênh kot anhỹr.

10

¹ Hêxta waa nê. Ijaxwýja ixpê Ijaew. Mẽ kêp ixkwý jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwýr ronhỹx pa ixkĩnh týx kumrêx. Inhmã mẽ kêp Tĩrtũm kra

hprãm tỳx kumrẽx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa. ² Ra ixte mẽ omunh mex. Mẽ kãm Tĩrtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprỳ. ³ Nhũm pre Tĩrtũm tee ri amnhĩ tã mẽ omu nẽ hamaxpêr o:

—Koja mẽhõ amnhĩ kaxyw Ixkra Kris kôt hamaxpêr nẽ hkôt amnhĩ xãm pa ja hã omu nẽ kot amnhĩ to mex xwỳnh ã harẽ nẽ ho ixkra kurê kumrẽx. Nom na hte Ijaew ohtô nẽ ã amnhĩ nhĩpêx anhỹr kêt nẽ.

Anhỹr o mẽ harẽ. ãm hãmri na ã mẽ harẽnh anẽ. Na htem ãm axtem nẽ hamaxpêr o:

—Tk. Kot paj amnhĩ kaxyw Kris kôt ijamaxpêr nẽ hkôt amnhĩ xãm kêt nẽ. Kot paj ãm pam amnhĩ krã hkôt tãm ri amnhĩ nhĩpêx o ri ixpa. Mẽ ixpê Ijaewjê mẽ ixte amnhĩ nhĩpêx xà hkôt. Hãmri nhũm Tĩrtũm ja hã ixpumu nẽ amnhĩm inhmex ã ijarẽ. Nom kot paj Kris kôt amnhĩ xãm kêt nẽ. ãm kwarĩ ho kwarĩ.

Anhỹr ã amnhĩ jarẽ. ⁴ Nom na htem ãm htỳx ri amnhĩ krã hkôt amnhĩ to mex o pa hã amnhĩ kamnhĩx kaprỳ. Koja mẽ tee ri kãm finat Mojes kapêr kôt amnhĩ nhĩpêx o ri pa hprãm kaprỳ. Jejus tapxipix na pre tãm amnhĩ nhĩpêx mex rãhã ho pa. Nã pre Tĩrtũm kapêr kôt amnhĩ nhĩpêx mex o ri pa nẽ aa kapêr õ nhĩrôp ãm nẽ hkwỹm ri tanhmã amnhĩ tomnuj to hkêt nẽ. Kot amnhĩ tomnuj kêt xwỳnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwỳnh ã mẽ pajarẽ.

Tĩrtũm kãm mẽ pahpiitã mẽ pahto hkra hprãm ã harẽnh

⁵ Nẽ amnepêm na pre finat Mojes Tĩrtũm nhỹ hã Ijaew mã tanhmã ujarẽnh to nẽ hã kagà. Nẽ mẽ kãm ujarẽnh o:

—E kot kaj mẽ atõ Tĩrtũm nhỹ hã ixujarẽnh ma nẽ hkôt amnhĩ nhĩpêx mex o ri apa nẽ hkwỹm ri tanhmã amnhĩ nhĩpêx to hkêt nẽ. Hã koja Tĩrtũm hã apumu nẽ amnhĩm ate amnhĩ to mex xwỳnh ã ajarẽ ka nhỹrmã kuri atĩr tũm nẽ amex nẽ apa ho apa. Anẽ.

⁶ ã mẽ kãm kapêr anhỹr tã mẽ pahte Mojes kapêr xà hkôt amnhĩ nhĩpêx o papaja na mẽ pahpê hihtỳx kumrêx. Tĩrtũm kapêr tũm na. Kapêr ã kagà kamã kot mẽ pamã mẽ pahte tanhmã amnhĩ nhĩpêx to hã karõja ohtô rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprỳ. Nhũm Tĩrtũm tee ri amnhĩ tã mẽ pajamã hãmri nẽ mẽ pahwỳr Kra Jejus mẽ. Jakamã na pu htem amnhĩ kaxyw hkôt pajamaxpêr nẽ hkôt amnhĩ xunhwỳ nhũm Tĩrtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwỳr mẽn̄h nhũm mẽ kot hpĩr nhũm akupỹm ho htĩr jakamã na pu htem harẽnhja ma nẽ pajamaxpêr o:

—Nà na xep pre Jejus ixto ixpê Tĩrtũm kra. Anẽ.

Nom xà na hte Tĩrtũmja ã mẽ pamã kapêr anẽ nẽ mẽ pamã:

—E kot kaj mẽ ma kaxkwa hwỳr api nẽ Kris japrô nẽ man amnhĩ kôt akupỹm o wrỳ pa ja hã mẽ apumu nẽ mẽ ato ixkra.

Anhỹr o mẽ pamã kapêr? Nà na hte ã mẽ pamã kapêr anhỹr kêt nẽ. Tanhmã kot puj mẽ amnhĩ to

ně ã amnhĩ nhĩpêx anê? ⁷ Rỳ xà na hte ã mẽ pamã kapêr anê mẽ mẽ pamã:

—E na pre Krisja ty. Jakamã mẽ kam mẽ ma hwỳr mra mẽ akupỹm amnhĩm ho htĩr. Hãmri pa ja hã mẽ apumu mẽ mẽ ato ixkra.

Anhỹr o mẽ pamã kapêr? Nà na hte ã mẽ pamã kapêr anhỹr kêt mẽ. Tanhmã kot pu mẽ amnhĩ to mẽ akupỹm ho htĩr? Ja pyrà mẽ na hte Tĩrtũm mẽ pamã mẽmoj tã karõ pu mẽ kãm ho anhỹr nhũm ja hã mẽ pahpumunh kôt mẽ pahto hkra hkêt mẽ.

⁸ ãm mẽ pahte amnhĩ kaxyw Jejus kôt pajamaxpêr mẽ hkôt amnhĩ xunhwỳr ã mẽ pahpumunh kôt pix mã na hte mẽ pahto hkra. Hãmri mẽ mẽ pahwỳr Karõ rê nhũm mẽ pahkarõ mã gjêx jakamã mẽ pahte Tĩrtũm kãm hprãm xà hkôt amnhĩ nhĩpêx o papaja na mẽ pahpê hihtỳx kêt. Te kapêr ra mẽ pahkrã hi kaxwỳnh kãm hikwỹ pyrak o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa mẽ mẽ kãm:

⁹ —Kot ka mẽ atõ Jejus kêp anhõ Pahihti hã harê mẽ Tĩrtũm kot akupỹm ho htĩr kôt ajamaxpêr. Hã koja Tĩrtũm ja hã apumu mẽ anê ate amnhĩ tomnuj o hapêx mẽ ato hkra. ãm ja pix ã mẽ pahpumunh kôt na hte mẽ pahto hkra. Anê.

¹⁰ Nẽ na pu htem mẽ pahkrãhi kaxwỳnh kãm amnhĩ kaxyw Jejus mã pajamaxpêr. Nẽ mẽ pajakwa ho kêp mẽ panhõ Pahihti hã harê. Hãmri nhũm Tĩrtũm ja hã mẽ pahpumu mẽ amnhĩm mẽ pahte amnhĩ to mex xwỳnh ã mẽ pajarẽ mẽ mẽ pahto hkra. ¹¹⁻¹³ Tã mẽ pahte amnhĩ kaxyw

Jejus kôt pajamaxpêr nê hkôt amnhĩ xunhwÿr xwÿnhjaja kot puj mẽ pahkĩnh nê papa ho papa. Mẽ pahpiitãã. Ijaew nê Ijaew kêt xwÿnhjaja. Mẽ pahpiitã mẽ panhõ Pahi Maatija âm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ to kuwÿ nhũm kuma nê ho hkra. Kapêr ã kagà htũm kot ja jarênh kot:

Mẽ kãm kêp Tĩrtũm kra hprãm xwÿnhjaja koja mẽ amnhĩ to Tĩrtũm wÿ nhũm mẽ kuma nê Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nê mẽ ho hkra nhũm mẽ hkĩnh nê pa. Anê.

14-15 Xà na htem kormã amnhĩ kaxyw Kris mã hamaxpêr kêt rãhã amnhĩ to Tĩrtũm wÿ nhũm mẽ kuma nê mẽ ho hkra? Nà tanhmã kot wem amnhĩ to nê amnhĩ kaxyw kãm hamaxpêr kêt rãhã amnhĩ to kuwÿ? Na hte Tĩrtũm ma mẽ hwÿr mẽ hkwyjê rẽ nhũm mẽ ma mẽ hwÿr mra nê Tĩrtũm kapêr o mẽ ahkre ho ri mẽ hkôt pa. Nhũm mẽ hkwyjaja mẽ kuma nê amnhĩ kaxyw Jejus kôt hamaxpêr nê amnhĩ to Tĩrtũm wÿ. Kapêr ã kagà htũm kot ja jarênh kot:

Koja mẽmoj mex jarênh xwÿnhjaja ma mẽ hwÿr mra.

Nê mẽ hwÿr hpôx o mỗ nhũm mẽ amÿm amnhĩ wÿr mẽ omu nê hkĩnh nê. Anê.

16 Tã ra mẽ piitã kot kapêr mar tã piitã amnhĩ kaxyw hkôt hamaxpêr kêt nê. Jakamã nhũm finat Ijais tee ri ja hã mẽ omu nê Tĩrtũm mã mẽ harênh o:

Pa Pahi Maati. Kwa ra mẽ kot akapêr mar tÿx tã akôt amnhĩ nhĩpêx kêt nê. Mẽ kãm akapêr kôt amnhĩ nhĩpêx o pa hprãm kêt. Na htem

ăm grêre nê akôt amnhĩ xunhwỳ nê akôt amnhĩ nhĩpêx o ri pa. Anê.

17 Kot anhỹr tă ăm mẽ kot Kris kapêr jarênh mar kôt pix mã na htem amnhĩ kaxyw hkôt hamaxpêr. Koja mẽ harênh mar kêt tă tanhmã koja wem amnhĩ to nê amnhĩ kaxyw hkôt hamaxpêr nê hkôt amnhĩ xunhwỳ? 18 Mãn ka mẽ atõ atỳx ă ajamaxpêr anhỹr o:

—Ko mãn Ijaew kormã Jejus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkôt amnhĩ xunhwỳr kêt nê.

Anhỹr o ajamaxpêr. Nom ja kot anhỹr kêt. Ijaew piitã ra mẽ kot harênh mar kênã. Tĩrtũm kapêr ă kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anê.

19 Tã mãn ka prem ra ja ma nê atỳx ajamaxpêr o:

—Kot anhỹr tă no mãn kormã hprĩ hã Jejus jarênh mar kêt jakamã mẽ hkôt amnhĩ xunhwỳr kêt nê. Anê.

Nom ja haxwỳja kot anhỹr kêt. Ra mẽ kot hprĩ hã harênh mar mex tă kuma nê ăm kuma nê amnhĩ kaxyw kãm hamaxpêr kêt nê. No mẽ apê Ijaew kêt xwỳnh kwỳjaja na ka mẽ kurom harênh ma nê amnhĩ kaxyw hkôt ajamaxpêr nê hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nê mẽ akamã gryk tỳx nê. Nom ra Tĩrtũm kot ă mẽ hkukamã mẽ kot amnhĩ nhĩpêx anhỹr ă mẽ omunh nê mẽ harênh kot anhỹr kênã. Na pre finat Mojes mẽ kãm tanhmã hã kagà hto. Te Tĩrtũm tãm kot mẽ hã kagà pyrà nê kapêr ă kagà htũm kamã kot mẽ harênh kot:

Mẽ ate mẽ kamã mẽ akahak o apa xwỳnhjaja.

Mê kot htỳx ri amnhĩ nhĩpêx o mẽ pa hã mẽ ate mẽ
harênh tã no kot paj mẽ arom amnhĩm mẽ
kot amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nê mẽ kamã agryk
tỳx kumrêx.

Nê mãnên pa ixte mẽ ho mex ã ixpumu nê mẽ hã
ixkamã agryk nê. Anê.

²⁰ Nê finat Ijais na pre haxwỳja ã mẽ harênh anê.
Na pre kãm amnhĩ kwỳ pê Ijaew pyma hkêt nê
xatã Tĩrtũm nhỹ hã tanhmã mẽ kãm Ijaew kêt
xwỳnhjê jarênh to ho pa. Te Tĩrtũm tãm kot mẽ
harênh pyræk o mẽ kãm:

Nà Ijaew kêt xwỳnhjaja kot Tĩrtũm japêr kêt tã koja
tãm mẽ kãm amnhĩ to amnhĩrĩt nhũm mẽ
hkôt amnhĩ xunhwỳ.

Mê kot kormã amnhĩ kaxyw kãm hamaxpêr kêt tã
koja tãm mẽ kãm amnhĩ to amnhĩrĩt. Anê.

²¹ ã Ijaew kêt xwỳnhjê jarênh kot anhỹr. Nê axte
mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw
tee ri amnhĩ wỳr mẽ kãm àkjêr pyræk o na
hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã
no nhũm mẽ amnhĩ tã kuma nê ãm kuma nê
hkôt amnhĩ nhĩpêx kêt nê. Anê.

11

Tĩrtũm kot Ijaew kamã ukaprĩ hã harênh

Matêwre 13.10-17

¹ Tã ra Ijaew kot Tĩrtũm kaga jakamã mãn ka mẽ
atõ mẽ harênh ma nê ajamaxpêr o:

—Mãn pre Tĩrtũm tee ri amnhĩ tã mẽ omu nê
amnhĩ pyrà nê mẽ hkaga.

Anhỹr o ajamaxpěr. Nom na pre mẽ hkaga hkêt nẽ. Ijaxwỳja ixpê Ijaew na pa. Mẽ uràk nẽ ixpê Ijaew pàr krax pê finat Apraãw kanrêhã htàmnhwỳ Pějãmĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt. ² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrà xohtô nẽ hapêx nhũm mẽ hapôj hãmri nẽ Tĩrtũm kôt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tĩrtũm mã tanhmã mẽ harênh to nẽ mẽ hã kagà. Nẽ hã kagà ho:

³ Kwa Tĩrtũm. Mẽ ixte amã amnhĩ jarênh xà hã mēsti hkwỳ na prem ra hkrakrak pa. Nẽ anhỹ hã akapěr jarênh o ri mẽ pa xwỳnh kwỳ nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴ Tã tanhmã na Tĩrtũm kutã kãm kapěr to? Na pre kãm:

Nà kapxipix na ka arĩ atĩr kêt nẽ. Arĩ mẽ ohtô nẽ apyrà nẽ amnhĩ kaxyw ixkôt hamaxpěr. Mẽ ohtôô. Arĩ mẽ kêp 7.000 nẽ akwỳjê rom ri sãnti Paaw kutã hkõnkrã ho hkrĩ nẽ kãm mex ã harênh kêt nẽ. Anẽ.

⁵ Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukaprĩ. Jakamã nhũm ra mẽ hkwỳjaja mẽ pahpyrà nẽ amnhĩ kaxyw Kris kôt hamaxpěr nhũm Tĩrtũm mẽ ho hkra. ⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nẽ. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho

hkra ronhỹx amarĩ mẽ ho hkra hkêť nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tĩrtũm kot amnhĩm mẽ mex ã mẽ harênh prãm tã no ãm mẽ grêre nê hamaxpêr xà hkôt Jejus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrà nê pa. ⁸ Tĩrtũm kapêr ã kagà htũm kot mẽ harênh kot:

Tĩrtũm na hte mẽ kãm kapêr mar prãm kêt xwỳnhjê pumu nê ãm mẽ omu nhũm htem htỳx ri pa ho pa. Nê Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar tỳx kêt nê. Nê mẽ kot kapêr ã kagà kamã harênh tã hprĩ hã mar tỳx kêt nê. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nê mẽ hamak kro xwỳnh kot amnhĩ nhĩpêx pyràk. Anê.

⁹ Nê amnepêem na pre pahĩ finat Tawija amnhĩ kwỳ Ijaew jarênh o:

Na htem htỳx ri hkĩnh kãm apkur o pa.

Te tutre kãm prãm nê kot rapuuti hwỳr àr nê tee ri kãm kator prãm kaprỳ pyràk.

Ja pyrà nê mẽ kot Tĩrtũm kapêr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

¹⁰ Te mẽ nohkre xwỳnhjaja tee ri mẽ hpa nhĩpêx o pa pyràk.

Ně omnuj ně à ně ho gjêx o ri pa pyràk o amnhĩ nhĩpêx o ri pa.

Anhỹr o mẽ harê. ¹¹ Tã arĩ Ijaew Jejus kaga ně kãm kapêr mar prãm kêt jakamã xà na Tĩrtũm tee ri ja hã mẽ omu ně mẽ hkaga kumrêx? Nà kot mẽ hkaga hkêt. Ām mẽ tãmjaja kêp Jejus prãm nōkati jakamã nhũm tee ri ja hã mẽ omu ně mẽ hpãnhã Ijaew kêt xwỳnhjê mã amnhĩ to amnhĩrĩt ně mẽ hkwỳjê ho hkra. Jakamã koja Ijaew kwỳjaja ja hã mẽ omu ně tee ri hamaxpêr ně hamaxpêr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu ně mẽ ho hkra. Kwa mon pu prem axtem ně ri Jejus kaga? E pu mẽ kuxwar amnhĩ kaxyw hkôt mãn pajamaxpêr ně hkôt amnhĩ xunhwỳ kê Tĩrtũm ja hã mẽ pahpumu ně Ijaew kêt xwỳnhjê pyrà ně mẽ pahto hkra. Hãmri ně amnhĩ mã mẽ pahte amnhĩ to mex xwỳnh ã mẽ pajarê. Anê.

Ā Ijaewjaja hamaxpêr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrĩt. ¹² Hãmri nhũm mẽ amnhĩ tã omu ně hkĩnh ně pa. No nhũm Ijaew kwỳjaja. Mẽ kãm Jejus prãm nōkati ho mẽ pa xwỳnhjaja mẽ hkĩnhã hkaprĩ ně pa. Tã koja mẽ nhỹrmã amnhĩ kaprĩ hã amnhĩ pumu ně amnhĩ kĩnh kêt ã amnhĩ pumu hãmri ně Tĩrtũm kôt amnhĩ xunhwỳr ně amnhĩ kaxyw Kra Jejus Kris mã hamaxpêr japêr. Koja mẽ ã amnhĩ nhĩpêx anê hãmri ně Ijaew kêt xwỳnhjê pyrà ně hkĩnh ně ri pa. Hãmri nhũm Tĩrtũm ja hã mẽ omu ně Ijaew kêt xwỳnhjê mẽ mẽ ho hpimràatã mẽ ho mex rax ně nhũm mẽ hkĩnh ně hamakêtkati ně pa ho pa.

Tĩrtũm kot Ijaew kêt xwỳnhjê ho hkra hã harênh

¹³ E kot paj hpânâ mē apê Ijaew kêt xwýnhjê mã ixkapêr nê mē atã kagà. Na pre Jejus ma mē awýr inhmê. ý hã ixte mē ajahkre ho ri mē akôt ixpa kaxyw. Pa pre ma krĩ hkwý kamã mē akwýjê hwýr mō nê ixkĩnh kãm mē kãm kapêr jarênh o ri mē hkôt ixpa. Nhũm mē hkwýjaja inhma nê amnhĩ kaxyw Jejus kôt hamaxpêr nê hkôt amnhĩ xunhwý. ¹⁴ Tã koja apu ixkwýjaja mē harênh mar japêr. Ijaew tee ri mē apê Ijaew kêt xwýnhjê jarênhja ma hãmri nê ra amnhĩ kamã gryk japêr. Jao mē apyrà nê Jejus kôt amnhĩ xunhwý nê nhỹrmã kuri htĩr tũm nê mex nê pa ho pa. ¹⁵ Kormã mē kot amnhĩ kaxyw kãm hamaxpêr kêt jakamã na pre Tĩrtũm hpânâ mē apê Ijaew kêt xwýnhjê mã amnhĩ to amnhĩrĩt. Ka mē ra krĩ piitã hkôt axohtô nê hkôt amnhĩ xunhwý nê hkôt amnhĩ nhĩpêx mex o ri apa. Tã koja Ijaewjaja nhỹrmã amnhĩ kaxyw Tĩrtũm mã hamaxpêr nê mē apyrà nê Jejus kôt amnhĩ xunhwýr japêr. Hãmri nê te mēhō hkra kêp htyk nhũm hkaprĩ htã nhũm hkraja tanhmã amnhĩ to nê akupỹm kãm htĩr nhũm kot omunh nê hkĩnh tỳx kumrẽxta pyràk o amnhĩ nhĩpêx. Jao Tĩrtũm mē kot hkôt amnhĩ xunhwýr ã mē omu nê hkĩnh nê. Pu mē pahpimràatã uràk nê pahkĩnh nê ri papa.

¹⁶ E pa mē amã mē ujarênhja ã ejêp kwý jarê. Koja mēmo pĩ hpàr jarê mex nê hã koja pàr mex nê xa. Ja pyrà nê Ijaew pàr krax finat Apraãwja kumrẽx na pre amnhĩ kaxyw Tĩrtũm mã hamaxpêr nhũm ho hkra. Jakamã koja nhỹrmã hkanrêhã htãmnhwýjaja uràk nê amnhĩ kaxyw kãm hamaxpêr nhũm mã mē ho anê nê mããnên mē ho

hkra nhũm mẽ mex nê pa. Te kot mẽmo pĩ hpàr jarê mexja nhỹ hã pàr mexta pyràk.

¹⁷ Nê na htem akunĩ kamã mẽmo pĩ hpa jakà nê hamỹ nê ma amnhĩ kôt o mra. Nê ixkre kapem ra mẽ kot mẽmo pĩ hkreja hpa jakàr nê rênh xwỳnh xwakre kamã wam pĩ hpa jakàr xwỳnhhta nhô nê axpên tã hkaxpre nê gaa nê axpên jamỳnh mex nê grà hkêr nê. Nê arĩ htĩr mex nê. Te kêp hpa kumrêx pyràk. Tã Ijaew kwỳ kot amnhĩ kaxyw Jesus kôt hamaxpêr xwỳnhjaja te mẽ kêp ixkre kapem pĩ hpàrta pyràk. No mẽ hkwyjaja mẽ kot Jesus kaga xwỳnhjaja te mẽ kêp mẽ kot kêp hpa jakàr nê rênhta pyràk. Jakamã nhũm Tĩrtũm te mẽ kot pàr pê hpa jakàr nê rênhta pyràk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pĩ hpa janhôr nê hã hkaxpreta pyràk o mẽ apê Ijaew kêt xwỳnhjê nhĩpêx nê mẽ amã amnhĩ to amnhĩrĩt. Ka mẽ ra amnhĩ kaxyw Jesus mã ajamaxpêr nê hkôt amnhĩ xunhwỳ nhũm Tĩrtũm mẽ ato mex nê.

¹⁸ Tã kêr ka mẽ arĩ Ijaew o mex o ri apa. Tanhmã ri mẽ hipêx to mã ajamaxpêr to hkêr nê. Rỳ ajamaxpêr o:

—Nà ãm hãmri na Tĩrtũm mẽ hkaga nê ãm kãm mẽ papxipixjê japê.

Anhỹr o ajamaxpêr kêt nê. Ijaew te ixkre kapem pĩ hpàr mexta pyràk. No mẽ kajaja te mẽ ate akunĩ rũm pĩ hpa kot ixkre kapem pàr mex pix kukwak ri htĩr nê hã harirta pyràk. Kêt akunĩ rũm pĩ hpa jakàr kukwak ri na hte ixkre kapem pàrta htĩr nê kuhê hkêr nê. Kop apu pàrta mex kêt ronhỹx ra akunĩ rũm hpaja grà pa. Ja pyrà nê Ijaew kukwak ri kot kaj mẽ nhỹrmã Tĩrtũm ri atĩr tũm nê apa ho

apa. Jakamã kwa kêr ka mẽ ate amnhĩ to rũnh o mẽ hakrenh ã amnhĩ to jarkrar kêt nẽ. ¹⁹ Mãn ka mẽ atõ ajamaxpêr o:

—Ra Tĩrtũm kot Ijaew kaga nẽ hpãnhã mẽ pajaja mẽ ixto hkra jakamã mãn kãm mẽ ijapê ho mẽ hakre. Ra mẽ hpãnhã mẽ ixto hkra kênã. Anẽ.

²⁰ Nà ãm hãmri na pre Tĩrtũm Ijaew kwý kaga. Mẽ kot Jesus kôt amnhĩ xunhwýr kêt mýrapê na pre te mẽmo pĩ hpa jakàr nẽ rênhta pyràk o mẽ hipêx. Ka mẽ ra mẽ kurom amnhĩ kaxyw hkôt ajamaxpêr jakamã nhũm Tĩrtũm te kot akunĩ kamã pĩ hpa jakàr nẽ ho htẽm nẽ ixkre kapem pĩ hpàr mex ã hanhôr nẽ hã hkaxpre pyràk o mẽ anhĩpêx. Nom kwa kêr ka mẽ ja hã amnhĩ pumu nẽ ri hã Ijaewjê mã amnhĩ to jarkrar kêt nẽ. ãm amnhĩ to mex nẽ Tĩrtũm kapêr kôt amnhĩ nhĩpêx mex o ri apa. No kot kaj mẽ ã amnhĩ nhĩpêx anhýr kêt nhũm amnhĩ tã mẽ apumu nẽ ra kot Ijaew kwý nhĩpêxta pyrã nẽ tanhmã mẽ ato nẽ mẽ akaga.

²¹ ã Ijaew jarênh kot anhýr. Te mẽ kêp pàr mex pyràk. Tã nhũm mẽ kot Jesus kôt amnhĩ xunhwýr kêt jakamã nhũm Tĩrtũm te kot pĩ hpa jakàr nẽ rênhta pyràk o mẽ hipêx nẽ mẽ homnuj nẽ. Kot kaj mẽ uràk nẽ ã amnhĩ nhĩpêx anẽ nhũm mã mẽ ato anẽ nẽ. ²² Ijaew kot Jesus kôt amnhĩ xunhwýr kêt jakamã nhũm Tĩrtũm mẽ hpãnhã mẽ apê Ijaew kêt xwýnhjê mã amnhĩ to amnhĩrĩt. Tã ka mẽ Ijaew rom amã Jesus prãm nhũm Tĩrtũm ja hã mẽ apumu nẽ amnhĩ pyrã nẽ kãm mẽ aprãm nẽ mẽ akamã ukapri rãhã nẽ pa ho pa. Tã kwa mẽ okora. Kêr ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu

ně te Ijaew kot hkaga xwỳnhjê nhĩpêx pyràk o mẽ anhiêpêx mẽ mẽ akaga.

²³ Koja Ijaew nhĩrmã Jesus kôt amnhĩ xunhwỳr japêr nhũm Tĩrtũm ja hã mẽ omu mẽ mẽ ho hkra. Te mẽ kot pàr pa jakàr mẽ rēnh nhũm grà par xwỳnh nhũm kot akupỹm amnhĩm hamỳnh mẽ ixkre kapem pàr wỳr o htēm mẽ akupỹm hã hanhōr mẽ hã hkaxpre ho htỳx nhũm kukwak ri akupỹm htĩrta pyràk. Ja kēp tanhmã kute hkêt. Kot ã hipêx anhiêr kaxyw àhpumunh tỳx. ²⁴ Mẽ apê Ijaew kêt xwỳnhjaja te mẽ ate akunĩ kamã pĩ hpa jakàr mẽ ixkre kapem pàr ã hanhōr mẽ hã kaxpreta pyràk. Jao Jesus kôt amnhĩ xunhwỳ nhũm mẽ ato hkra kurê kumrêx. No Ijaew te mẽ kēp ixkre kapem pàrta pyràk jakamã Tĩrtũm kot akupỹm hanhōrta tanhmã kēp kute hkêt. Kēp Tĩrtũm kēnã kot tanhmã kēp kute. Jakamã koja mẽ hkôt amnhĩ xunhwỳ nhũm amnhĩ tã mẽ omu mẽ mẽ ho hkra kurê kumrêx.

*Tĩrtũm kot mẽ piitã mẽ kamã ukaprĩ hã harēnh
Matêwre 23.37-39; Rukre 21.24; Juãw 10.16*

²⁵ E kot paj mẽ amã mẽmoj to amnhĩrĩt ka mẽ inhma. Nà na pa ra mẽ amã Ijaew krã xihtỳx xwỳnhjê jarē ka mẽ harēnh ma. Ra mẽ kot Jesus kaga hã mẽ harēnhja. Tã koja mẽ ã amnhĩ nhĩpêx anhiêr o pa rãhã hkêt mẽ. Na hte Tĩrtũm kormã amnhĩ tã mẽ apê Ijaew kêt xwỳnhjê jamār o pa. Amnepēm na pre amnhĩ kaxyw mẽ akukamã tanhmã mẽ akwỳjê jarēnh to. Tã kot kaj mẽ kot tanhmã mẽ ajarēnh to xwỳnh piitã Jesus kôt amnhĩ xunhwỳr pa nhũm rĩ Ijaew amnhĩ to hapu mẽ kormã hkôt amnhĩ xunhwỳ. ã mẽ kot amnhĩ

nhĩpêx anhÿr kaxyw. Jakamã kwa kêr ka mẽ ri ja
hã amnhĩ to jarkrar o ri mẽ hkôt apa hkêt nê. Mẽ
pahpyrà nê mẽ kot Jejus kôt amnhĩ xunhwÿr mã
xwÿnh kênã. ²⁶ Koja Tĩrtũm nhÿrmã Ijaew piitã ho
hkra. Kapêr ã kagà htũm kot mẽ harênh kot:

Nhÿrmã kot mẽ ate amnhĩ tomnuj pê mẽ apytàr mã
xwÿnhja Ijaew ò koja.

Jako hkanrêhã htàmnhwÿjê hõ koja.

Koja nhÿrmã wrÿ nê mẽ ate amnhĩ tomnuj pê mẽ
apytà nê mẽ ate amnhĩ tomnuj o hapêx pa.
Anê.

Anhÿr o kot harênh. ²⁷ Nê mãănên ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh
xà hkôt. Anê.

²⁸ Nom arĩ mẽ kãm Jejus mar prãm kêt jakamã
te mẽ kot kutã amnhĩ xunhwÿr pyràk o amnhĩ
nhĩpêx. Tã ã mẽ kot amnhĩ nhĩpêx anhÿrja ri ka mẽ
kamjaja mẽ hpãnhã mẽ apê Tĩrtũm kra. Nom nhũm
Tĩrtũm arĩ kãm mẽ hapêê. Na pre amnepê mã
kot tanhmã mẽ ho mex to hkukamã tanhmã mẽ
hã amnhĩ jarênh to. Mẽ hpàr kraxjê mã tanhmã
mẽ hã amnhĩ jarênh to. Finat Apraãw mẽ Ijak
mẽ Jakoja mã mẽ hkanrêhã mẽ htàmnhwÿjê hã
tanhmã amnhĩ jarênh to.

²⁹ Na hte Tĩrtũm mẽmoj tã tanhmã amnhĩ jarênh
to nê ãm hãmri hã amnhĩ jarê nê amnhĩ jarênh
xà hkôt tanhmã hipêx to. No na hte mẽmoj tã
amnhĩ jarênh tã gaa nê ho hamakêtkati hkêt nê. Rÿ
hpãnhã axtem tanhmã hipêx to hkêt nê. Na hte
mẽmoj tã amnhĩ jarênh xà hkôt tanhmã hipêx to.
Tã ra amnepê mã kot Ijaew o mex ã amnhĩ jarênh

jakamã koja nhÿrmã mẽ ho mex rax nẽ ã mẽ hipêx anhÿrja o hamakêtkati hkêť nẽ.

³⁰ No mẽ kajaja mẽ apê Ijaew kêt xwÿnhjaja. Amnepêm na ka prem ajaxwÿja Tĩrtũm kêt amnhĩ nhĩpêx kêt nẽ. Tã nhũm mẽ akamã ukapĩ nẽ kãm mẽ ajapê nẽ. Ka mẽ ra harênh ma nẽ hkôt amnhĩ xunhwÿ nẽ hkôt amnhĩ nhĩpêx mex nẽ. No ãm Ijaew kukwak ri. Mẽ kot kapêr kêt amnhĩ nhĩpêx o pa hkêť jakamã nhũm Tĩrtũm mẽ hpãnã nhãm mẽ amã amnhĩ to amnhĩrĩt nẽ mẽ ato mex rax nẽ. Jakamã te Ijaew kukwak ri mẽ amex nẽ ri mẽ apa pyræk. ³¹ Tã koja nhÿrmã kot mẽ anhĩpêxta pyræk nẽ Ijaew ho hkra. Nẽ mẽ apyræk nẽ mẽ kamã ukapĩ nẽ. Mẽ kot mẽ apyræk nẽ amnhĩ kaxyw Kra hkôt hamaxpêr xwÿnhjaja nhũm mẽ apyræk nẽ mẽ ho hkra nẽ mẽ ho mex nẽ. ³² Mẽ apê Ijaew kêt xwÿnhjaja nẽ mẽ ixpê Ijaew mẽ pahte axpên pyræk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêť nẽ. Tã kot puj mẽ tee ri ja hã amnhĩ pumu nẽ amnhĩ to kuwÿ nhũm mẽ pama nẽ amarĩ mẽ pakamã ukapĩ nẽ mẽ pahto mex nẽ.

*Pawre kot Tĩrtũm mex o mex ã harênh
Epes 3.20; Korosê 1.16; Wam Korĩt 2.9, 2.16*

³³ Tĩrtũmja àhpumunh tÿx o àhpumunh tÿx. Nẽ ukapĩ ho ukapĩ nẽ mex o mex. Mẽ pahtõ na pu uræk nẽ ã amnhĩ nhĩpêx anhÿr o papa? Nà amrakati kumrêx. Nẽ mẽ pahtõ na pahte Tĩrtũm jamaxpêr kêt omunh? Nà mẽ pahte hamaxpêr kêt omunh kêt. ³⁴ Kapêr ã kagà htũm kot ja jarênh kot: Mẽ pahte Tĩrtũm jamaxpêr kêt omunh kêt. Nẽ kot pu mẽ pahtõ mẽmoj tã hakre hkêť nẽ.

Mê parom àhpumunh o àhpumunh xwỳnh kênã.

³⁵ Nê mẽ pahtõ kot puj we kãm pakapêr nê kãm:
 “Kwa Tĩrtũm. Ra ixte amã mẽmoj nhõrta
 pãnhã kwa amnhĩ xwar inhmã mẽmoj gõ.”
 Anẽ.

Nà mẽmoj piitã õ kênã kot puj kêt ri ã kãm mẽmoj
 nhõr ã amnhĩ jarênh anẽ. Anẽ.

³⁶ Tãm na pre amnhĩ kaxyw mẽmoj piitã ho kator
 pa. Nê ãm pix kukwak ri na mẽmoj piitã htĩr nê pa.
 Jakamã kwa pu mẽ kãm mex o mex ã mãn harênh
 rãhã ho ri papa.

12

*Mê pahte Tĩrtũm mã amnhĩ nhõr ã mẽ pajarênh
 Wam Korĩt 6.20; Epes 4.1; Piripos 4.8-9; Korosẽ
 1.10; Wam Tesarõn 4.1-3; Wam Pêtre 2.11*

¹ Kwa Jejus kôt ixkwỳjaja. Tĩrtũm na hte mẽ
 pahto mex nê mẽ pakamã ukapĩr rãhã jakamã na
 pa ã mẽ amã ixkapêr anẽ. Kwa mẽ tokyx kãm
 amnhĩ jarê nê kãm amnhĩ gõ. Te mẽ ate kãm hkĩnh
 xà nhõr pyræk o amnhĩ nhĩpêx nê kãm amnhĩ gõ.
 Jao mẽ amã kapêr kôt pix mã amnhĩ nhĩpêx o
 ri apa hprãm ã kãm amnhĩ jarê. Nê kãm hprãm
 xà hkôt pix mã tanhmã amã amnhĩ nhĩpêx to ho
 ri apa hprãm ã kãm amnhĩ jarê. Kot kaj mẽ ã
 kãm amnhĩ jarênh anẽ nhũm amnhĩ tã mẽ ama nê
 hkĩnh nê. ã mẽ pahte kãm amnhĩ jarênh anhyrja na
 kãm mar prãm.

² Nê kêt ka mẽ kãm Tĩrtũm prãm kêt xwỳnhjaja
 kot amnhĩ nhĩpêx o ri amnhĩ nhĩpêx o ri apa hkêt
 nê. Nê mẽ amnhĩ to Tĩrtũm mãn wỳ kê mẽ amã
 mẽ ajamaxpêr mex jagjê. Koja mẽ ama nê mẽ
 amã hagjê ka mẽ ra aprĩ hã hamaxpêr xà hkôt mẽ

pahte amnhĩ to mex xà pumunh mex nẽ. Na pu htem hkôt amnhĩ nhĩpêx o ri papa nhũm amnhĩ tă mẽ pahpumu nẽ hkĩnh nẽ. Pu mẽ pajaxwỳja ỹ hã pahkĩnh nẽ ri papa.

Kris kwỳjaja kot tanhmã axpẽn nhĩpêx to hã mẽ kãm karô

Rôman 12.1-11; Epes 4.11-16; Wam Pêtre 4.10-11

³ Nẽ na pre Tĩrtũm ixto mex nẽ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panê amnhĩ nhĩpêx to hã harẽnh o ri mẽ akôt ixpa kaxyw. Tã na pa ã kagàja kamã mẽ amã harẽnh anẽ.

Jakamã kwa kêr ka mẽ amnhĩ to jarkrar o ri mẽ kãm apa hkêt nẽ. Ấm kwarĩ ho kwarĩ. Rỳ atỳx ri ajamaxpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nẽ. Kêt mẽ ãm amnhĩ jarẽnh o:

—Na pa pre amnhĩ kaxyw Jejus kôt ijamaxpêr nhũm Tĩrtũm ixpumu nẽ ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nẽ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nẽ mẽ pajakwa. Nẽ kamã mẽ pajamak nẽ mẽ pahte. Na pu htem mẽ pano ho rĩt nẽ mẽ pajakwa ho pakapêr. Nẽ mẽ pajamak o ri ama nẽ mẽ pahte ho ri mra. ⁵ Ja pyrà nẽ Kris kôt mẽ pahte amnhĩ xunhwỳr xwỳnhja ãm pyxi tă hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu

htem ahpÿnhã tanhmã axpën to mex to ho ri papa.
Jao Kris kôt axpën to pahtõ nẽ pahtõx o papa.

⁶ Tĩrtũm na hte mẽ pahpê hkwÿ hã ahpÿnhã mẽ pamã tanhmã mẽmoj tã karõ to nẽ kaxyw mẽ pahto mẽ paxihtÿx. Tã kêr pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri papa. Jakamã koja mẽhõ ate Tĩrtũm kapêr jarênh o ri apa kaxyw axãm nẽ amã anẽ ka Tĩrtũm kamnàr rom mẽ kãm kapêr jarênh mex o ri mẽ hkôt apa.

⁷ Rỳ ate akwÿjê mã tanhmã axàpênh to ho ri apa kaxyw axãm ka mẽ kãm axàpênh mex o ri mẽ hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tĩrtũm kapêr o ri Jejus kôt mẽ akwÿjê jamaxpêr o hihtÿx o ri apa kaxyw axãm ka mẽ kãm kapêr jarênh pẽ mẽ ho mẽ hihtÿx mex o ri mẽ hkôt apa.

Rỳ ka mẽ atõ akukrêx rax japêr nẽ ate mẽ kêp amrakati xwÿnhjê mã mẽmoj nhõr o ri apa kaxyw axãm ka axàmnhĩx ri mẽ kãm mẽmoj nhõr o ri mẽ hkôt apa.

Rỳ ate akwÿjê ho amnhĩptàr kaxyw axãm ka mẽ ho amnhĩptàr mex o ri apa.

Rỳ ate tanhmã mẽ akwÿjê ho mex to nẽ mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhÿr rãhã ho ri apa nẽ tanhmã akapêr punuj to hkukamã ri ajamaxpêr o ri mẽ hkôt apa hkêt nẽ.

⁹ Nẽ kêr ka mẽ apiitã amã axpën kĩnh kãm axpën to mex rãhã ho ri apa nẽ ri axêx rom amã axpën kĩnh ã amnhĩ jarênh o ri apa hkêt nẽ. Nẽ mẽ kot

amnhĩ tomnuj xà piitã hkaga hpa nẽ hpãnhã mẽ kot amnhĩ to mex xà pix pyr tỳx nẽ hkôt amnhĩ nhĩpêx rãhã ho ri apa. ¹⁰ Nẽ mẽ apê Kris kwỳ hã amã axpẽn kĩnh kãm tãm axpẽn nhĩpêx o ri apa. Nẽ mẽ akwỳjaja mẽ kot amnhĩ to mex xwỳnh ã mẽ harẽnh o ri mẽ hkôt apa. No mẽ ri atỳx ajamaxpêr o:

—Nà koja mẽhõ ixkumrêx ixte tãm amnhĩ nhĩpêx xwỳnh ã ijarẽ pa rĩ kormã amnhĩ xwar tãm kot amnhĩ nhĩpêx xwỳnh ã harẽ.

Anhỹr o ajamaxpêr kêt nẽ. Kêr ka akumrêx tãm kot amnhĩ nhĩpêx xwỳnh ã harẽ.

¹¹ Nẽ kêr ka mẽ Tĩrtũm mã mẽmoj to anhỹr kaxyw nẽ kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nẽ. ¹² Nẽ mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nẽ akĩnh rãhã kãm mẽmoj to anhỹr o ri apa.

Nẽ kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nẽ ri apa htã no ãm tee ri amnhĩ kukamã ajamaxpêr o Tĩrtũm kaga hkêt nẽ. Arĩ amnhĩ to hwỳr rãhã ho ri apa. ¹³ Nẽ koja Kris kôt atôjê hõ kêp amrakati ka mẽ ja hã omu nẽ anhõ mẽmoj japêr nẽ mãm rĩ kãm hkwỳ gõ. Nẽ amnhĩ wỳr awỳ nẽ tanhmã ho mex to.

¹⁴ Nẽ mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nẽ agryk nẽ wajaga kot tanhmã amã ho kaxyw hwỳr atêm nẽ kãm tanhmã hã axàmnênh to hkêt nẽ. Kêt ãm ho Tĩrtũm pix wỳ nẽ kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anẽ. Tã nom kêr ka ixtã

tanhmã homnuij to hkêt nê. Ăm tanhmã ho mex to.

Anhỹr o măn mẽ ho awỳ.

¹⁵ Nê koja akwỳjê hỡ mẽmoj tã hkĩnh nê. Ka omu nê uràk nê ỹ hã akĩnh nê. No koja mẽmoj tã hkaprĩ nê mỳr o nhỹ ka omu nê ra uràk nê ỹ hã akaprĩ nê.

¹⁶ Nê kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tỳx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

¹⁷ Nê koja mẽhỡ tanhmã ato htã ka ăm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akràmnhwỳ mẽ wa tanhmã axpên nhĩpêx to. Hãmri ka wa akupỹm tãm axpên xãm kaxyw kãm akapêr tã nhũm ama nê ăm ama nê akaga. Ka ăm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ă kagà htũm kot ja jarênh kot:

Kêr ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwỳ gô kê mẽ kuku.

Rỳ nhũm mẽ kãm kôr ka mẽ kãm gô hkwỳ kê mẽ ho ixkô.

Kot kaj mẽ ã amnhĩ tã mẽ hipêx mex anê nhũm mẽ
tee ri amnhĩ tã mẽ apumu nê amnhĩ kamã
hpijaàm jao mẽ atã amnhĩ kamã gryk nê.
Anê.

²¹ Nom kot kaj mẽ amnhĩ tã tanhmã mẽ homnuj
to hãmri nê ajaxwỳja uràk nê amnhĩ tomnuj nê. Ja
pymaj kêr ka mẽ amnhĩ rom tãm mẽ hipêx. Hãmri
nhũm mẽ amnhĩ tã mẽ apumu nê mẽ apyrà nê tãm
mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mẽ pahto amnhĩptàr xwỳnhjê jarênh

Matêwre 22.21; Xitre 3.1; Wam Pêtre 2.13-17

¹ Nê kêr ka mẽ kot mẽ ato amnhĩptàr xwỳnhjê
kapêr ma nê kapêr kôt ri amnhĩ nhĩpêx rãhã ho
ri apa. Tĩrtũm kot mẽ pakaxyw mẽ unhwỳr kênã.
Mẽ kot mẽ pahto amnhĩptàr o pa kaxyw na hte
mẽ unhwỳ. ² Jakamã koja mễhỗ mẽ kapêr ma nê
ãm kuma nê hkôt amnhĩ nhĩpêx kêt nê hãmri nê te
kot Tĩrtũm kapêr mar nê ãm mar pyràk o amnhĩ
nhĩpêx. Hãmri nhũm Tĩrtũm tee ri ja hã omu nê
nhỹrmã tanhmã hã ho.

³ Xà na hte tãm mẽ kot amnhĩ nhĩpêx xwỳnhjaja
kãm mẽ kot mẽ ho amnhĩptàr xwỳnhjê pyna ho
pa? Nà na htem kãm mẽ uma hkêt kãm ri pa.
Ấm mẽ kot amnhĩ tomnuj xwỳnh pixjaja na amnhĩ
kamã kãm mẽ uma ho pa. Tã ka mẽ amã mẽ kot mẽ
ato amnhĩptàr xwỳnhjê pyna hprãm kêt xwỳnhjaja
kêr ka mẽ kapêr ma nê hkôt amnhĩ nhĩpêx kê
amnhĩ tã mẽ apumu nê hkĩnh nê. Nê amnhĩm mẽ
ate amnhĩ to mex xwỳnh ã mẽ ajarê. ⁴ Tĩrtũm nhỹ

hã mẽ panhõ pahi kot mẽ pahto amnhĩptâr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptâr xwýnhjaja mẽ panhĩpêx anê. Tĩrtũm kãm hprãm xà hkôt. ⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mãânên ã amnhĩ kukamã ajamaxpêr anê nê ajamaxpêr o:

—Nà Tĩrtũm kot mẽ ixkaxyw unhwýr jakamã na pa hte kapêr ma nê hkôt amnhĩ nhĩpêx mex o ri ixpa.

Anhýr o ajamaxpêr.

⁶ Nê mẽ pahto amnhĩptâr xwýnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaàm o ri apa kamã mãmrĩ mẽ kãm kàxpore hkwý ho hkryre nê òr o ri apa. Mẽ kot hã àhwýr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mēhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêt rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

⁹ Amnepê mã na pre finat Mojesja Tirtûm nhỹ hã Ijaew mã mẽmoj tả karõ nẽ mẽ kãm:

Kêr ka mẽ aprõ pix tânopxa nẽ nhãm mẽnijê hõ kamã ri akurê ho apijaàm kêt o apa hkêt nẽ.

Nẽ mẽ anijaja mẽ amjên pix tânopxa nẽ nhãm ri mẽmyjê hõ kamã akurê ho apijaàm kêt o ri apa hkêt nẽ.

Nẽ mẽ ri axpên par kêt nẽ.

Nẽ mẽ ri axpên pê axàhkĩnh o ri apa hkêt nẽ.

Nẽ mẽ amã ri axpên kukrêx kĩnh o ri amã ho anhõ hprãm o ri apa hkêt nẽ. Anẽ.

Nẽ mãănên ja:

Kêr ka mẽ nhãm mẽ axpên nhĩpêx o te ka amã amnhĩ tả ma pyræk. Jao tãm axpên nhĩpêx o ri apa. Anẽ.

Ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anẽ nẽ mãănên wam finat Mojes kot mẽmoj tả mẽ panhĩgêjtjê mã karõ hkôt amnhĩ nhĩpêx o ri papa rãhã nẽ. Jao axpên par kêt nẽ. Nẽ axpên pê paxàhkĩnh kêt nẽ. Nẽ axpên kutã panojarêr rãhã nẽ. ¹⁰ Koja mẽhõ kãm amnhĩ tả ma pyræk o hkwyjê nhĩpêx nẽ mẽ ho mex pix o pa. Jakamã kot kaj mẽ amã ri axpên kĩnh nẽ mẽmoj to axpên kutã anojarêr pix nẽ. Jao Tirtûm kapêr piitã hkôt amnhĩ nhĩpêx mex o ri apa.

¹¹ Amnepê mã mẽ pahte amnhĩ kaxyw Jesus kôt pajamaxpêr xà hã arĩgrota ã na pre kormã akupỹn mẽ pahwỳr hpôx xà hã arĩgro kormã hwỳr awry rax nẽ. Tã ra hwỳr ahtêp o mỗ. Koja tokyx akupỹn mẽ pahwỳr wrỳ nẽ ma akupỹm kaxkwa hwỳr mẽ pahto api. Jakamã kwa kêr pu mẽ arĩ hamãr rãhã ho ri apa. Jao tanhmã amnhĩ tomnuj to kaxyw nẽ pajamaxpêr o:

—Kwa koja Jejus tanhmã amnhĩ to nẽ jarãhã akupÿn wrÿk japêr. Tã kot pa ri ã amnhĩ nhĩpêx anẽ nhũm wrÿn nẽ tee ri ja hã ìxpumu pa amnhĩ kamã ìxpijaàm tÿx nẽ. Nà kot paj ã amnhĩ tomnuj anhÿr kêt nẽ. Anẽ.

Hãmri nẽ Jejus kamã ajamak pê kutêp Tĩrtũm kapêr kôt pix mã ri amnhĩ nhĩpêx mex rãhã ho ri papa.

¹² Na pu htem kamàt kãm gôr nẽ arĩgro jamãr pê kamã pajamak o panhĩkwÿ. Arĩgro te kêp Jejus akupÿn wrÿk pyrãk. Jakamã kwa pu mẽ kamã pajamak pê kãm panojarêt rãhã ho ri papa nẽ amnhĩ nẽ tanhmã mẽ omnu xà kute pumunh mex o ri papa. Te ho pôristi kot amnhĩ nẽ mẽ kot kãm mẽ hkurê xwÿnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã hto pu mẽ ÿ hã tãm ri amnhĩ nhĩpêx. Tã kêr pu mẽ arĩ ã amnhĩ nhĩpêx anhÿr o ri papa nẽ te mẽ pahte arĩgro hã mẽ pa xwÿnhjê kot amnhĩ nhĩpêx pyrãk o amnhĩ nhĩpêx. ¹³ Kot puj mẽ ã amnhĩ nhĩpêx anẽ nẽ mẽ piitã mẽ noo mã tee ri tanhmã mẽ pahte amnhĩ tomnuj to mã pajamaxpêr kêt nẽ. Jao amnhĩ kamã pahpijaàm nẽ ri papa hkêt nẽ. Nẽ pajamakêtkati nẽ paxàmnhĩx ri papa. Te ho hirã kamã ri mẽ pa xwÿnhjê kot amnhĩ nhĩpêx pyrã nẽ ãm ri paxàmnhĩx tãm amnhĩ nhĩpêx o ri papa. Nẽ mẽ pahprô pix tânopxar o ri papa. Nẽ mẽ pahpipãnh nẽ ri papijapu ho ri papa hkêt nẽ.

Nẽ mẽmoj tã axpên mã paxàkjêr hkêt nẽ.

Nẽ mẽmoj tã axpên kãm pagryk kêt nẽ.

¹⁴ Nom kot puj mẽ axtem nẽ ã amnhĩ tomnuj anẽ nẽ mẽ pahte amnhĩ nhĩpêx tũm kôt pix mã amnhĩ

nhĩpêx. Tã kêr pu mẽ ã amnhĩ nhĩpêx anhyr pumaj hpãnhã amnhĩ to Pahihti Jeus Kris wỳ nẽ kãm:

—Pa Jeus. Nà kormã jar apa ri na ka pre mẽ kot tanhmã amnhĩ tomnuj to kutã axihtỳx o axihtỳx nẽ aa tanhmã amnhĩ tomnuj to hkêt nẽ. Tã inhmã apyrà nẽ ixte amnhĩ tomnuj kutã ixihtỳx o ixihtỳx o ixpa hprãm. Anẽ.

Jao mẽ pajamaxpêr tũmja te ra kot amnhĩ tã mẽ pahto htỳx kêt pyræk o pu mẽ amnhĩ nhĩpêx o ri papa.

14

Mẽ pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Rômãn 2.1; Wam Korĩt 10.23-33; Xiakre 4.11

¹ Nẽ koja mẽhõ kormã Jeus kôt amnhĩ xãm nyw ri kormã hkôt hamaxpêr tohtuj anẽ. Hãmri nẽ htỳx tanhmã hamaxpêr to nẽ mẽmoj mex kaga. Ka mẽ ja hã omu nẽ ãm omu nẽ hã tanhmã kãm nẽ hkêt nẽ. Kwār mãmri ã amnhĩ nhĩpêx anẽ. Koja gaa nẽ rĩ hprĩ hã Tĩrtũm kapêr mar tỳx nẽ hãmri nẽ hkôt mẽmojta pumunh mex nẽ. ² Jakamã koja Jeus kôt akwỳjê hõ mẽ apkur xà piitã hkur pymaj tanhmã hõ kute hã harẽ nẽ hkaga nẽ hamaxpêr o:

—Nà kot pa ja hkur kêt nẽ. Kot pa apu kuku nẽ hkur o amnhĩ tomnuj nẽ. Anẽ.

Kwār mãmri ã hamaxpêr anẽ nẽ hkur kêt nẽ. Nom mẽ pahte Jeus kôt amnhĩ xunhwỳr tỳx xwỳnhjaja na pu htem paxàmnhĩx Jeus kamnàr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỳnhjaja kormã kapêr piitã mar kêt jakamã kwār mẽ mãmri anẽ nẽ

mějmoj kur kêt nê. ³ Nom kêt ka měj ri tanhmã hã měj kãm akapěr to hkêt nê. Rỳ měj kãm:

—Kwa měj ixpyrà něj mějmoj piitã aku.

Anhỹr o měj kãm akapěr kêt nê. Ano ho ãm hã měj omu.

Něj měj ate mějmoj piitã hkur kêt xwýnhjaja kêt ka měj ajaxwýja měj ixte mějmoj piitã hkur ã tanhmã měj inhmã axàkjêr to hkêt nê. Měj ixte mějmoj piitã hkur o ixpa hã měj ixpumu něj ãm hã měj ixpumu něj hã tanhmã měj inhmã axàkjêr to hkêt nê. Rỳ hã měj inhmã:

—Kwa nã kot kaj měj ja kur o amnhĩ tomnuj něj.

Anhỹr o hã měj inhmã akapěr kêt nê. Ano ho ãm ja hã měj ixpumu. Měj pahte ahpýnhã tanhmã paxàpkur to htã Tĩrtũm kot měj pahte Kra Jeju kôt amnhĩ xunhwýr xwýnh piitã měj pahto hkra kênã. ⁴ Jakamã kwa mějmoj tã tanhmã axpẽn mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpěr to ka měj tee ri ja hã omu něj tanhmã hã kãm něj hkêt nê. Rỳ ajamaxpěr o:

—Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nê.

Anhỹr o ri axpẽn kukamã ajamaxpěr hkêt nê. Měj pahpê Tĩrtũm kêt kênã kot pu kêt měj ã ri axpẽn kukamã pajamaxpěr anê. Tĩrtũm pix na hte tanhmã měj pajarênh to xwýnh. àhpumunh o àhpumunh xwýnh jakamã koja tanhmã měj hkrã hto nhũm měj rĩ kormã tãm hamaxpěr pê àmnhĩx ri tanhmã amnhĩ nhĩpêx to ho pa.

⁵ Něj koja Jeju kôt atõjê hõ mějmo arĩgromnu jarê něj hã àpênh kêt nê. Ka měj apê hkwyjaja tee ri ja hã omu něj ajamaxpěr o:

—Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhỹr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpỹnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mẽ kot arĩgromnu jarênh xwỹnhjê mẽ mẽ pahte arĩgro piitã mex ã harênh xwỹnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpêr o:

—Na pa hte Tĩrtũm kãm hprãm xà hkôt ã amnhĩ nhĩpêx anhỹr o ri ixpa. Anê.

Nê mẽ pahte mẽmoj piitã hkur xwỹnhjaja nê mẽ kot mẽmoj kwỹ hkur kêr xwỹnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tĩrtũm mã amnhĩ jarê nê kãm:

—Pa mẽ ijamãr mex xwỹnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm.

Anhỹr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku. ⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêr. ⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupỹm htĩr. Kêp mẽ panhõ Pahihti hã akupỹm htĩr. Kêp mẽ

pahte hkôt amnhĩ xunhwỳr xwỳnhjê nhô Pahihti kaxyw. Jakamã kêp ra mẽ pahkwỳ htyk xwỳnhjê nhô Pahihti nẽ mãânẽn kêp arĩ mẽ pahtĩr xwỳnhjê nhô Pahihti. ¹⁰ No mẽ papajaja mẽ pahpê Kris kôt mẽ pahkwỳjê nhô pahĩ hkêt jakamã kêr mẽ Kris kôt akwỳjê hõ tanhmã amnhĩ nhĩpêx to hã omu hãmri nẽ tanhmã ho akapêr to hkêt nẽ. Rỳ ajamaxpêr o:

—Kwa na ã amnhĩ nhĩpêx anê. Inhmã ja mex kêt.

Anhỹr o ajamaxpêr kêt nẽ. Koja nhỹrmã Tĩrtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhỹr kêt nẽ. ¹¹⁻¹² Kot puj mẽ nhỹrmã pahpiitã Tĩrtũm kutã pahkrĩ nẽ kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nẽ tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhỹrmã mẽ piitã ixpê mẽ õ pahĩ hã ixkutã hkõn krã ho rôrôk nẽ hkrĩ nẽ inhmã inhmex o inhmex ã ijarê.

Nẽ mẽ piitã ixpê Tĩrtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mẽ pahte Kris kôt pahkwỳjê ho mex ã mẽ pamã karõ

Wam Korĩt 8.9-13

¹³ Nẽ kwa kêr ka mẽ akwỳ kot Jejus kôt amnhĩ xunhwỳr tohtuj anhỹr xwỳnhjaja tanhmã mẽ kot amnhĩ nhĩpêx to ho pa hã mẽ omu nẽ ja nê tanhmã

mê kãm akapêr to hkêt nê. Ăm mê noo mã tãm ri amnhĩ nhĩpêx rãhã ho ri apa. Mê kot ja hã mê apumunh nê mê akôt amnhĩ nhĩpêx kaxyw. No kot ka mê kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

¹⁴ E kot pa hpãnhã mê paxàpkur xà hã tanhmã mê panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatàt kôt mê amã tanhmã mê panhõ jarênh to nê ãm hãmri harê. Nà mê paxàpkur xàja ãm pixi nê omnu hkêt. Piitã mex o mex. Nom koja mēhõ tee ri mēmo mê apkur xà hõ pumu nê hamaxpêr o:

—Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwār māmri ã hamaxpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mēmo mê paxàpkur xà piitã mex ã harênh. ¹⁵ Tã kot kaj mê kot mēmoj kur kêt xwỳnh ta py nê o tẽ nê kot hkaga xwỳnh noo mã hkur o xa nhũm apumu nê tee ri hamaxpêr nê hkaprĩ nê. Jakamã kot ka mê ã noo mã amnhĩ nhĩpêx anhỹrja o ho mex kêt nê. Kwa mê ã ri axpên nhĩpêx anhỹr hkêt nê. Kot ka mê ã axpên nhĩpêx anê nê te amnhĩ pix kukamã ajamaxpêr pyrãk o amnhĩ nhĩpêx. Jao akwỳjê ho mex kukamã ajamaxpêr kêt nê. Kris kãm mê hapê htỳx kôt mê kot amnhĩ tomnuj pãnhã amnhĩrer kaxyw ra nê htyk kênã kot ka kêt mê axtem nê ri ã mê noo mã mê kot mēmoj kur kêêta kur anê. Rỳ koja apu tee ri kot mēmoj kur kêêta kur ã mê apumu nê tanhmã amnhĩ tomnuj to. Jao Kris kaga japêr.

Jakamã kwa mẽ ã mẽ noo mã mẽmojta kur kêt nê.
¹⁶ Mẽmo mẽ apkur xàja mex tã nhũm mẽ akwỳjê
 hõ kãm mex kêt japêr ka mẽ noo mã hkur kêt
 nê. Nê tanhmã hã kãm nê hkêt nê. Kot kaj mẽ
 anê nhũm Kris kra hkêt xwỳnhjaja tee ri ja hã mẽ
 apumu nê tanhmã axpẽn mã mẽ apê Kris kwỳjê
 ho kapêr punuj to. ¹⁷ Mẽ pahpê Tĩrtũm krajaja na
 pu htem paxàpkur xà nê pahkõm xà pix kukamã
 pajamaxpêr o ri papa hkêt nê. Na pu htem amnhĩ
 mẽ pahkwỳjê mex kukamã pajamaxpêr. Nê mẽ
 pahte tãm amnhĩ nhĩpêx kukamã pajamaxpêr. Nê
 tãm axpẽn nhĩpêx kukamã pajamaxpêr. Kot puj
 mẽ ã amnhĩ nhĩpêx anê nhũm Tĩrtũm Karõ ja hã
 mẽ pahpumu nê mẽ pahto mẽ pahkĩnh nê. Pu mẽ
 pahkĩnh nê pajamakêtkati nê ri axpẽn kôt papa.
¹⁸ Tã kot puj mẽ ã Kris mã tanhmã amnhĩ nhĩpêx
 to ho ri papa anê nhũm Tĩrtũm ja hã mẽ pahpumu
 nhũm ja kãm mex nê. Nê Kris kôt mẽ pahkwỳjê mã
 haxwỳja ja mex nê.

¹⁹ Jakamã kêr pu mẽ tãm axpẽn mã pakapêr o ri
 papa. Nê pajamakêtkati nê axpẽn kôt ri pajapôj. Nê
 Kris kôt tanhmã axpẽn to paxihtỳx to ho ri papa.
²⁰ No kot ka mẽ axàpkur xà gryk ã akwỳ hukamã
 ajamaxpêr kêt nê atỳx ri mēhõ noo mã mẽmoj kur
 japêr. Kêp omnuj tã ka mẽ ãm amnhĩ pix kukamã
 ajamaxpêr nê noo mã hkur japêr. Hãmri nhũm ja
 hã mẽ apumu nê ra kot Tĩrtũm kaga mã. Ra kêp
 hkra jakamã kwa mẽ noo mã mẽ kot mẽmoj punuj
 ã harēnh xwỳnhhta kur kêt nê. Nom mẽ paxàpkur
 xàja piitã mex. Tĩrtũm kot mẽ pamã ôr jakamã
 piitã mẽ panhõõ. Tã koja akwỳjê hõ Tĩrtũm kêp
 mẽmoj omnuj ã hkamnhĩx tã ka mẽ noo mã aku

ně ho amnhĩ tomnuj ně. ²¹ Kêr pu mẽ pahkwỳjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpêr mex o papa. Měmo mẽo ně mẽmo kagô pê wĩhtija. Tĩrtũm kot mẽ pamã mẽmoj piitã ôr tã no nhũm mẽ pahkwỳjaja kêp ja omnuj ně pu mẽ noo mã hkur rỳ ho pahkôm kêt ně. Měmo mry ně mẽmo wĩhti pu mẽ noo mã hkur rỳ ho pahkôm kêt ně.

²² Ně kêr ka mẽ atõ mẽmoj krêr kaxyw ně hkukamã ajamaxpêr o:

—Nà kot paj ja krê. Tĩrtũm kãm ja mex kênã. Aně.

Hãmri ně mãmri Tĩrtũm kamnàr rom axàmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpêr ně hkaga. ²³ No kot kaj mẽ atõ mẽmoj to anhỹr kaxyw ně tee ri amnhĩ kukamã ajamaxpêr ně ajamaxpêr o:

—Ko kot paj apu ja ho aně nhũm Tĩrtũm hã ixpumu nhũm ja kêp omnuj ně rỳ ko. Aně.

Hãmri ně tee ri amnhĩ kukamã ajamaxpêr. Tã ra ã amnhĩ nhĩpêx aně ně akrê rỳ mẽmoj to aně. Hãmri nhũm Tĩrtũm tee ri ã ate amnhĩ nhĩpêx anhỹr ã apumu nhũm ja kêp omnuj ně. Ate hkamnàr rom mẽmoj to anhỹr kêt ně amarĩ amnhĩ krã hkôt ho anhỹr jakamã ho amnhĩ tomnuj ně.

15

Mě pahte amnhĩ pix kukamã pajamaxpêr kêt ã mẽ pamã karõ

Makre 10.45; Wam Korĩt 10.24; Piripos 2.3-5

¹ Ně kêr pu mẽ pahte ra Jejus kôt amnhĩ xunhwỳr tỳx xwỳnhjaja amnhĩ kôt kormã mẽ kot Jejus kôt amnhĩ xunhwỳr totuj janhỹr xwỳnhjê jamār mex ně. Jao mẽ kamã pagryk tokyx anhỹr kêt

ně. Ām mẽ kutã panojarêť pix o papa. Jao ra amnhĩ pix kukamã pajamaxpěr kêt nẽ. ² Măănẽn amnhĩ mẽ Kris kôt mẽ pahkwỳjê hkukamã măn mẽ pajamaxpěr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamã hamaxpěr kêt nẽ. Na pre mănẽn ỏ Papaj kukamã hamaxpěr. Jakamã Tĩrtũm kapěr ả kagà htũm kot kãm kapěr jarẻnh kot:

Pa Papaj. Na hte mẽ pahkurê xwỳnhjaja ixto kapěr punuj nẽ. Nom mănẽn ả ato kapěr o pa anẻ. Anẻ.

⁴ Mẻ pakaxyw na Tĩrtũm kapěr ả kagàja. Mẻ pahte kamã harẻnh nẻ mar nẻ amnhĩ kaxyw hkôt pajamaxpěr tỳx o ri papa kaxyw. Jakamã na pu htem tanhmã pahpunuj to htã kapěr kwỳ ma nẻ pahkẻnh nẻ. Jao tee ri amnhĩ kukamã pajamaxpěr o ri pahkaprẻ hkẻt nẻ. Ām nhẻrmã Tĩrtũm kot mẽ pahto mex kukamã pajamaxpěr o akupỳm paxi-htỳx nẻ pahkẻnh nẻ ri papa. Mẻ pahkẻnh nẻ ri papa kaxyw na Tĩrtũm kapěr ả kagàja. ⁵⁻⁶ Na pu htem Tĩrtũm kamnẻ rom pahkẻnh nẻ. Nẻ axpẻn kamã paxukaprẻ ho ri papa. Jakamã na pa hte tanhmã mẽ ato Tĩrtũm wỳr to nẻ kãm:

—Pa Tĩrtũm. Apẻ mẽ ijamẻ xwỳnh maati na ka. Nẻ apẻ mẽ inhỏ Pahihti Jejus Kris nhỏ Papaj na ka. Nẻ xep ra Rỏm nhỏ xwỳnh kwỳjaja kãm akapẻr kôt amnhĩ nhĩpêx prảm jakamã kwa tanhmã mẽ hkrẻ ho mex to kẻ mẽ hamakẻtkati nẻ ajamaxpẻr kôt hamaxpẻr rẻhả ho ri akôt pa. Hẻmri nhũm mẽ amnhĩ tẻ apumu nẻ piitẻ amex o amex ả ajarẻ.

Anhẻr o pa hte mẽ ato kuỳy.

Ijaew kêt xwỳnhjê jarēnh

Atre 10.34; Rôman 9.24; Karatas 3.28

⁷ Nê kwa kêr ka mẽ amã axpên tã ma ho ri apa. Te ho Kris kãm mẽ pahtã mata pyræk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tã mẽ apumu nê mẽ anhỹ hã Tĩrtũm mã mex o mex ã harê.

⁸ Amnepêm Tĩrtũm Ijaew mã tanhmã Kris jarēnh to. Kormã pika hwỳr wrỳk kêt ri nhũm hkukamã nhỹrmã mẽ hwỳr wrỳk nê mẽ kamã kator ã harê.

Tã nhũm mẽ hwỳr wrỳ nê mẽ kamã kato. Ijaew hkanrêhã htàmnhwỳjê kamã kato nê mẽ ho mex o ri mẽ hkôt pa. Mẽ kot amnhĩ tã omunh nê ã hamaxpêr anhỹr kaxyw. Nê hamaxpêr o:

—Amnepêm Tĩrtũm kot mẽ panhĩgêr mã hkukamã harēnh xà hkôt na mẽ ixwỳr Kraja mẽ nhũm wrỳ nê mẽ ixto mex o ri pa. Nà âm hãmri na pre mẽ ixwỳr kumẽ.

Anhỹr o hamaxpêr kaxyw. ⁹ Nê mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harēnh mar nê Tĩrtũm mã mex o mex ã harēnh kaxyw. Nê Tĩrtũm kot mẽ akamã ukapĩ hã mẽ ate amnhĩ tã omunh nê mex o mex ã harēnh kaxyw na pre wrỳ. Tĩrtũm kapêr ã kagà htũm kot tanhmã mẽ ixpê Ijaew jarēnh to nê mãânēn tanhmã mẽ apê Ijaew kêt xwỳnhjê jarēnh to nê mẽ pajarēnh kot:

Kot paj Ijaew kêt xwỳnhjê jamak mã amã amex ã ajarēnh o ri mẽ hkôt ixpa.

Nê amex ã inhgrer o ri mẽ hkôt ixpa. Anê.

¹⁰ Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr
ka mẽ apiitã Tĩrtũm nhỹ hã akĩnh nẽ ri apa.
Anẽ.

¹¹ Nẽ mãnẽn ja:

E kêr ka mẽ apê Ijaew kêt xwỳnhjaja nẽ krĩ piitã
hkôt mẽ apa xwỳnhjaja mẽ apiitã Tĩrtũm mã
mex o mex ã harẽnh o ri apa.

Anhỹr o kot harẽnh. ¹² Nẽ Tĩrtũm nhỹ hã kapêr o pa
xwỳnh finat Ijais haxwỳja Ijaew mã Jejus jarẽnh o:
Koja nhỹrmã Jese kanrẽhã htãmnhwỳjê hõja mẽ
pahwỳr kato.

Hãmri nẽ mẽ pahpê Ijaew mẽ Ijaew kêt xwỳnhjê ho
amnhĩptâr o pa.

Jakamã nhũm mẽ amnhĩ kaxyw hkôt hamaxpêr o
pa. Anẽ.

¹³ Nẽ na pa hte tanhmã mẽ ato Tĩrtũm wỳr to ho ri
ixpa nẽ kãm:

—Pa Tĩrtũm. Kwa kêr ka Rôm nhõ xwỳnhjê ho
mex kê mẽ amnhĩ kaxyw Akra hkôt hamaxpêr
mex o ri pa. Jao hkôt hkĩnh nẽ hamakêtkati nẽ ri
axpên to pa. Nẽ kê Akarõ mẽ ho mẽ hihtỳx o pa kê
mẽ amnhĩ kaxyw amã măn hamaxpêr tỳx rãhã ho
ri pa. Anẽ.

Pawre kot hprĩ hã amnhĩ jarẽnh

Sikũn Pêtre 1.12-13

¹⁴ E Kris kôt ixkwỳjaja. Nà ra ixte mẽ ajarẽnh
mar mex. Na ka xep htem amnhĩ to mex o ri
apa. Nẽ mẽmoj to axpên kutã anojarêr rãhã ho ri
apa. Nẽ mẽ kot tanhmã Tĩrtũm kapêr kôt amnhĩ
nhĩpêx to xàja ka mẽ omunh mex nẽ ho axpên
jahkre ho ri apa. ¹⁵ Tã ot pa kagà ja kamã mẽ
amã ixujarẽnh kãm ixihtỳx nẽ. Tĩrtũm nhỹ hã.

Ra mẽ ate mẽmoj mar mex tã pa axte mẽ amã harẽ. Mẽ ate mar tỳx nẽ hã anohtỳx kaxyw. Nà ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm. ¹⁶ Ixte Jejus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nẽ mẽ ato hwỳr o ri ixpa kaxyw. Tã pa hte krĩ hkwy kamã ã mẽ akwỳjê mã harênh anhỹr o ri mẽ hkôt ixpa. Nẽ Jejus jarênhja pa hte mẽ hkôt mẽ kãm harênh o ri ixpa. Mẽ kot mar nẽ hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nẽ nhũm hkĩnh nẽ hamaxpêr o:

—Nà ãm hãmri. Koja mẽ nhỹrmã wa ixri htĩr tũm nẽ mex nẽ pa ho pa. Anẽ.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nẽ ixkĩnh nẽ. ¹⁸⁻¹⁹ Na pa hte ỹ hã mẽ apê Ijaew kêt xwỳnhjê mã Tĩrtũm kapêr jarênh o ri mẽ akôt ixpa. Nẽ mẽ anoo mã tanhmã ri Kris kot mẽ amã amnhĩ nhĩpêx to hã harẽ. Nẽ mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nẽ kamã no pyma nẽ. Hãmri nẽ mẽ pahpyrà nẽ Jejus kôt amnhĩ xunhwỳ. Nom pa hte ã amnhĩ nhĩpêx anhỹr ã amnhĩ pumu nẽ ri hã amnhĩ to jarkrar kêt nẽ. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarẽ. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harênh mex nẽ. ²⁰ Na pa hte mẽ hwỳr inhnojarê

nê ã ijamaxpêr anê nê ijamaxpêr o:

—Kormã mẽ kot Kris jarênh mar kêt xwýnhjê hwýr kot paj mỗ. Nom ra mẽ kot harênh mar xwýnhjê nhỗ krĩ hwýr inhmôrja inhmã prãm kêt. Anê.

²¹ Tĩrtũm kapêr ã kagà htũm kot kapêr mar kêt xwýnhjê jarênh kot:

Kormã mẽ kot Tĩrtũm kapêr mar kêt xwýnhjaja koja mẽ kuma nê hprĩ hã mar tỳx nê. Anê.

Pawre kot Rôm wýr hkrà hã amnhĩ jarênh

Rômân 1.8-15

²² Hêxta waa nê. Inhmã mẽ apumunh prãm tỳx nê Rôm kãm Jesus kôt ixkwýjaja. Na pa hte xatã mẽ awýr ixkrà nom kormã mẽ awýr inhmôr kêt nê. Kormã ixte krĩ hkwý kamã mẽ kãm Kris jarênh o ri ixpa jakamã kormã mẽ awýr inhmôr kêt nê. ²³ Na pa ra xatã mẽ awýr ixkrà hã ixtã amgrà xohtô nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa. ²⁴ Jakamã kot paj tokyx ma mẽ awýr mỗ. Hãmri nê mẽ awýr pøj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wýr ma mỗ. Nê kot paj inhnojarêr ka mẽ ixto Tĩrtũm wý nê inhmã ixăpkur xà hkwý gô pa ma mẽ hwýr pry hã hkur o mỗ.

²⁵⁻²⁶ No na pa kormã mẽ awýr inhnojarêr kêt nê. Kot paj ja rũm awjanã nê akupým Jerujarê hwýr mỗ. Kamã Kris kôt mẽ pahkwýjaja kếp amrakati nê ri pa nhũm pika pê Gres mẽ Masetôn kamã Kris kôt mẽ pahkwýjaja mẽ harênh ma nê mẽ kãm kăxpore hkwý ho akuprô nê mẽ kaxyw inhmã kugô. Tã kot paj ma mẽ hwýr o mỗ nê mẽ kãm kure nê rĩ

kormã ma mẽ awỳr mỗ. ²⁷ Jerujarẽ kamã Kris kôt mẽ pahkwỳjaja Ijaew na mẽ. Mẽ kumrẽx na prem Kris kôt amnhĩ xunhwỳ. Hãmri nhũm mẽ hkwyjaja ma mẽ apê Ijaew kêt xwỳnhjê mã kapêr jarênh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapêr ma nẽ mẽ uràk nẽ Kris kôt amnhĩ xunhwỳr kurê kumrẽx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nẽ. Hãmri mẽ kãm kàxpore hkwy ho akuprõ nẽ mẽ kaxyw inhmã kugõ.

²⁸⁻²⁹ Tã kot paj ma Jerujarẽ hwỳr mẽ kãm o mỗ nẽ mẽ kãm kure hãmri nẽ awjanã nẽ rĩ kormã ma Rôm wỳr mẽ awỳr mỗ. Hãmri nẽ mẽ awỳr pøj pu mẽ axpên pumu nẽ pahkĩnh nẽ. Nẽ axpên mã Jejus Kris mex o mex ã harê nẽ kãm tanhmã amnhĩ jarênh to ho papa. Jao pahkĩnh nẽ papa. Tã pa hpãnhã hamũ ma Espãnhã wỳr mỗ.

³⁰ Nẽ na pu prem Jejus Kris o panhõ Pahihti. Jao te mẽ pahpê hkôt axpên to pahtõ nẽ pahtõx pyràk o axpên nhĩpêx. Nẽ Karõ nhỹ hã pamã axpên kĩnh nẽ. Jakamã kwa Jejus kôt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ. ³¹ Kêr pa ma pyka pê Jutej kamã Jerujarẽ kamã Kris kôt mẽ pahkwỳjê hwỳr mỗ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm ỡr ã mẽ omunh tã tee ri hamaxpêr kêt nẽ. ãm hkĩnh kãm mãmri ãmnhĩx hamỳ nẽ ho amnhĩm awjaprõ.

Nẽ kêr ka mẽ ixto awỳr kê inhnê mẽ kêp mẽ pahkwỳ hkêt xwỳnhjê pumunh mex nẽ.

³² E kêr ka mẽ ã ixto Tĩrtũm wỳr anẽ. Kê ixte ma Jerujarẽ rũm ma Rôm wỳr pàr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mỗn pøj pu mẽ tokyx axpên pumu

nê pahkĩnh nê. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akôt ri ixpa nê ixkĩnh nê. ³³ Tã âm ja pix. Kê Tĩrtũm mẽ akôt pa ho pa. Tãm na hte tanhmã mẽ pahto pu mẽ ý hã pajamakêtkati paxàmnhĩx ri pahkĩnh nê ri papa.

16

Pawre kot ahpỹnhã hkràmnhwỳjê mã kapêr

¹ Ku nê mãănên ja. Ot pa mẽ awỳr Kris kôt pahtõx Pepreja mẽ awỳr kumẽ. Na hte krĩ pê Sênkrej kamã Kris kôt mẽ pahkwỳjê tanhmã mẽ ho mex to ho ri mẽ hkôt pa. ² Nê mãănên pa na hte tanhmã ixto mex to. Tã kê mẽmo arĩgro hã mẽ awỳr pôj ka mẽ kêp Kris kôt mẽ pahtõx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkràmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nê Akirti mẽ hprô Prisireta ka mẽ wa kãm ijarẽ. Na pre hte wa inhĩhkô hã Jejus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grônkh kôt mẽ kãm ixkurê xwỳnhjê pê ixpytã. Pa amnhĩ tã wa omu nê inhmã wa hkĩnh nê. No âm papxipix inhmã wa hkĩnh kêt nê. Na pre Ijaew kêt xwỳnh kwỳ pê Kris kwỳjaja ixtã wa harênh ma nê haxwỳja kãm wa hkĩnh nê.

⁵ Nê na hte Kris kwỳjaja wa ôrkwỹ kamã axpên wỳr akuprô. Mẽ kot Tĩrtũm mã amnhĩ jarênh nê kapêr ã kagà hkwy mar kaxyw axpên wỳr akuprô. Tã kêr ka mẽ mẽ kãm ijarẽ.

Nê Kris kôt mẽ pahtõ Epênre mã ijarẽ. Kêp ixkràmnhwỳ mex na. Inhmã hkĩnh. Kumrêx na

pre jar pika pê As kamã amnhĩ kaxyw Kris kôt hamaxpêr nê hkôt amnhĩ xãm.

⁶ Nê Kris kôt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

⁷ Nê Kris kôt mẽ pahtõ ãrõhti mẽ Jũhti wa kãm ijarẽ. Ixpyrà nê wa kêp Ijaew na wa. Kormã ixte Kris kôt amnhĩ xãm kêt ri na pre wa kumrêx hkôt amnhĩ xãm. Na hte Jesus nhỹ hã mẽ ahkre ho mẽ pa xwỹnhjaja wa kot Kris kapêr jarênh mex ã wa harẽ. Tã ã amnhĩ nhĩpêx anhỹrja mýrapê na pre mẽ hkwyjaja wa unê nê wa haxà pa prem ixpimràatã ixpê prês nê mẽ hagjênh xà kamã ixkrĩ.

⁸ Nê Kris kôt mẽ pahtõ ãpritre mã ka mẽ ijarẽ. Kêp Kris kôt ixkràmnhwỹ mex na.

⁹ Nê Kris kôt mẽ pahtõ Upânre mã ijarẽ. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarẽ. Kêp ixkràmnhwỹ mex na.

¹⁰ Nê Kris kôt mẽ pahtõ Apes ka mẽ kãm ijarẽ. Na prem ra Kris ã hipêx punuj nê no nhũm mẽ kutã amnhĩ to htỳx nê Kris kaga hkêt nê.

Nê Aristopti nhõrkwỹ kamã hkwyjê mã ijarẽ.

¹¹ Nê Kris kôt mẽ pahtõ Erojãwti mã ijarẽ. Ixpyrà nê kêp Ijaew na.

Nê Nasisti nhõrkwỹ kamã Kris kwỳjaja ka mẽ kãm ijarẽ.

¹² Nê Kris kôt mẽ pahtõx Xiripêre mẽ Xiripos wa kãm ijarẽ. Wa kêp Pahihti Jesus mã tanhmã amnhĩ nhĩpêx mex to xwỹnh na wa.

Nê Kris kôt mẽ pahtõx Pesixti mã ijarẽ. Haxwỳja kêp ixkràmnhwỹ na. Na hte Pahihti Jesus mã tanhmã amnhĩ nhĩpêx mex to ho ri pa.

13 Nê Kris kôt mẽ pahtõ Rupti mã ijarẽ. Na hte Kris kôt amnhĩ nhĩpêx mex o ri pa. Nê katorxà mã ijarẽ. Na pre te ixpê hkra nhĩpêx pyrâk o inhĩpêx.

14 Nê Kris kôt mẽ pahtõ Asĩnre mã nê Prekõxti nê Emes nê Patopas nê Emas mẽ. Jajê piitã mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ.

15 Nê Kris kôt mẽ pahtõ Pirorti mã nê mẽ pahtõx Juure mẽ Nêrew wa nê htõxja nê mẽ pahtõ Orĩpti wa mẽ kãm ijarẽ. Nê mẽ pahkwỳ kot mẽ hwỳr pikuprõnh xwỳnhjê mẽ mẽ ho apimràatã mẽ kãm ijarẽ.

E kêr ka mẽ jajê piitã mẽ kãm ijarẽ. Na pa hte mẽ kãm ijamaxpêr rãhã ho ri ixa.

16 Nom mẽ tapxipixjaja kêt. ã mẽ apiitã mã na pa hte ijamaxpêr rãhã ho ixa.

Nê ota jar Kris kwỳjaja mẽ awỳr hpêr mẽ.

17 Kwa ixkràmnhwỳjaja. Na ka mẽ ra aprĩ hã Tĩrtũm kapêr mar tỳx nê. Tã kêr ka mẽ amnhĩ nê mẽ kot Tĩrtũm kapêr o hêx xwỳnhjê pumunh mex o apa. Mẽ kãm axpên nê mẽ ato hpigrành par prãm. Nê mẽ ate Kris kaga nê hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nê mẽ omunh mex nê axkãm ajamak rom. 18 Na htem ã amnhĩ nhĩpêx anhỳr o Pahihti Kris mã tanhmã amnhĩ nhĩpêx to ho pa hkêr nê. ãm amnhĩ hkrã hkôt tanhmã ri hkwyjê jahkre hto ho pa. Kot mẽ no kupyw kaxyw tanhmã mẽ kãm hêx to ho ri mẽ hkôt pa. Te mẽ ahkre mex pyrâk tã mẽ ahkre mex kêt nê. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyrâk. Jakamã kwa mẽ

okora mẽ amnhĩ nê mẽ omunh mex nê. ¹⁹ Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêr nê. ã mẽ ate amnhĩ nhĩpêx anhỹrja na inhmã hprãm.

²⁰ Nê na hte Satanasti mẽ hkwỳjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyràk o mẽ hipêx. Jakamã ã mẽ kot mẽ anhĩpêx anhỹr tã koja Tĩrtũm mẽ amã mẽ ajamakêtkati xàja gô. Tapxipix na kot mẽ pajamakêtkati xà nhõr kaxyw àhpumunh tỳx.

Nê na pa hte mẽ ato Pahihti Jejus wỳr nê kãm:

—Pa Pahihti. Kwa kêr ka Rôm kãm akwỳjê pumu nê mẽ ho mex nê mẽmoj to mẽ kutã anojarêr rãhã ho ri apa. Anê.

²¹ Nê ota mẽ pahtõ Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nê ixtõ Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

²² Nê kot inhmã ixkapêr ã kagà xwỳnh Testi haxwỳja mẽ awỳr hpêr mẽ. Kêp Kris kôt mẽ pahtõ na. ²³ Nê Kris kôt mẽ pahtõ Gajre haxwỳja mẽ awỳr hpêr mẽ. Õrkwỹ kamã na hte Kris kwỳjaja axpên wỳr akuprõ nê kamã Tĩrtũm mã amnhĩ jarẽ

nê kapêr ã kagà kamã harê nê mar o hkrî. Ôrkwÿ kamã na pa pre pôj.

Nê mẽ pahtô Eras haxwÿja mẽ awÿr pêr mẽ. Na hte jar krî ja kamã Rôm nhô pahihiti mã ã kàxpore jamãr pê ho mẽmoj to anhÿr o pa.

Nê Kris kôt pahtô Kwatre haxwÿja mẽ awÿr hpêr mẽ. E jajaja piitã na mẽ awÿr hpêr rê.

²⁴ E kê Pahihiti Jejus Krisja mẽ akutã nojarêr rãhã ho pa.

*Pawre kot Tîrtûm mex o mex ã harênh
Epês 1.3, 3.20-21; Wam Ximotre 1.17; Eprêw
13.20; Jutre 24-25*

²⁵ Nê kwa kêr pu mẽ Tîrtûm mã mex ã harênh rãhã ho ri papa.

Nê ixte mẽ amã Jejus Kris jarênhhta ã ka prem ama nê hkôt amnhî xunhwÿ. Tã koja mẽ ato mẽ axihtÿx ka mẽ hkôt axihtÿx kãm hkôt ri amnhî nhîpêx mex o ri apa. Amnepêm na pre Tîrtûm mẽ apê Ijaew kêt xwÿnhjê ho hkra kaxyw hã amnhî jarênh kêt nê. Kormã ja ho hpimxur ryy nê. ²⁶ Tã ã mẽ anhîpêx anhÿrja o amnhîrît nê ÿ hã mẽ kapêr jarênh o ri pa xwÿnhjê mã kapêr nê mẽ kãm:

—E Jejus kot tanhmã amnhî nhîpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harê nê kuma. Nom kê Ijaew pixjaja mar kêt nê. Kê pika piitã hkôt kamã harê nê kuma. Panhî nê kupê nê kupê hkà htykre nê mẽ hkà haka nê mẽ hkà kamrêkjaja. Kê mẽ piitã Jejus jarênh ma nê amnhî kaxyw hkôt hamaxpêr nê hkôt amnhî xunhwÿ. Hãmri nê hkôt amnhî nhîpêx mex o ri pa. Anê.

Nhũm pre ã mẽ pakaxyw mẽ kãm kapěr anẽ
nhũm prem kuma nẽ hã kagà.

²⁷ Nã Tĩrtũmja tapxipix na àhpumunh tỳx xwỳnh
ã ãm pyxi mex. Nẽ tapxipix kệp mẽ pahpiitã
Mẽpahpãm. Tã kêr pu mẽ Jejus Kris kot mẽ panê
htyk ã omunh xà hkôt Tĩrtũm pix mã mex o mex ã
mãn harẽnh rãhã ho papa.

Tã ãm ja pix. Ixpê Pawre na pa ã mẽ awỳr ixpěr
mẽn anẽ. Na hapêx.

Tĩrtũm kapër ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

383a4e22-34cd-505f-9cc2-2f9921e7aa9f